

BASHINGWA MANYI MU

KIMYE KYA KUMPELO



Mwabuka byepi, jibuumba. Twayai twambe kwi Nkambo yetu kino kimye.

² Lesa Mukatampe, Mulenga wa meulu ne ntanda, Ao wituntongwela na Bulesa bwanji pa kino kimye lukeelo luno, kya kwi mumpopwela Anweba. Kabiji twayai, Nkambo, mu michima yetu yonse twipaane ku kyaswa muchima Wenu kya Bulesa kabiji ne mukwingila kwa Mupashi Wazhila mwi atweba, mukuleta akya Anweba kyo mwasaka mba atweba tuyuke. Nkebelo yetu ke yakwikala Benakilishitu bawama kabiji ne kwikala batomesha Benu bawama. Musakwitupa kikye lukeelo luno, mukimye kyotubena kupembelela Peanweba, mwi Yesu Kilishitu Mujizhina njaji. Amena.

³ Ikalaiko. [Muntu umo waamba mba, “Vuulaiko bitambala bya milombelo?”—Waku.] Ee. Tunji bingi nalusekelo pa kwikala kuno lukeelo luno ne jikwaabo, mu—mu kwingijila Mfumu mukatampe. Kabiji mwitulekeleko mambo, atweba, ne jikwabo, amba kechi tunji na kibaamba kyabaya mwa kwikala bantu ne, bino ntujitu. . . Ntusakwesekesha mukuuba bulongo monka motwafwainwa kubila, monka mwaila bijipo.

⁴ Bino, bavula banji natutambala ne bya kukabila bya kulombelelapo byatuulwa kulutwe. Kabiji Mbena kwitubikatu kulubaji lumo; kechi kya kuuba mba Nebilengulula ne, pakuba Amiwa ne bilombelela pakupwisha. . . Ami natemwa. . . kabiji bufuku, Amiwa nsakuuba lukeelo luno, kabiji ne bufuku jibiji, mukimye, nanchi Amiwa nsakulombelela ne kupembelela pa Mupashi wa Lesa mukuleta lubuko. Apo Poonatemwa kulombelela pa—pa bitambala ne bintutu bikwabo.

⁵ Kabiji pa byakukabila bya pusanako, Billy wa kwibipaana, byonsetu, kwi amiwa. Kunji peepi nobe fiili aduleendi, kabiji Amiwa, poonafumatu mu kibaamba. Mwamona, Amiwa mbena kwibipwishatu bukiji bukiji, kabiji byonse, byo Nakonsha kutambula. Kabiji Nsaakwingijilapo bukiji bukiji monka mo Nakonshesha kuubila. Ami kechi nsaakwipwisha onse ne. Inge nafikamotu, nantolamo kimo, ne kwaamba mba, “Nkambo, bushe kisakwikala *awe* nyi, kabiji kana *yuwe* nyi?” Byo kabyotu, mambo abo, bosetu, bakabila, banji na bya kukabila bingi; kintu kimo, kwakubula luzhinauko, kyo twafwainwa kwisambila pamo. Kabiji Amiwa. . . Kanatu, mwayuka, kimye kimo Mupashi Wazhila wakonsha kwaamba akyo kyo Natangile, akyo kinji mumuchima wami; Mbwela jibiji kukyokyo, kabiji

nkeba kupitulukamo poopa poso ne Kintaana. Ingene, kwikalatu kwibisenda na mulekelesha.

⁶ Pano, kabiji twakeba kwaamba mba, lukeelo luno, kabiji ne kupana lwimu kubanji mumapuzha akwabo akino kyaalo. Twasaka kupana lwimu kubalunda lukeelo luno abo botwanungankana nabo kupichila mufoni, banji ku New York City; Beaumont, Texas; Prescott, Arizona; Tucson, Arizona; San Jose, California; Connecticut; Gainesville, Georgia; kabiji ne New Albany, Indiana; ne kyaalo kyonse. Twimwimuna mu Jizhina ja Nkambo Yesu.

⁷ Lukeelo luno, mu Indiana, ke lukeelo lwawama. Twajinga na mvula bufuku bwapita ayo yaleta mwela watalala. Kabiji tunji...Aye teete walusambakeno wayulatu bantu, kabiji unji yense ubena kupembelela, na kuketekela kukatampe bingi, palulwe lufujisho lwa sukuulu wa Pamulungu. Kabiji Naketekela mba mapesho akatampe akwa Lesa ekale ne anweba koko.

⁸ Kabiji tubena kuketekela mba, bukijibukijitu, kulenga ji—jishinda jo twafwainwa kwikala nanjo, ja kwishilamo bonse pamo, kapepo muteete wamukatampe, ako ko Mbena kumvwa lutangijilo lukatampe lwa kusapwila pa Michiba Itanu naibiji ya myalo yampelako mu Baibolo.

⁹ Nanchi pano, pakuuba mba ntubule kubandinsha palufujisho lwaneema lukeelo luno...Namukeba Nkambo, nsaambena kulanguluka mba, “Kika kyo Nsakwambapo?” byo nayuka mba ino yo mpwijilo ya pelako yotwafwainwa kwikala nayo. Ako Kwiya kwa Nkambo kujitu pepi!

¹⁰ Namona, panyuma yayoya ng’ambilo yajinga ku California ya kwambila jimo bitu bikamweka, akwa kuji manzubo, kabiji ne mampuzha, byatatula kutwela panshi lubilo sante ichezi pa awala umo, binchi bibena kuuba milala kabiji ne kwabanapo. Kabiji abo kechi bayuka kibena kulengela ne. Tuji kumpelo. Manzubo ama aduleendi-sauzande-dollar, abena kutweela pashi. Njina mitwe yabyambo ikatampe muma pepala abyambo, bipikichala, abyo byo Naketekela kuleta bufuku buno, byo Mbena kusaka kwaamba pakintu kimo kyatala pakyookyo bufuku buno.

¹¹ Kabiji, nanchi, bufuku buno tunsakwikala na milombelo ya bakolwa. Mwiyeeko mute uno, faivi, sikisi okoloko, nangwatu kimye kyonse mokisakwikela. Tunsu kutaampa bukijibukiji, Naketekela, pakuuba mba bantu bakonsha kufumamo bukiji, kabiji mutambule ne bitupa bya kulombelwapo. Kabiji tunsu kulombelenga bakolwa bufuku buno, inge Nkambo waswa.

¹² Pano, panyuma yakulangulukapo na milombelo, “Pano Ngube kika?” byo nayuka mba juba jimo Kakumbula pa byonse byo Nakonsha kwamba kuno...Kabiji Nafukula, nangwa mba naumvwa lutangijilo lwa Mupashi Wazhila kwaamba

pa bungauzhi, kuuba nobe kwitubuula atweba. Mwamona? Kekintu kimo atweba...Inge twabulwa kubuulwa, kabiji kintu kimo kyamwekatu byokabya, twafwainwa kuyuka pakikye. Aye Mupashi Wazhila wikipaana kwi atweba, pakuuba mba bantu babuulwe bintu bibena kwiya. Anweba mwayuka, Baibolo waamba, mba, “Lesu kechi ukoba kintu ne kana patanshi Aye wikimwesa kubakalume Banji, abo bungauzhi.” Kabiji—kabiji ne Yesu byo ebanjimwine bantu, nabintu bikamweka; ne bungauzhi byo bebanjimwine bantu, na byobya bikamweka. Kabiji kitufwainwa atweba pano, mukimye kikatampe kyootubena kwikalamo, kumona kana ng’anyi nkulo yootubena kwikalamo, kabiji kika kibena kumwe-...kabiji ne byoobya bikamweka muino nkulo. Nanchi lumu lufunjisho lwamweka nobe lweenyi bino potutanga bimye byavula bingi, kyaishile panshi ya muchima wami amba—amba ng’ambeko kubantu pakikye lukeelo luno.

¹³ Pano twayai ntuzhikule muma Baibolo etu mu Mateyo chapitala 24, kabiji tutange kibese kya Byambo [Mulongo Branham wawamisha pashingo—Waku.] (Ndekelaiko mambo.) Pakuba mba tu—tu ntole kibaaba kinshina kabiji ne mutwe wa byambo.

¹⁴ Pano, vulukai tunsu kufujisha kikye nobe kalanshi wa Baibolo, biteende. Ntolai mapezulu enu ne bipepala. Njina Binembelo byavula bingi bya neembwa paapo, pakuba—pakuba mba neanweba mwibinembe. Poopo mwafwainwa kuya kunzubo kabiji ne kupitulukamo, mambo akye kijitu pamo nobe kalanshi wa sukuulu wa Pamulungu, pakuuba mba twafwainwa kuyuka, ne kujimunwa kabiji pakuuba mba mwinengezhe kubimye abyo byo tubena kwikalamo.

¹⁵ Mu Buuku wa Mateyo Wazhila, [Mulongo Branham wawamisha pashingo yanji—Waku.] (Ndekelaiko mambo.) veeleshi 24, nangwa, kyapitala 24, byokabyo, kutatwila pa veeleshi 15, Nasaka kutanga kibese kya Kyambo Byanji.

Kabiji pa kwikimona akya kya bunya kileta lonaiko, kyaambile Danyela ngauzhi, sa kyaimana mwazhila, (awa utanga, muleke omvwe:)

Pokapo balekai aba banji Muyudeya bakanyemene mumitumba:

Awa uji pamutenge—pamutenge kechi akekile amba nkalupule biji munzubo yanji ne:

Kabiji ne yewa uji mu bujimi kechi akabwele amba nkashikule bya kuvwala byanji ne.

Kabiji malwa abo baimita memi, neboba bamunsha baana mu oa moba!

Kabiji lombai mba po mukanyema kechi kikekale mu bang’ondo bamashika, nangwa mujuba ja sabando ne:

Mambo malwa akatampe akamweka ponkapo, kyakuba mba kala kechi kwajingapo akwabo kufuma kuntendekelo ya panopantanda kufika ne pano ne, kabiji, kine ne myaka yonsetu kechi akekalako abyokabyo ne.

Kabiji aa moba umvwe ne kwiachibako ne, inge kapaji nangwa umo ukapuluka ne: pakuba namambo abasalululwa bakeachibako ao moba.

Ponkapo umvwe muntu akemwambile mba, Talai, Kilishitu uji kuno, nangwa mba kookwa; kechi muketabe ne.

Mambo bakeya ba Kilishitu babubela, ne bangauzhi babubela, kabiji bakamweshi biyukilo bikatampe ne bya kukumya; kyakuba mba, kana kyakonsheka kubiwa, mu kwibatwala mungi basalululwa.

Talai, Nemubujila jimo.

Kabiji kana bakemwambile mba, Talai, uji mukiselebwa; kechi mukayeko ne: talai, uji mwafyamika mu manzubo; kechi muketabe ne.

Mambo byonka byuba kubesha kwa mvula kufuma kumusela, ne kumweka kumuzhika; byobyoyo kikekala ne pa kwiya kwa Mwaana muntu.

Mambo akwa koka kuji mubiji wamyama wafwa, ko konka kukapwila ba mpungu . . .

¹⁶ Pano, mutwe wa byambo, Nasaka kutola veeleshi wabu 24, kwambishapo pa yuwe veeleshi wa lufujisho lwetu lwa sukuulu wa pa Mulungu lukeelo luno. Kabiji telekeshaitu bulongo kimye kyo Nsakutangululamo, jibiji.

Mambo bakeya ba Kilishitu babubela, ne bangauzhi babubela, kabiji bakamweshi biyukilo bikatampe ne bya kukumya; kyakuba mba, kana kyakosheka kubiwa, mu kwibatwala mungi basalululwa.

¹⁷ Pano mutwe wa byambo lukeelo luno, nangwa mba kinshina, byokabyo, Nasaka kutola: *Bashingwa Manyi Mukimye Kya Kumpelo*. Ao ye mutwe wa byambo ye Mbena kukeba kwambapo, nangwatu mba kinshina: *Bashingwa Manyi Mukimye Kya Kumpelo*.

¹⁸ Naketekela namba tubena kwikala mukimye kya kumpelo. Naketekela namba bonsetu ba . . . Aye yense utanga Binembelo, nangwatu aye—aye waitabila, wayuka mba pano tuji kumpelo yajishimikila ja inontanda. Kechi kukekala ne ene mambo a kwijinembela ne, mambo kechi kukekala muntu wakwijitanga ne. Tuji kumpelo ya kimye. Kana kimyeka, kechi Nayuka ne. Nanchi kikekala mung'anyi kimye, nangwatu ba Malaika ba Mwiulu kechi bayuka mineti nangwa awala ne. Pakuba twabuulwa kwi Nkambo Yesu, kuba mba, abye bintu byo tumona

pa kino kimye umvwe byatatulwa kufikizhiwa, nanchi tusutule mitwe yetu mambo bukuzhi bwetu bujitu peepi. Pano, kya kwaamba mba “bujitu peepi” byo kyalumbulula, kechi Nayuka ne. Kyakonsha kulumbulula . . .

¹⁹ Nobe byonka byaambile masayatisiti juba jikwabo, pa televizhoni, pa kwaamba pa masauzande-ama-mailoshi akatampe abena kwabanya ntanda ayo ibena kutwela panshi. Aye bamwipwizhe jimpuzho, “Yakonsha kutwela byobya?” Ako ke ku Los Angeles, ku Kintulu kya Kumusela. Kabiji anweba bavula mwamwene byo bekilondelenga na ndandalashi, kabiji ne kupita . . . kupita panshi ya San Jose, kyapita kuya mu Alaska, kupita kuya mu Jikuji ja Aleutian, peepi nobe tuu aduleendi mailoshi kufika ne mukalunga, kabiji kyaiya kubwela kufika ne ku San Diego, kyapichile kuzhokoloka kunyuma ya Los Angeles, kabiji kyaiya kyafika kookwa, ke fukuta mukatampe.

²⁰ Kabiji abye byonse bitentanshi byo twikala nabyo ke mushiji ulupula buchimba bwakaba kufuma mukimbo kyazhika, nobe, mookamwa. Amiwa kechi nakonsha kwikitongola jizhina jo—jo bekiita. Nangwa byookabyo, umvwe akye kyasukena, akyo kyo kilengela abye bitentanshi abyo byo twikala nabyo pa myaka yavula ku Kitulu kya Kumuzhika. Pano kyauba mulala kuzhokoloka. Kabiji ba masayatisiti baambile mba, umo . . .

Awa mwanamulume waambijile mukwabo amba, “Akya kya konsha kukuluka nyi?”

Aye waambile mba, “Ine ‘kuba kya ubiwa ne,’ bino kikobiwa.”

Waambile mba, “Bino kechi mukisemi kyetu ne, kapeepo?”

Waambile mba, “Mu mamineti faivi alondelapo palutwe, nangwa mu myaka faivi yalondelapo. Atweba kechi twayuka kiine kimye ne.”

²¹ Uno mulungu, batumijile mitwe ya byambo bya mu mapepala, ya manzubo akatampe a ma aduleendi-sauzande-dollar abena kupumuka ne kulalaika, bantu babena kufumako. Kabiji abo kechi bayuka mwakwikilekeshesha ne. Kechi kujipo jishinda ja kwikilekesheshamo ne. Monai, Lesa wakonsha kuba Aye kyonse kyo akeba kuuba, kabiji kechi kujipo umo wakonsha ku Mubuula mwa kwikyubila ne.

²² Munshimika ma nzubo, mwakonsha kulenga bintu bya kisaayasi, kabiji Lesa ye Mulenga wa saayasi. Anweba mwakonsha kumukanya byepi Aye? Aye wakonsha koonaua ino ntanda lukeelo luno kwingijisha mbalebale inge Aye ukeba kwikyuba. Bushe anweba mwayukanyi amba, Aye wakonsha kwaamba mba mbalebale ikaleko nyi, kabiji ya konsha kwikala foote mailoshi kuya mukuzhika kwa kuvula kwabyo pa kachi ka awalatu umo, monai, kechi kujipo . . . kabiji ne kuja bantu ponkatu pamushiji. Aye ye Lesa. Aye ubatu monka

Mookyamutokela ku muchima. Aye wiimenatu pa buke bwaji, Aye mwine.

²³ Pano, byotwamona bonseebwe bukamonyi, amba kimye kyo tubena kwikalamo, Nalanguluka mba ke kintu kyawama kupituluka mubibye bintu ne kwi bileta patooka, byo kiji mba Tutetesho twashinkulwa, kabiji ne kutaana bukine bwa bibye bintu, byoka Lesa byo aikala wakishika kwi atweba, na lusa Lwaji, pakuuba mba etumweshe bibye bintu.

²⁴ Nasaka kuuba mba anweba mumone mumwe mu Mateyo 24, Yesu waingijishe kyambo kya kuuba mba “Bakilishitu,” B-a-k-i-l-i-s-h-i-t-u, “Bakilishitu.” Kechi Kilishitu ne, kana mba “ba Kilishitu,” bavula, kechi umo ne. “ba Kilishitu.” Okao mambo, kyambo kya kwaamba mba *Kilishitu* kyalumbulula kuuba mba “Washingwa manyi.” Kabiji nanchi inge “mushingwa,” kechi ukekalatu umo ne, pakuuba ke bavula ba mushingwa, “bashingwa manyi.” Mwamona?

²⁵ Nangwa byokabyo, inge Aye wakebelenga kwi kyabanya pakuuba mba twikumvwishe nangwa kubula kwikumvwisha bulongo, Aye inge waambile mba, “Mumoba akupelako bakeya ba bubela, bashingwa manyi.” Bino, akyo kyamweka nobe kechi kyakonsha kubiwa ne, monai, ng’ambilo ya kuuba mba “mushingwa.” Pano monai byambo bya londelapo, “kabiji ne bangauzhi babubela,” b-a-n-g-a-u-z-h-i, bavula.

²⁶ Bino, *washinga manyi*, ke, “umo uji nambila.” Kabiji jishindatu jakuletelamo mbila ke kupichila mu umo awa *mushingwa*, kabiji awa wafwainwa kwikala ngauzhi, mushingwa, “kukeya babubela, bafunjishi ba mushingwa.” Aye ngauzhi ufunjisha mbila yaji byoiji. Bafunjishi bamushingwa, bino bantu bamushingwa saabaji nalufunjisho lwa bubela. Bashingwa manyi, “Bakilishitu,” bavula; “bangauzhi,” bavula. Kabiji umvwe kujipo kintu kyamusango yeo amba—amba Kilishitu, umo, nishi abo bafwainwa kwikala ke “bashingwa manyi,” kya kuuba mba bungauzhi bwabo bya byobya byo bafunjisha bikekala ke bya pusanako, mambo abo ke bashingwa manyi, mushingwa.

²⁷ Bino, ke sukuulu walufunjisho lwa Pamulungu, tubena kukeba kwi—kwi kileta aakye mu kwikimweshwa mubukine, kupichila mu Binembelo, kechi mwaila ng’ambilo ya muntu umo pa kikye ne, bino kutangatu Binembelo.

Mwakonsha kwaamba mba, “Akye kyakonsha kwikala byepi? Bushe abo bashingwa manyi . . . ? Boobang’anyi?”

“Bakilishitu,” B-a-k-i-l-i-s-h-i-t-u. “Bamushingwa Bakilishitu, ne bangauzhi babubela.” Bashingwa manyi, bino saabaji bangauzhi babubela!

Yesu waambile, mba, “Mvula unokela pa baoloka ne pa babula koloka.”

28 Pano, muntu umo wakonsha kungimpuzha amiwa mba, “Bushe waketekela mba akwa kushingwa manyi kuji pa babo bantu kyalumbulula mba ke kushingwa manyi kwa Mupashi Wazhila?” Ee, mwane, Mupashi Wazhila wakine wa Lesa ye wikala pa muntu, nangwa byokabyo saabaji babubela.

29 Pano telekeshai bulongo ne kumona Aye byo aambile. “Kabiji bakamweshwa biyukilo ne bya kukumya, kya kuuba mba bakebatwala mungi Basalululwa kana kyakonsheka kubiwa.” Kabiji bashingwa na Mupashi Wazhila wakine. Nayuka mba akye kibena kumvwanika nobe kechi muji maana ne, bino tusakwikala na kimye kyabaya ne kwikilondolola na Kyaambo, akyo kyokyoka kishiika ABYO BYOBYAAMBA AYE NKAMBO, kya Bukine.

30 Pano twayai tuzhikule mu ma Baibolo etu, pakaminetitu kamo, mu Mateyo kyapitala kyabu 5, kabiji kutatwila pa—pa veeleshi wa 45, kabiji monai pano byo tubena kutunga mubimye bicheche mubibye Binembelo. Kabiji pano, panyuma ya kufika paapo, kika, tusa kwimupa . . . Nanchi anweba, inge twakakalwa kwibitanga byonsetu, nanchi mwantola Baibolo wenu; kabiji—kabiji mwakonsha kwibitanga umvwe twafuma muno mwaya kumanzubo, kabiji—kabiji mwatanga byaamba Baibolo pakikyeye.

31 Pano twayai tutekanyetu, pakuuba mba tutolepo kine—kine kinshiika, mambo Amiwa njina ng’ambilo ya kukumisha. Pano nga Mupashi Wazhila wakonsha kushinga manyi byepi mufunjishi wabubela? Bino abyo Yesu byobyoby aambile mba bikamweka.

Pano, Mateyo, kyapitala kyabu 5, na veeleshi wabu 45, pano twayai tutange. Twayai tutole, tutatwile pa—pa cheche kunyuma, pa 44.

Pakuuba Nemwambila namba, Temwai balwanyji benu, peshai aba bemufinga, bobilai byawama aba bemushikwa, . . . balombelelai aba be mwingijisha mumashinda atama, kabiji ne kwi mumanyika;

Pakuba mba mwikale baana Bashenu uji mwiulu: mambo aye uselesha juba janji pa babi ne . . . bawama, kabiji unokeshwa mvula pa baoloka ne . . . babula koloka. (Mvula inokela pa babi byoka byo inokela pa baoloka.)

32 Pano kulondaizha kikye, kuya ku bungauzhi abo bwatala kukikye, twayai tuzhikule ku Bahebelu kyapitala kyabu 6, ku veeleshi mukwabo wa-londakana na kikye, ako Paulo kooabena kuvuluka bintu bimo byaambilepo Yesu. Paulo, pano ubena kwaamba. Mukimye kyo mubena kwikikeba . . . Kabiji anweba mubena kuteleka ku waileshi, bwezhai ma Baibolo enu pepi kabiji ne kipepala, pano kebai kikye. Bahebelu, kyapitala kyabu 6, Paulo kunembela Bahebelu, pa kwibamweshwa bivule ne bipasha, Pa kwibaleta kufuma ku Buyundeya kuya

ku Bwinakilishitu, kwibamweshwa mba bintu byonse bya kala byaimejileko bivule bya bintu bikeya. Paulo keambe pano, Bahebelu 6.

Oka mambo nanchi tuleke mambo abintu bitanshi bya Kilishitu (K-i-l-i-s-h-i-t-u, umo), tuyenga kulutwe tufike ne kukulumbuluka; kechi twaale jibiji kitendekesho kya lulapilo...mngilo ifu ne, kabiji nangwa kyalwitabilo lwa kwi Lesa ne.

Nangwa...lufujisho lwa mabatizhilo ne, kabiji ne bya kubika maboko, nangwa kya lusanguko lwa bafu ne, nangwa kya luzhachisho lwa peenape ne.

Kabiji kyo kyo tukooba, umvwe Lesa waswa.

Mambo mambo aboba batambwile kala kyeya, ne kutompa batompele ku kya bupe kya mwiulu, kabiji baubilwe ke bakutambula Mupashi Wazhila,

³³ Nasaka kwita milanguluko yenu pa kamineti kamo. Bushe mwamona nyi? Akyo ke “bupe”; kabiji kechi “bya bupe ne, baubilwe ke bakutambula bya bupe bya mwiulu”; pakuba, “kya bupe kya mwiulu,” kimotu; “Kilishitu,” umo; “bupe,” kimo.

...kya bupe kya mwiulu, kabiji...baubilwe ke bakutambula Mupashi Wazhila,

Kabiji batompele ku aa...mambo awama a Lesa,... (batompele kuka?)...a mambo awama a Lesa, ne bya bulume bwa ntanda ikeya,

Umvwe ba pondoka, kechi kya konsheka ne kwi babusha abo jibiji ku lulapilo; byo bepopela jibiji Mwaana Lesa, ne kumumweshwa bumvu patoka.

Mambo, (telekai) mushiji...watoma mvula wamunokelanokela, ne kumenesha kajo kafwanwa abo bo kamenejile, bamupesha mapesho kwi Lesa:

Pakuba umvwe umenesha miba...bincha ulengululwa, kabiji uji pepi na kufingwa mafingo; ne mpelo yanji kokusokwa.

³⁴ Pano esakanyai pamo na Mateyo 5:24 jibiji. Monai, Yesu waambile mba mvula ne juba biiya pantanda, Lesa wibituma amba bikale bya kunengezha kajo ne bintu bikwabo bya bantu banji pano pantanda. Kabiji mvula uletelwa kajo, ne bijimwa. Pakuba biswaswa, seku, byo biji mubujimi, bitambula bintutu bimo. Aye mvula yeka umo ulengela wichi kukoma ye mvula umo ukomesha ne seku.

³⁵ Byo Najinga na lufujisho pa kyokyo kimye kimo, kimye kitanshi kyo Nakumenye bantu baki Pentekosito! Kabiji kyajinga ke lufunjisho lwabaya bingi kwi amiwa. Namwene banabalume babiji, umo...Kechi na kyumwvinepo kwaamba mujimi ne. Umo waambile mu jimi, mukwabo wi yintutulula,

saa-bepipuzhanya byo kabyo. Kabiji wakonsheshe kubulang'ana kya bukine, kwaamba mba, "Muji bavula bingi muno bufuku buno bafwainwa kulapila. Muji banabakazhi ne banabalume, bonsetu." Kabiji bantu baimenenga ne kuya kukitapisho.

Nalangulukile mba, "Byo kyawama!"

³⁶ Kabiji pano na kya bupe kicheche kya Mupashi Wazhila, Nesambile nabo aba banabalume, nobe, mwayukatu, mu kuyuka mipashi, jishindatu jicheche ja kuyukilamo. Kabiji umo wa mwiabo wajinga Mwinakilishitu wakine, kabiji wajinga kalume wakine wa Kilishitu, pakuba mukwabo wajinga mujimbijimbi. Kabiji umo wa mwiabo, yeka wajinga mujimbijimbi, waikelenga na mwanamukazhi wafituluka-mutwe, wa endelenga na wakikoba kyatokoloka nesuki yachiluluka kabiji wajinga nanji na baana. Kyawama, kyamwekele moka mu kimwesho; kuuba wikikana ne. Kabiji Naambile nanji pakikyeye. Wantajiletu byobya watatula kwendauka nakuzhokoloka mकिनshimikwa.

³⁷ Pano Najinga walubakana mumilanguluko, kya baishatu. Nalangulukile mba Naiya mu bamalaika, nanchi Nabwelele nakumya namba Nji mukachi kabadiabola. Akye kyakonsha kwikala byepi? Amiwa kechi naumvwine mokyaila ne. Kabiji pamyaka yavula Nafumishepo maboko pakikyeye, posotu juba jimo koono . . .

George Smith, songwalume wenda na mwaanami wamukazhi, twaile kesha, akwa kukikayo kyakala kupuzha Kongya nakulomba.

³⁸ Kabiji byotwajinga kookwa pa moba avula, Mupashi Wazhila wandetejile kikyeye Kinembelo jibiji: "Mambo mvula iya panopantanda na kumenesha binchi, pakuba miba ne bisonsonya neabyo bikela kumvula umo yekatu, bino mpelo yabyo ke kusokwa." Bino saabibena kwikela kusulo imo ipana-bumi yakwa Lesa. Nanchi Naumvwishishe, kuuba mba, "Monka," Yesu bo aambile, "kooka kubipangwa byabo ko mukebayukila."

³⁹ Pano, okao mambo, mvula byo inokela panshi pa bijimwa bya mungye, ke kipasha kya mvula wabu Mupashi ao upana Bumi Bwapee, unokela pa Kipwilo, mambo tumutela mba mvula mutanshi ne wapelako. Kabiji ke mvula, ubena kunoka kufuma ku Mupashi wa kwa Lesa, kunokela pa Kipwilo Kyanji.

⁴⁰ Monai, keekintu kyenye bingi papo. Mwamona? Aya nkunwa byo yaponejile mumunshiji, mumusango yense moyaponejilemo, kya kutatwilapotu yajinga miba. Pakuba wichi naye waponejile mumunshiji, ne binchi, byajingatu binchi kya kutatwilapotu. Kabiji kinchi kyonse kisemunwinenga akyokine, jikwaabo ne jikwaabo, akyo kimwesa mba byajinga mubwiine buntutulu bwa kutendekelo.

⁴¹ "Kabiji bakajimbaika Basalululwa inge kya konsheka kubiwa," mambo babena kutambula mvula umotu, mapesho

amotu, kumweshwa biyukilo bimoto, bya kukumya bimoto. Mwamona? “Bakajimbaika, nangwa mba bakajimbaika Basalululwa inge kya konsheka kubiwa.” Pano, mwiba kapaji kyo akonsha kuubane byo anji mwiba, kabiji ne wichi naye kapaji kyo akonsha kuubane byo anji wichi; kiji ku Mulenga wikilengele musango moekifukwijile kwikelamo kufumatu kutendekelo. Abo bo Basalululwa. Yekatu mvula umo!

⁴² Juba jisola mulukeelo kabiji jikumbana pantanda ponse, byooka byokiji pa inontanda ne juba jotwikalamo pamo. Kabiji juba, juba jookatu jimo jiselela ku Musela jo juba jimoto jinzhikila ku Muzhika. Kabiji aja juba jaletwa mba jikomeshe nkunwa panopantanda, ako kufuma mibiji yetu.

⁴³ Atweba bumi bwetu bwikela kubintu byafwa. Ajo jojishindatu jo twafwainwa kwikelamo nabumi. Kabiji inge kintu kimo kyafwainwa kufwa pajuba pajuba pa kuuba mba obewa wikale nabumi, ako ke kumubiji, nachi ke kya bukine kya kwaamba mba yenu—mubiji obe wikala nabumi kupichila mukunja kintu kyafwa, ako ke kumubiji wamashi, nanchi wafwainwa kwikala na Kintu kimo kyafwa, ku bumupashi, pakuba mba bumi bobo bwa bumupashi bupuluke. Kabiji Lesa, walukile ke kintu, mubiji wanyama, kabiji wafwile pakuba mba twikale na bumi. Kechi pajipo kipwilo ne, nangwatu kintu kikwabo kya konsha kukupulusha ne kanatu Lesa. Akyo kyokitutu kyo bekelamo na bumi.

⁴⁴ Pano pitulukai mu Binembelo. Yesu kyo Kyambo. “Muntendekelo mwajinga akyo Kyambo. Kabiji ne kyokya Kyambo kya aalukile ke muntu ne kwikala waikelenga muno mwetu. Muntendekelo mwajinga kyokyo Kyambo, ne kyokya Kyambo kyajinga na Lesa. Kabiji ne kyookya Kyambo kya alukile ke muntu, kabiji Waikele na bumi, waikelenga muno mwetu.” “Kabiji muntu kechi ukekelatu ku kanjo konkatu ne,” ako ke kumubiji, “kana ku Kyambo kyonse kifuma mukunwa ka Lesa.” Pano, mwamona, twikelatu ku Kyambo, kabiji akyo ye Lesa.

⁴⁵ Bino juba jiiya ne kukomesha nkunwa. Bino, kechi bya konsha kukomenatu pa kimye kimo ne. Monka mokiila, na kukoma, kimye kyonse kiya na kukoma posotu kyafikila pa kupya.

⁴⁶ Nanchi byo kinji, ne leelo, na Kipwilo. Kyatatwile mubucheche bwakyo, kunyuma akwa kunkulo yafishi, ako pokyajinga mumunshiji. Pano kyaakoma kyapela. Kabiji twakonsha kwikimona, bulongotu, kya kuuba mba Lesa kupichila mu bilengwa na lesa kimywe kyonse . . .

⁴⁷ Kuuba mwalubankanya ng’ingijilo ya bilengwa na lesa ne. Alo lolukatazho mubuleelo. Tubena kutumbula mambomba, kabiji amwa mu kalunga ka meema, kwi kimvumya ne koonana na ma atomiki mbomba. Mubena kunsasaula ne kuletatu aya

ndochi yavula kimye kyonse, ne kwi itaya moka. Mutema binchi; kinkukwila kya mwela kikemutaana. Kupoya mukola; ne kulengela mukola kuyula.

⁴⁸ Mwafwainwa kutuluka jishinda jakwa Lesa jo obilamo bintu ne kwikela monkamo. Twapwizha pamo bantu mu bipwilo ne mutubungwe; talai ku byotuji nabyo! Ikelaitu mujishinda jo anengezhezhamo Lesa.

⁴⁹ Bino, mwamona, “Aye utuma mvula,” tubwele ku mutwe wetu, “pa baoloka ne pa babula koloka.” Yesu ubena kwimubula papo, mu Mateyo 24, amba kikekala kiyukilo mukimye kya kumpelo.

⁵⁰ Pano, inge akye kiyukilo kikayukanyikwatu mukimye kya kumpelo, nishi kyafwainwa kwikala mukimye kya kunshikula atwa Tutetesho. Mwamona? Ke kiyukilo kya kumpelo. Akyo byokiji, mukimye abye bintu pobikamweka, kikekala mukiye kya kumpelo. Kabiji kikekala ke kiyukilo, bino, pakuuba mba Basalululwa bakabule kulubilamo ne. Mwikimona nyi? Nanchi, kyafwainwa kusololwa, kuletwa patoka.

Monai, byonse bibiji wichi ne seku bikala na bumi kupichila Mukunshingwa kufuma Mwiulu. Byonse bibiji bisangalala namambo Aako.

⁵¹ Navuluka kikyeye, kubwela kutazha ku kyokya kya mwekele ku Green’s Mill. Ami—Ami namwene akya kimonwa. Kabiji kwajinga ntanda yabaya bingi, kabiji yonse yabikilwe paselechi. Kabiji kwaile wa Kubyala nkunwa, patanshi. Nasaka kubika kyokyo kwi anweba. Monai kitanshi kya kutangilapo, nanchi kyakulondelapo kyo kika. Kabiji awa Mwanamulume wawwajile kitoka waishile kuzhokoloka ntanda, na kubyala nkunwa, nanchi kunyuma Yanji kwaishile mwanamulume, wawwala bifita, wamwekele nobe ubena kubomboloka, nakufyamuzhuka panyuma Yanji, saabyala nkunwa. Kabiji akye byo kyaubilwe, nanchi Namwene byonse bijimwa bibiji bya lupuka mumunshiji. Kabiji byo bya lupukile, kimo kyajinga wichi kikwabo kyajinga seku.

⁵² Kabiji kwaishile kyaanshi, kya kuuba mba, kyamwekele nobe, byonse bibiji byajinga bya kunyika mitwe yabyo na kujijila mvula. Nanchi kwaishile jikumbi jikatampe jakumbeene pantanda, kabiji ne mvula ya nonkele. Kabiji wichi waimene ne kwaamba mba, “Nkambo Atotwe! Nkambo Atotwe!” Kabiji ne seku nayo yaimene ne kubijika mba, “Nkambo Atotwe! Nkambo Atotwe!” Mwafuminetu mukumbu umo. Bonse babiji baonaikilenga, bonse babiji bailenga. Kabiji nanchi wichi waishile waikala na kilaka. Kabiji mambo bajinga mubujimi bumo, bujimi bumo, mpuzha imo, ne meneno imotu, kwaishile wichi kabiji kwaishile ne seku mujishinda jimotu. Monai, kushingwa kumo kuleta meema kokukomesha wichi, kokukomesha ne seku.

53 Aye Mupashi Wazhila umotu yeka ushinga Kipwilo, akyo kibapa kilaka kya kupulusha myeo, akyo kibapa bulume bwa kwingila bya kukumya, Inonkela pa babula koloka ne pa baoloka. Aye yeka Mupashi umotu! Bino, kuuba mwikyubila mujinda jikwabo kabiji mwaunvwisha mwaila Mateyo 24:24 ne. Aye waambile mba, “Kukeya ba Kilishitu ba bubela,” babubela, bashingwa manyi. Bashingwa na kintu Kyakine, pakuuba bangauzhi babubela ba Kikye, bafunjishi babubela ba Kikye.

54 Kika kya konsha kulengela muntu kukeba kwikala mufunjishi wabubela wakintu kya Bukine? Pano tusakuya ku kiyukilo kya lukinyama mu mamineti acheche, kabiji mwakonsha kumona mba ke dinominesheni. Mwamona? Bafunjishi babubela; bashingwa babubela. Bakilishitu Bashingwa, bino bafunjishi babubela. Jojokatu jishinda jo mwakonsha kwikimwenamo.

55 Kijitu pamo nobe kuno kimye kya kunyuma, Nekyaambapo kala. Nakonsha kwi kyaambapo mambo twanungakana pawaleshi na kyaalo kyonse. Juba jimo naambilenga ku mutemwe wami, ako kookibena kwiya lukeelo luno, mu Arizona. Kabiji wajinga na—na bujimi bwa bipangwa. Kabiji wajinga na kinchi kya maolingi akyo kyajinga na bipangwa bya manglepu, ne mandema, tangalini, matangelo. Kabiji Nalubamo kana ku kyookya kinchi kwajinga bipangwa bya pusanapusana biinga ku kyookya kinchi kimo. Kabiji Namwambijile awa—awa—mwanamulume, Naambile namba, “Kiji byepi? Ng’anyi kinchi kyo?”

Aye waambile mba, “Akye kinchi, akyo kine, ke kinchi kya jiolingi.”

Naambile mba, “Kika kyo kyaikela na bipangwa bya magelepu? Kika kyo kyaikela na malemoni?”

Aye waambile mba, “Abye bebisokankanyamotu mwi akyo.”

56 Naambile mba, “Namona. Kyawama, pano,” Naambile mba, “pano, mwaka wiya akye kinchi byo kikapanga bipangwa bikwabo,” byonse byo bipilatu pa kimye kimo, Naambile mba, “nishi byonsetu bikapanga maolingi. Inge kinchi kya maolingi anakuka kukikotolo, kikapanga musango umotu wa maolingi, kechi ibyo nenyi, mwane?”

Aye waambile mba, “Ine, mwane. Yense musapi yebasokankanyamo ukapanga mwaila musango wakyo.”

Naambile mba, “Mwatazha mukuuba mba kinchi kya jilemoni kikapanga malemoni kufuma ku kinchi kya jiolingi nyi?”

Aye waambile mba, “Ee, mwane.”

“Bushe kinchi kya magelepu kikapanga bipangwa byamagelepu saakiji ku kinchi kya jiolingi nyi?”

Aye waambile mba, “Ee, mwane. Ao ye musango wa musapi ye basokankanyamo.”

Naambile mba, “Les a totwe!”

Aye waambile mba, “Wikitazha muka?”

Naambile mba, “Jimpuzho jikwabo jimotu. Pano, bushe akya kinchi kya jiolingi kikapangapo jibiji maolingi nyi?”

⁵⁷ Aye waambile mba, “Umwwe kyamena musapi mukwabo.” Inge *kya* mena musapi mukwabo, kechi kuyewa ye basokankanyamo ne. Bino, byonsetu ke binchi bipanga bipangwa, kabiji abyo biji na bumi bwa bipangwa abo butanwa mubichi bya bipangwa.

⁵⁸ Naambile mba, “Abyo byo kiji! Abo ba Methodist bakasema bama Methodist, kimye kyonse. Abo ba Baptist bakasema bama Baptist, kimye kyonse. Abo ba Katolika bakasema ba Katolika, kimyetu kyonse. Pakuba Kipwilo kya Les a mumi kikasema Kilishitu kufumatu ku mizhazhi, Kyambotu kimye kyonse, inge kya mena musapi mukwabo wakyo Akyokine.”

⁵⁹ Bino, mwakonsha kwi kisokankanyamo, mwamona. Kyonse kipangwa kya magelepu, lemoni, matangelo, tangalini, nangwa bikaletu bipangwa bya musangoka, kyonsetu kya konsha kwikala mu kyokya kinchi; bino nsakiji na bukamonyi bwabubela pa kyokya kinchi, nsaakibena kwikala moka mukinchi. Mwikimona nyi? Abo babena kwikela ne kunonkelamo mubumi bututulu bwa kokya kinchi.

⁶⁰ Pano, kuji Mateyo 24:24, kwikala na Bumi bumo, bino nsababula kulumbuluka, kufumatu kutatwilo yabo. Abo banji na bukamonyi bwa bubela bwa kyokya Kinchi! Ke kinchi kya jiolingi, nangwa byokabyo ke kinchi kipanga bipangwa. Kabiji abo baamba mba, “Akye kipwilo, aye dinominesheni inji na bukamonyi bwa kwa Kilishitu.” Kabiji banji nalubatizhilo lwabubela, bukamonyi bwa bubela bwa Kyambo, akwe nsabamba mba bulume bwa Les a bwajingatu bwa batumwa?

⁶¹ Yesu, Aye mwine, waambile mba, “Yainga panopantanda na kusapwila Mamboawama ku musapi yense awa... kinchi kyonse kikasapuka, musapi yense uji kukinchi. Kabiji abye biyukilo bikebalondelanga misapi yakine.” Kwepi? Kikulutu Kinchi, kikulutu Kibena kusapuka misapi, kufika ne kumpelo ya panopantanda. “Mu Jizhina Jami bakapangilamo ba demona; ba kaamba na jimi ipya; bakatola miloolo; bakatoma bifwana; bakabika maboko abo pabakolwa kabiji bakabukwa.” Mwamona kimye kyo tubena kwikalamo nyi? Mwamona bya aambile Yesu nyi?

Vulukai, akye kyajinga kimye kya kumpelo, kechi kunyuma akwa mukimye kya kwa Wesley ne kabiji kuyatu ne kunyuma kwine. Pakuba, mu kimye kya kumpelo, abye byafwainwa kufikizhiwa.

⁶² Bino monai Binembelo; abo Balekai bapaane lushimuno. Yesu waambile mba, “Mukebakeba mu Binembelo, mambo mwi Abyo mulaguluka mba, nangwa mwaketekela, amba momo tumwena Bumi Bwamyaka, nachi Ibyo Bibena kunshimuna Amiwa.” Mung’ambilo ikwabo, inge akye kinchi kyasapuka musapi mukwabo. . . “Amiwa ne Kinchi, kyo Kinchi; anweba mwi misapi. Aye wangitabila Amiwa, mingilo yo Ng’ingila ne anweba mukeyuba,” Yoano Wazhila 14:12.

Pano, “Aye wikala mwi Amiwa, aye wa. . . aye wajinga mumuzhazhi Wami kuntendekelo.”

⁶³ Oene mambo Yesu wajinga byonsetu Muzhazhi ne Kisaka kya Davida. Aye wajingako Davida saka akyangye kwikalako, waji mwi Davida, kabiji ne palutwe yakwa Davida, byonsetu bibiji Muzhazhi ne Kisaka kya Davida; aye Taanda Wakumakya, aye Loozi wa ku Shaloni, aye Kikwibu kya Mukipachiko, Alefwa ne Omenga; Taata, Mwaana, ne Mupashi Wazhila. “Mwi Aye moomwaikala kuyula konse kwa Bulesa mumubiji.” Byonsetu bibiji Muzhazhi ne Kisaka kya Davida!

⁶⁴ “Aye bo Bumi bwasalululwa, aye bo Bumi bwatongwejilwe jimo, abo buji Mwiami,” kabiji Aye kyo Kyambo, “kufumatu ne kuntendekelo; aye byo akeya, aye ukashimuna bipangwa Byami.” Yoano Wazhila 14:12.

Bino bakwaabo bakekela kukitukimo, saabeita abo bene mba Benakilishitu kabiji mba twi baitabila. “Kechi bonse baamba mba, ‘Nkambo, Nkambo,’ bakatwelamo ne.”

Bino, akye kikobiwa ne kumweka mumooba akumpelo, “kimye byafyamika bya kwa Lesa pobikapwa,” nobe byoka byo tusakufikako palutwe.

⁶⁵ Abye binchi, kinchi kya kine ne kinchi kya bubela! Mwang’umvwapo kala amiwa kusapwilapo kufuma ne kunyuma, myaka yapita kunyuma, byo byakomena pamo. Nebiletele mu umu umu ne kumwesa kyokyo, kufumatu kwi Kaina ne Abela, binchi bibiji byakumejile pa kitapisho; bonse babiji bajinga babupopweshi, bonse babiji bajinga bashingwa manyi, bonse babibiji bakebelenga bumi, kabiji ne kupopwela Lesa umotu. Pakuba umu bamukaine ne mukwabo bamwitabizhe.

⁶⁶ Kabiji jishindatu awa umu jo bamutambwijilemo ke mambo akuuba mba waubileko kyapusanako kufuma kumulongo waji: kya musolwejilwe. Mambo Baibolo waamba mba, “Ko kulwitabilo. . .” Bahebelu, kyapitala kya bu 11, “Ko kulwitabilo Abela ko alambwijile kwi Lesa kitapisho kyawama kukila kya kwa Kaina, momo ashimwijilwe kwi Lesa amba waji waoloka.”

Yesu, waambile mba, lumwekesho lwa bumupashi lwakuuba mba Aye Wajinga ng’anyi! “Nga bantu baamba mba Amiwa Mwaana muntu yami ng’anyi?”

Waambile mba, Petelo waambile mba, “Anweba yenu Kilishitu, Mwaana Lesa mumi.”

67 “Mwatokwa anweba, Shimona—Shimona, mwaana Yona; ke pakuba butushi bwa nyama ne mashi kechi bo bwimusolwelakyo ne. Ba Taata banji Mwiulu bo bemusolwelakyo. Pajonka jino jibwe Amiwa po katunga Kipwilo Kyami,” (kika?) lumwekesho lwakine lwa Kyambo. Akyo kyo Kinchi kyakiine ne jikwabo. “Abela, ko kulwitabilo!”

Mwajikwaamba mba, “Kechi kyajinga lumwekesho ne.”

68 Lwitabilo kyo kika? Lwitabilo ke kintu kyo bakusolwela; akyo kikyaangye kumweka, bino nangwa byokabyo waketekala mba kikobiwa. Lwitabilo ke lumwekesho lwa kyaswa muchima wa Lesa. Nanchi, ko kulumwekesho!

69 Kabiji bipwilo bya leelo kechi bya ketekela ne mulumwekesho lwa bumupashi ne. Abo baketekelatu mumafunjisho a maana a ndoonda ya tachikilo imo. “Ko kulumwekesho Abela ko alambwijile kitapisho kyakila mukuwama kwi Lesa kukila kya kwa Kaina, momo ashimwijilwe kwi Lesa mba waoloka.” Amena. Naketekela mba mwikimonakye. Monai kimye kyo tubena kwikelamo? Mwamona kimye?

Nesambilenga na—na shetu umo bibye kechi papita kimye kyabaya ne, wafunda masukuulu a Bwinakilishitu kabiji shetu. Aye waambile mba, “Mr. Branham, twakaana lumwekesho luji lonse.”

Naambile mba, “Nanchi mwafwainwa kumukana Yesu Kilishitu, mambo Aye ye lumwekesho lwa Lesa, Lesa wasololwa mu bumuntu.” Kanatu mwikimona, inge ne mwalubilamo.

70 Yesu waambile mba, “Inge ne kungitabila amba Yami Iye ne, mukafwila mu bubu bwenu.” Aye ke lumwekesho lwa kwa Lesa, Mupashi wakwa Lesa wisolola mu bumuntu. Inge ne kwitabila kyo kyo ne, anweba mwa lubilamo. Anweba Aye mwamubika ke muntu wa busatu, muntu wa bubiji, nangwa ke muntutu mukwabo kulubanja lwa kwa Lesa, nishi mwalubilamo. “Inge ne kungitabila amba Yami Iye ne, mukafwila mu bubu bwenu.” Ke lumwekeshotu!

71 Oene mambo Aye kechi bamumwene ne. “Kapaji muntu nangwa umo wiya kwi Amiwa ne kana Ba Taata bamukoka. Kabiji bonse bobapa Amiwa ba Taata,” mu mizhazhi, “bakeya kwi Amiwa.” Mwamona? Mwikyumvwa nyi? Oo, byo twakonsha Kumutemwa, kumufwalamo Aye, kumutakaika Aye; monai kipangwa kya Mupashi mu moba akumpelo, kabiji ne Kinchi kya Bumusongwa ke kipye pooka penepene pa kufikila kwa kimye!

72 Akya kinchi kya bukiine ne kinchi kya bubela, byonse bibiji biji na kushingwa kumo. Aa meema anokejile pa byonse bibiji.

Oene mambo Aye kyo etujimwijile kuuba mba, “Bakajimbaika boka Basalululwa inge kya konsheka kubiwa.”

Monai, bamwekatu mwekelo imo. Abo bashingwa manyi pamotu. Pakuba monai, “Ko kubipangwa byabo...” Mukebayuka byepi?

⁷³ Mwakonsha kuyuka byepi amba aje kechi jilingi ne? Mambo kyapanga bipangwa bya magelepu. Akya kinchi kijitu bulongo, kya ikela bumi moka mukinchi, bino kyapanga kipangwa kya magelepu. Kechi kiji pamo nobe kyookya kyaji kitanshi ne.

⁷⁴ Kabiji inge kipwilo kyaamba mba abo “baketekela Yesu Kilishitu kwikala pamontu kesha, leelo, ne myaka yonsetu,” kabiji ne kukana Bulume Bwanji, kukana mingilo Yanji, kukana Kyambo Kyanji; inge—inge... Akye Kipwilo kya ketekela mwi Yesu Kilishitu, bakengila mingilo ya kwa Yesu Kilishitu, ki kekala na Bumi bwa Yesu Kilishitu. Kabiji inge kyabula kuuba byoabyo ne, kechi oene mambo ne nangwatu umvwe Bumi bubena kupomokela moka, inge kechi kyatongwejiwe jimo ne, kufunatu ku mizhazhi, kimye kyonse kikapangangatu kipangwa kya magelepu, nangwatu kintu kikwabo kya pusanako. Pakuba inge Bumi bwakyo bwatongwejiwe jimo, moka mumizhazhi, ki kapanga Yesu Kilishitu ye umotu kesha, leelo, ne myaka yonsetu, inge kyo Kyambo kibena kwiya kupichila mu Muzhazhi. Akyo, Aye ye Muzhazhi, yo ntendekelo ya kimye.

⁷⁵ Monai, pano kiji ku byooby byo balupula byo bimweshwa lupusano. “Ko kubipangwa byabo,” Yesu byo aambile mba, “mu kebayukila.” “Muntu kechi wapa magelepu kufuma ku mwiiba ne,” nangwatu awa mwiiba uji mukachi ka kinchi kya magelepu. Akyo kya konsheka kuubiwa, pakuba kipangwa kikabulang’ana.

⁷⁶ Nanchi kipangwa kyo kika? Kyo Kyambo, mambo akyo ki...kipangwa kya mukimye kyakyo. Akyo byoabyo kiji, lufunjisho lwabo. Alo lufunjisho lwa byepi? Ke lufunjisho lwa kimye, kimye amba kiji byepi. Lufunjisho lwa muntu, lufunjisho lwa dinominesheni, bino, nangwa mba Kyambo kya Lesa kya mukimye?

⁷⁷ Pano, bimye bibena kupwa bingi lubilo, kya kuuba mba twakonsha kubanda pakyokyo. Bino Naketekela kuuba mba kine anweba mwatanwa kuno, kabiji Naketekela kuuba mba neanweba bonse mwazhokoloka ntanda, mwakonsha kumona kyo Mbena kweseka kwi mubula, mambo kechi tuji na kimye kyabaya kya kubanda pakyokyo ne.

⁷⁸ Bino mwakonsha kumona mba Kushingwa kufikila ne pa babula koloka, bafujishi babubela, kabiji kibalengela kuubatu kyookakya Lesa kyo ebakanya amba kechi bafwainwa kwikyuba ne; bino abo be kyuba, nangwatu byokabyo. Kika? Abo kechi bakonsha kwikikwasha ne. Bushe mwiiba wakonsha kwikala kintu kikwabo nyi kanatu mwiiba? Nangwatu mvula wabaya

byepi wibanokela, aye ukekalatu mwiiba. Oene mambo Yesu kyo aambijile mba, “Abo bakekalatu pepipepi kya kuuba mba bakajimbaika boka Basalululwa,” abo banji mu mizhazhi, “inge kya konsheka kubiwa,” pakuba kechi kya konsheka ne. Wichi kafwako nangwa kimo kyo akonsha kuuba ne kanatu kulupula wichi; byo byoka byo akonsha kusema.

⁷⁹ Monai. Vulukai, Lesa kechi yotatwilo ya tubungwe ne. Aye diabola yotatwilo ya tubungwe. Nanshinikisha kyokyo kupichila mu Kyambo, kuya kulutwe ne kunyuma, ne kupitulukamo jikwabo ne jikwabo; kechi tusakuya mukyokyo lukeelo luno ne. Twayuka mba Lesa kechi ubungizha kutula bantu pamo muyewa musango ne, kulenga kabungwe. Myaka maaduleendi yapichilepo kufuma pafwijile mutumwa wapeleleko, saka kuyangye kwikalapo kabungwe katanshi ne. Kimye kyonsetu kyaikala kya kukakalwa. Inge kechi byo kinji ne, kika kyo twabujila mu butemwe leelo, ba Methodist, Baptist, Presbyterian, Katolika ne bonsetu? Kika mingilo yakwa Lesa ibena kubula kwitulondela, nanchi, kipwilo kyonse kijitu pa kintu kimo, ke Kyambo? Abyo bintu byonse byabanya bantu, buumo bwa bulongo. . . Twaishatu palepa na Lesa kukila ne byo twajinga kunyuma, bipwilo, kwaamba pa kyokyo.

⁸⁰ Pano, twabilwa mba, “Bintu byonse byakala bitumwekejile ke bya kumwenako, bya lufunjisho lwetu, ne kwibalengulula, ne kwibafunjisha mu bololoke.” Amba bintu bya kala bya mu Lulayang’ano lwa Kala byamwekele, bya ikele ke bivule, pakuba mba abya biji Mululayang’ano Lupya, mujuba jetu.

⁸¹ Kya kuuba mba kechi mwakimonapo kuboko kwenu ne, kabiji mwatala peulu ne kumona kivule pa kibumbulu, byokatu bya konshe kwikala kuboko kwami kufuma ku kyeya. Inge kunji na minwe itanu mu kivule (mukyabula kituntulu), kabiji mwaendesha kuboko kwenu kutwala (mukine kituntulu), kuya ku—kuya ku kyabula butuntulu, kyafwainwa kwiya ku minwe itanu.

⁸² Byoka bitubula Baibolo, kuuba mba, “Alo Lulayang’ano Lwakala ke kivule, ke kipasha kya bintu bipya, nangwa mba abya bintu bikeya; kechi abyo byo bine bintu ne, pakuba ke kivule, ke kipasha kya bintu bikeya.”

⁸³ Twayai tubwele kunyuma ne kumona kana abye bintu byajingako mu nkulo ikwabo. Anweba mwikiswisha nyi? [Kipwilo kyaamba mba, “Amena.”—Waku.] Pakuuba mba tuyuke, kushinikisha kikyeye, kuya kulutwe ne kunyuma, kupichila mu Kyambo; kechi kupichila mumilanguluko ya muntu ne, nangwatu nobe bya ketekela muntu ne.

⁸⁴ Kechi oene mambo ne nangwatu ye ng’anyi; muntu mukwabo, amiwa mwine nangwatu muntu mukwabo, “Inge waamba mwabula kwaambila mizhilo ne bangauzhi, kechi muji Kyeya mwi aye ne.” Mwamona? Abyo byo byaamba Baibolo.

“Kwaamba konse kwa muntu kwikale kwa bubela, kabiji Kwami kwikale kwakiine,” nangwatu kikale ye ng’anyi.

Pano twayai tubwele kunyuma kabiji tumone kana abye bintu bya ubilwepo, pakuuba mba kikale kya kumwenako.

⁸⁵ Twakonsha kuya mu Buuku wa Kulupuka, ne kwambapo pa muntu umo utelwa mba Mosesa, ao wajinga washingwa ngauzhi watumwa na Lesa, na Kyambo kya Lesa kabiji ne kyaswa muchima wa Lesa kya munkulo yanji. Byokatu Kyambo kya Lesa byo kyenda mukutwajijila, Waambile mba, “Aye kapaji kyo oba ne kana patanshi Aye wi Kisolola ku bangauzhi Banji.” Nanchi Aye poopoo ekyubile. Uu-uu.

Pano, Aye kechi wakonsha kubepa ne. Aye kuuba wabepa kabiji waikala Lesa ne. Ine, mwane. Aye wafwainwa kwikalatu wabukine. Mwi Aye kechi mujipo bubela ne. Aye ye. . .

⁸⁶ Kabiji Aye kuuba wi Kikingya ne. Inge Aye wi kyuba, nanchi Aye kechi ke Lesa ne; Aye nishi walengele kilubo. Aye wafwainwa kwikala wabula mpelo ne. Kabiji ubula kumpela kechi wakonsha kuuba wauba kilibo ne. Mwamona? Nanchi kyonse Lesa kyoaamba, akyo kikala kyawaina Peenape. Mwamona? Kabiji Aye walaile mba. Nanchi, talai, kechi kujipo pantu pamo mu Baibolo ne kanatu bilondela mu kutwajijila.

⁸⁷ Bino, Lesa walaile Abulahama mba lukunwa wanji ukekala bwenyi mu—mu ntanda ya bwenyi pa myaka foo aduleendi, kabiji amba Aye ukamulupulamo na kuboko kwa ngovu ne bulume, kumwesa biyukilo Byanji ne bya kukumya mukachi ka bantu bobekala nabo. Kimye kya mulaye kya fwenyene ke pepi. Bantu be kilubako ne kwi kilubako. Abo banjinga na Bafaliseo ne Basanduseya, kabiji ne bakwabotu, madinominesheni. Bino, pookapotu, Lesa byo aishile bukebwaji ne kwifumya, kwifumyako, kufuma kwi abo bonsetu.

⁸⁸ Lesa ukyangye, mujuba jiji jonse nangwa kimye kiji kyonse ne, kyo aichilepo ngauzhi kufuma mu dinominesheni. Ine, mwane. Aye wazhobakana bingi, kuuba wikyuba ne; aye wafwainwa kwikala nayeo dinominesheni.

⁸⁹ Mosesa, muntu watuminwe kufuma kwi Lesa, na Kyambo kya Lesa, kabiji palwendo lwanji lwa kutwala Isalela muntanda ya mulaye, wanji waimenatu pa mikambizho ya kwa Lesa, po akumenye ngauzhi mukwabo, mukwabo washingwa manyi ao wajinga na kushingwa manyi kwakiine kwa Mupashi Wazhila ako kwajinga ne Mosesa. Abyo ibyo. Aye wajinga ngauzhi. Aye Mupashi Wazhila wajinga pa yuwe muntu. Jizhina janji wajinga Balamu. Atweba bonse twamuyuka. Kyawama, bintutu bimo, bimotu, bintu—bintu bimo byo aambile awe muntu, bibena kukimweka, pepi nobe tweti-eiti aduleendi myaka kunyuma yapitapo. “Obewa uji pamo nobe mbogolo, Obewa Isalela. Yense ukakupesha ukekala wapeshiwa. Yense ukakufinga ukekala wafingwa mafingo. Bulume bobo, ngovu, byo mwaikala bololoke

mowaikala, Obewa Yakoba!” Mwamona, aye kechi wajinga na kyukuba ne. Aye waishile kookwa na milanguluko mu muchima wanji ya kwibafinga aba bantu.

⁹⁰ Oo, aanweba bafunjishi babubela mubena kuteleka ku ao matepu pa yonse ye myaka, kabiji nsamumona Lesa kushinikisha kyo Aambile, kabiji mwikala na kutanga kabiji ne kuyuka mwayuka mba kya Bukiine; kabiji na mambo alupusano lwa madinominesheni, mwibapachika ne kwibabula bantu benu amba kechi byo baji ne. Malwa enu anweba! Kimye kyenu kyafwenya bingi pepi.

⁹¹ Balamu, washingilwe manyi na Mupashi umu yeka wajinga pe Mosesa. Ngalupusano lwajinga pepi? Lufunjisho lwa kwa Mosesa lwajinga lwa lumbuluka. Aye Baibolo waamba paapo mu Petelo wa Bubiji, amba lwajinga “lufunjisho lwa kwa Balamu” lwatambwile Isalela, alo Lesa loabujile kulekela mambo. Mambo abulwa kulekelwa! Kechi pajipo nangwa umu wapulikile ne, nangwa balupukile na mapesho akwa Lesa, kabiji ne kumona kuboko kwakwa Lesa kwa endelenga kupichila muyuwe ngauzhi wabulume, kabiji be kumwene kushinikishiwa na Lesa. Kabiji, mambo, mukwabo ngauzhi waishile nalufunjisho, lwapusanako, kabiji wipachikilenga ne Mosesa, kabiji waesekele kushinina bantu amba Mosesa waya mungi. Kabiji Datamu, Kola, ne bakwabotu bavula, baswang’ene nanji kabiji bafunjishe baana ba Isalela kuuba bulalelale, pakuuba mba baye kukako kabungwe, amba, “Bonse tujitu pamo.”

“Nangwatu twi ba Methodist, Baptist, Presbyterian, nangwa ba Pentekosito, kabiji nebikwabo-byavula, amba bonse tujitu pamo.”

⁹² Kechi tuji pamo ne! Mwi bantu ba abanwa, bazhila kwi Nkambo, be paana ku Kyambo ne ku Mupashi wa Lesa, mu kupanga bipangwa bya mulaye Wanji wa kino kimye. Kabiji kechi wiumo wa mwiabo ne! Nayuka mba akyo kya konsa bingi, bino akyo bo Bukiine kijitu pamo. Bepaana kumwingilo muano moba akumpelo! “Fumaimo mwi akyo.”

⁹³ Bino, “lufunjisho lwa kwa Balamu,” kechi bungauzhi bwa kwa Balamu ne. Abo bwajingatu bulongo. Akya kyajinga Lesa. Baanga baketekela kyokyo? [Kipwilo kyaamba mba, “Amena.”—Waku.] Bungauzhi bwa kwa Balamu bwajingatu bulongo, mambo kechi waambilepo kintu kingi ne. Kushingwa kwa manyi kwakwa Lesa kuuba kwaamba kintu kingi ne, kabiji Lesa wikishinikishe amba kyajinga Bukiine. Pakuuba kyajinga “lufunjisho lwa kwa Balamu.”

Pano esekanyai kyokyo na Mateyo 24:24. Bashingwa manyi, bino lufunjisho lwabo lwabubela. Aba baketekela mubalesa basatu, ne bintu byonse muyekao musango; baya mungi, antkilishitu!

⁹⁴ Naketekela kechi nsakukozha muchima wenu ne. Kabiji kuzhimya byo byo, ao mafoni kwi azhimya ne. Kabiji kwimana ne kulupukamo ne. Anweba ikalaitu, kabiji tumone kana Mupashi Wazhila usa kwitusolwelakyo, kabiji mwi kishinikishe kwi atweba. Kwaamba mba, “Bino kuuba mba. . .” Kyonsetu kyo mwaketekela, ikalaitu na kuteleka. Kabiji impuzhai Lesa ashinkule muchima wenu, nanchi poopu musakutana kana wimwiiba, nangwatu kisonsonya, nangwa posetu pomwaimana. Mwamona?

⁹⁵ Bino, nangwatu Yudasa, “watongwejlwe jimo kuluzhachisho,” waikela kulubaji lwa Yesu. Kabiji Yesu waamwambijile, “Yobe iye. Kyonse kyo mukooba, kabiji kyonse kyo mwa konsha kuuba, yanga wikyube bukiji bukiji.” Aye byo ayukile kyo aubilenga, bino, pa mambotu amasiliva makumi asatu, ne kuyukanyikwa, wapoteshe Nkambo Yesu Kilishitu. Umo wa baana babwanga Banji, kalama wakipao kya kipwilo, Yesu wamutelele mba Waanji “mulunda.” Mwamona? Aye Baibolo waamba mba, “Aye wasemekelwe mwaana walonaiko,” pamo nobe byoka Yesu byo asemekelwe Mwaana wakwa Lesa. “Kujimbaika bonka Basalululwa inge kya konsheka kubiwa.”

⁹⁶ Mweshai bulongo byo tubena kufunda. Tusakutola kintu kikwabo, mu Buuku wa Bamfumu. Kwajinga umo—umo ngauzhi, ne jizhina janji jajinga Mikaya. Aye wajinga mwaana Imula, kabiji wajinga ngauzhi. Aye byo ajinga.

⁹⁷ Kabiji kwajinga ngauzhi mukwabo, tangi wa kipamo kya bangauzhi, bashingwa manyi. Aye Baibolo waamba mba bajinga “bangauzhi,” byoka byo Aamba mba Balamu wajinga ngauzhi, bashingwa manyi.

Kabiji kwajinga umo mwiabo wa jizhina ja Mikaya, ao washingilwe manyi kwi Lesa kabiji watuminwe na Lesa, na Kyambo kya Lesa.

⁹⁸ Kwajinga umo, Zendekeya, ao walangulukile mba watumwa kwi Lesa. Aye ashingilwe manyi kwi Lesa, bino lufunjisho lwanji lwajinga lwapusanako na Kyambo kya Lesa. “Imanai, ba Kilishitu babubela, bakamweshwa biyukilo bikatampe, kabiji bakajimbaika Basalululwa inge kya konsheka kubiwa.”

⁹⁹ Monai, bonse babiji, bonse babiji bajinga bashingwa manyi. Bino, mwakonsha kuyuka byepi uji bulongo, ne wabula kwikala bulongo? Monai Kyambo byo kyalaila kwi Ahaba. Ngauzhi wajinga kunyuma yanji, ao wajinga Elaija, umo ngauzhi mukatampe wa muyoya nkulo, awa wajinga ngauzhi washinikishiwa. Awa ngauzhi washinikishiwe waambile, mba, “Mambo Ahaba wauba bubwe bubi, kuuba mba bakabwa bakamyanga mashi anji; pa konauna bumi bwa kwa Nambofi. Kabiji mba bakabwa bakamuja Yezebeli, kabiji. . .ne mubiji wanji ukekala ke mufundo wa mumajimi.” Bino, wakonsha kupesha byepi kyo ayinga Lesa? Nangwa wakonsha kufinga

byepi, byoka bya ambile Balamu, akya Lesa kyo apesha? Mwamona?

¹⁰⁰ Bino abo bangauzhi bajinga na bukinshika. Kechi kyajinga kya kuzhinauka ne amba bajinga bantu bawama, bantu bamushingi. Mambo, pakuuba mba ekale ke ngauzhi mu Isalela, wafwainwa kwikala wamushingi, nangwatu pakuuba mba wikale Mwinaisalela. Bakwasa mabwe, inge ne. Bajinga bantu bamushingi. Bajinga bantu bajimuka. Bajinga bantu bafunda. Bajinga basalululwa kwi Ahaba, ba mukyalo. (Mwamona kyokyo, Nyenga Wright?) Abo basalululwa bamukyalo, bafikilamo bulongo kwi- . . .

Kabiji pano, Mikaya byo amwene kimwesho, wayukile mumuchima wanji bya aambile Kyambo, bino aye wakebelenga kumona Mupashi wajinga mwi aye byo akonsha kwamba.

¹⁰¹ Nanchi bamubujile, ba aambile mba, “Obewa waambe kintu kimo kyaambapo babo bangauzhi. Kabiji umvwe wauba kyokyo, kika, ukekala, tukakutola ukekale mulumvwang’ano lwetu, kwa kubula kuzhinauka ne, ne jikwabo. Mwamona? Tukakwalula ke umo wamwiatweba. Tukakubwezha mudinominesheni yetu. Anweba muji. . . Twayuka mba obewa wingauzhi, bino kimye kyonse wambatu bitu bya mafingo. Obewa kimye kyonse ufingatu Ahaba. Pakuba, Zendekeya, wajinga tangi, aye papa, nangwa mba. . .” mumusango yense ye ajingamo. “Pano aye wapesha Ahaba, ne kwaamba mba, ‘Yainga mukeyyube.’ Pano wambe kintu kimo, Imula. Kika, wi muntu muyajitu. Obewa kechi ujipo na kipwilo ne, ufwakyo, nangwa pachechetu ne. Kabiji abo bantu banji na mamilyoni. Ntanda yonse iji kulubaji lwabo. Pano obewa wambetu bintu bimo byooka byo baambapo, umone byo ukoba, obewa—obewa ukajanga byawama bya muntanda.” Ukena kwaamba ku muntu ungi poopa!

Pano ibyepi inge kyaambilwe mba, “Bushe watanamo kilubo kiji kyonse mwi Zendekeya nyi, Mikaya?”

“Ine.”

“Bushe wamutaine mu bubi nyi?”

“Ine.”

“Bushe wakimumvwapo saabena kufinga muntu uji yense nyi?”

“Ine.”

“Bushe wakimutanapo wantoma nyi?”

“Ine.”

“Wakonsha kupachika na mambo akufunda kwanji nyi?”

“Ine.”

“Bushe waketekelaa mba dingili ya bundokotala bwanji bwa bubela nyi?”

“Ine.”

“Waketekela mba yaji—yaji Ph.D. ijitu bulongo nyi?”

“Kine. Mwaila kinje kya Saniendilini, Naketekela mba kijitu. . . kinje, Naketekela mba kijitu bulongo.”

“Kyawama, nanchi, kika kyo wabujila kukwatakana naji?”

“Mambo wafuma mu Kyambo!”

¹⁰² Kyawama, tukekala nakyo mukubekya, nanchi, nobe Elaija ngauzhi wajinga panyuma yanji. Kabiji umvwe wi mwaana Lesa, obewa ukekala na ngauzhi wayuwe Baibolo. Ke Kyambo. Monai kimye, kimye.

Kyawama, pano inge Zendekiya waambile mba, “Oo, Nayuka mba ngauzhi waambile kyoooky, bino akyo ke kya kisemi kya kulutwe. Akyo ke kya kimye kyalepa kiji kulutwe kufuma pa kyo kino kimye?”

Aye waambile mba, “Pembelelai poso Mone kimonwa kya kufuma kwi Lesa, kabiji nanchi popo Nsakwimubuula.”

Waambile mba, “Nanchi obewa waambe kintu kimo?”

Aye waambile mba, “Amiwa nsakwambatu kyaamba Lesa; kafwako kikwabo ne, kafwako kya kubikako ne. Amiwa kechi nakonsha kunungako kyambo kimo ku Kyokyo ne, nangwatu kufumyako Kyambo kimo ku Kyokyo ne.”

Nanchi abwa bufuku, mu milombelo, Nkambo waishile kwi aye mu kimwesho. Aye walupukile lukeelo lwalondejilepo, waambile mba. . .

Kuji bangauzhi babiji!

¹⁰³ Muntu wakila mumunema muntanda, mu mazhita amakondo ne mukyalo kyonsetu, wajinga Zendekiya. Aye wajinga ngauzhi tangi, mwaila bamfumu. Aye wajinga tangi wa bangauzhi bakwabo, mwaila kabungwe. Aye wabikilwe, mukabungwe kanji, tangi wabo bonsetu; kapepo ye wakijile mukutanga, wakijile mukufunda, ye wafikijilemo muyewa mwingilo. Kabiji washingilwe manyi na Mupashi Wazhila, mambo aye watelwa mba “ngauzhi.” Kine, kechi wajingatu ngauzhi ne, wajinga ngauzhi wa Kihebelu. Pano mumonai.

¹⁰⁴ Zendekiya waambile mba, “Aye Nkambo waji kwaamba kwi amiwa, ‘Amiwa Ndengelai masengo abiji a kyela kya kapotwe,’ ke kiyukilo.” Ngauzhi kimye kyonse upana masimbo. “Aye waambile mba, ‘Lengai ao masengo a kyela kya kapotwe.’ Aye Mupashi Wazhila waji kung’ambila mba, ‘Tola ao,’ aa Manyi apesha amiwa.” Kechi mulanguluke mba akitapisho ne, bino ke kutwezhamoto kintu kimo. “Aye Mupashi Wazhila awa waamba mujimi mwi amiwa, Awa wa nshinikisha amiwa, Aye waambile mba, ‘Tola ao masengo, kabiji, mu ao, bulai mfumu amba ukapangamo bena Silya kufuma mukyalo. Kabiji Kamubwezhezha ntanda ayo iji kulubaji lwabena Isalela, kyo kipwilo.”

¹⁰⁵ Mulongo, akyo kijintu bulongo mwaila ndoonda, kijitu pamo nobe Balamu byo ajinga kookwa. Balamu waambilengatu mu ndoonda byoka byajingatu Mosesa. Mosesa... Nambala yaitabilwa yakwa Lesa ke sebeni. Kabiji Balamu waambile mba, “Nshimikilai pa kusokela bitapisho sebeni; bitapisho sebeni byabulamo ndochi, bang’ombe, ne bamikoko balume.” Akyo kibena kwaamba namambo akwiya kwa Mwaana Lesa. Mwayila ndoonda, wajingatu bulongo nobe ba kwabo bonse.

¹⁰⁶ Kabiji awe ke Zendekiya, naye wajingatu mundoonda yaitabilwa bulongo, “Mambo ino ntanda yo yentu. Kika, abo bena Silya ne bena Filisitiya bajitu moka na kwikuta, ne baana babo kabiji ne bakwobotu, balwanyi bentu, na kanjo ako baana betu bekala kwakubulako! Bino, Lesa witupele ino ntanda!”

¹⁰⁷ Mulongo, ayo ke milanguluko yawama. Naketekela wabijikilenga kyokyo kumeso abena Isalela, kabiji bakonsheshe kubijika na mawi akatampe. Bino, Mbena kwaamba pa buleelo. Naketekela mubena kundondela. Nakubijika konse, kupanga kyongo!

¹⁰⁸ Mwavuluka Davida japa Mulungu japita? Mwamona? Anweba mubena kuteleka pa waileshi, nangwa anweba muji pa kunungakanya-kwa mafoni; kechi mwaumvwinoko Mbila ya pajapita ja pa Mulungu ne, mumone mba kine mwi iteleka. *Kweseka Kumwingijila Lesa Kwakubula Kupewa Saambu Ya Kwikyuba Ne*, nangwatu kimweke bukishika byepi, kyawama, kinetu kechi kitambwiwa na Lesa ne. Mwamona?

Pano, apano Zendekiya, walangulukilenga mba ujitu bulongo.

Mikaya waambile mba, “Lekai ngimpuzhe Lesa.” Nanchi waishile lukeelo lwa londejilepo na ABYO BYOBYAAMBA AYE NKAMBO. Aye waesakenye kimwesho kyanji na Kyambo.

Pano umvwe waambile kwi Zendekiya amba, “Bushe wayuka byo aambile ngauzhi wa mu Baibolo mba kikamumwekela awe muntu nyi?”

¹⁰⁹ “Bino kechi kino kimye ne, mambo awe muntu ke muntu wamushingi. Aye ubena kweseka.” Kechi mukakalwe kumvwa kiky ne. “Aye ubena kweseka kupana ku kipwilo bintu byafwainwa kwikala mukipwilo. Aye ubena kweseka kubwezha bintu bya mu kipwilo,” kechi bintu bya Bumupashi ne; inge kyajinga byobyoy, aye inge wasukenya kyalo kyonse byoka byauble Elaija. Pano, ubena kweseka kwibapa bintu bya kumubiji, “Atweba tunji na bipe. Atweba twi kabungwe kakatampe. Atweba kotwalamata. Atweba bonse, anweba bantu bonse, anweba Mapolotesitati, bonse ba kwatakane ne atwba.” Uu-uu.

¹¹⁰ Tubena kwiya ku kyokyo mu kakimye kachechetu palutwe. “Atweba bonse twi balongo ne banyenga, nangwatu byokabyo.” Kechi byo kiji ne! Kunyuma kechi kwajingapo kabiji ne kulutwe

nako kechi kikekalako ne, na kine Kipwilo kitutulu kya kwa Lesa. Kuuba kya ikala byobyo ne!

¹¹¹ Monai, aye wamwene kimwesho. Kabiji nanchi waambile mba, “Lesa waambile kuji amiwa.” Pano, talai, awa muntu wajinga wakishika. Aye waambile mba, “Waambile mba, ‘Lengai ao masengo, kabiji muye ne kumeso amfumu ne kumundoosela ku muzhika,’” nanwga mba aya ntanda iji kufumina po baimene. “Ndoosa, kabiji akyo kisakwikala ke ABYO BYOBYAAMBA AYE NKAMBO, amba aye ukashinda kabiji ne kubwela, lushijilo lwa kipwilo.’ Mukebapaangamo!” Akyo kyawama bingi, kechi ibyo nenyi? Lukatazho lwajinga luka?

Akuno Mikaya ke eye. Waambile mba, “Pano panai bungauzhi bwenu.”

“Yainga! Bino Najikumona Isalela nobe mikoko, ya palang’enamo, yabula kafunga.” Yii! Byaikala byapusenamotu.

¹¹² Pano, anweba mwi kipwilo. Pano kyepi kiji bulongo? Bonse babiji, bungauzhi. Jishindatu jo mwakonsha kuyukilamo lupusano mwiabo, ke, kipesapesai na Kyambo.

Waambile mba, “Akye wikitanapi?”

Aye waambile mba, “Namwene Lesa nsaakala pa Jitanda.” Waambile mba, “Namwene kinje kya muzhokoloka Aye.”

¹¹³ Pano vulukai, Zendekiya aye waambiletu mba na mwene Lesa, ne aye, mu Mupashi umotu. “Namwene Lesa. Aye wambujile mba ndenge masengo kufuma ku—kufuma ku kyela kya kapotwe. Yainga mu kebifumyemo byalo biji muno, mambo abye biji kulubaji lwetu. Bakwabo kechi bajipo na sambu mukino kyalo ne.” Bafwanyijilwe inge baikele bulongo na Lesa. Bafwanyijilwe kwikala nakyo, pakuuba bafumineko kwi Lesa.

¹¹⁴ Abyo kabungwe byo kekala, kipwilo. Kinji nasaambu pabibye bintu, pakuba be mubepaika pa bibye bintu, mambo akufumako ku Kyambo kya Lesa ne ku Mupashi wakwa Lesa, kushingwa kwa manyi, pakuuba mba Kyambo kya kimye kishinikishiwe. Kechi mu kakalwe kumvwa ino Mbila ne.

¹¹⁵ Pano monai kya mwekele. Aye wambile mba, “Namwene Lesa,” Mikaya wamumwene, “nsaakala pa Jitanda Mwiulu. Kyanji kinje saka kya Muzhokoloka. Aye waambile mba, ‘Ing’anyi ye tusakutuma aye mushi na kujimbaika Ahaba, pakuba mba byambo bya kwa Elaija bifikizhiwe, Ngauzhi wami ao waji washinikishiwa. Naambile namba aye ukeya. Kabiji Elaija wajinga na Kyambo Kyami. Kabiji meulu ne ntanda bikapita, pakuuba Kyambo Kyami kechi kikankakalwa ne. Amiwa kechi natako muchima ne nangwatu bekale na byabukatataka, nangwatu bamweke kuwama byepi, nangwatu bafunde byepi, nangwatu babaye byepi, Byambo Byami kechi bikankakalwa ne.’”

116 “Kabiji mupashi wabubela waishile kufuma ku ngehena, wafukamijile mumanungo anji, ne kwaamba mba, ‘Inge mwakonsha kuswishatu amiwa, Nakonsha kwibapa kushingwa kwa manyi kwami, ne kwibalengela kuuba kiyukilo nangwatu kya kukumya, kikulutu ne Bafumya ku Kyambo. Aye kechi ukayuka mba Akye kyo Kyambo Kyenu ne. Aye ukekivulamako Kye, na mambotu akuyukanyikwa.’” Mulongo, bimye kechi bya pipulwa ne. Mulongo Neville, akyo kyakiine. Mwavulukanyi, akyo kyakiine. “Nsakwikala pe aye, ne kumulengela aye kuuba bintu bimo byobobapo bonse. Nsakumulengela kwaula, ne kubulang’ana bubela.” Kyakonsha kwikala byepi kya bubela? Mambo kyajinga kya pusanako na Kyambo.

117 Inge mwatolapo lubatizhilo lwa bubela lunji lonse, lwa bubela *kikananga-ne-kikananga-ne-kikananga*, kechi Natako muchima nangwa kyumvwayike bulongo ne, nangwatu besekeshe byepi kwi fwanyikizha, ke kintu kya bubela umvwe kyapusanakotu na Kyambo kyakwa Lesa kya mukino kimye. Abyo byokiji.

Mwaamba mba, “Kyawama, kyetu, kyawama, twauble *kikye*, kabiji tuuba *bibye*, kabiji kipwilo kyetu *kiji* bibye ne *byobya*.”

118 Amiwa kechi natako muchima nangwatu kikale byepi. Inge kiji kyapusanako na Kyambo kyanembelwa kino kimye, ke kya bubela. Lesa kechi ukobapo nakyu kintu nangwatu kimo ne, nangwatu kimweke nobe kyakishika byepi, bafunde byepi, bajimuke byepi, kyumvwanike byepi bukine, kyumvwanike kya maana byepi, inge kyaikala kyapusanako na Kyambo kya kino kimye. Tusakuyako mukuzhika mu mamineti, inge kimye kisakwituswisha. Inge tubulekyo, tusakwikisenda jibiji bufuku buno.

119 Monai, aye wajinga wabukishika, muntu wawama, kwakubula ne kuzhinauka ne. Kabiji aye waambile mba... Nanchi, mumusango mukwabo, Mikaya wamwambijile, kechi pameso anji ne, bino mung’ambilo ikwabotu, “Obewa washingwa manyi na mupashi wa bubela.” Bushe akyo kintu kya konsheka kubula bishopo nyi? Bino aye wikyubile.

120 Kabiji awe bishopo waishile kooaji ne kumwambila mba, “Obewa kechi ukekalapo nalumvwang’ano jibiji ne,” ne kumupuma lupi pameso. Waambile mba, “Obewa wayuka mba Amiwa ne muntu washinikishiwa. Kipwilo kyami kyandengele kwikala mukulumpe, wakikye kintu. Kuvota kwabavula kwa bantu ba Lesa kwandengela kwikala bino. Kabungwe kami kokandengele amiwa kwikala bino. Kabiji Lesa witupele ino ntanda, kabiji Aye wafukwile mba ikale yentu. Kabiji Njina ABYO BYOBYAAMBA AYE NKAMBO.” Wamwimbile lupi, ne kumwambila mba, “Kwepi kwajikuya Mupashi wa Lesa Byoaji kufuma pe amiwa?”

¹²¹ Mikaya waambile mba, “Obewa ukayuka, juba jimo,” kimye California byo akalobelwa panshi ya kalunga peene, ne bibye bintu byonse. Mwamona? “Obewa ukayuka kwepi Koayijile, byo ukekala mukaleya mukachi.”

¹²² Pano, Ahaba, musakwambapo ka? “Namuketekela ngauzhi wami,” aye byo aambile. Pano ibyepi inge wapeselepesele mu Kyambo? Monai, aye kechi wakebelenga kufingwa ne. Ng’umvwai amiwa! Aye kechi wakebelenga kufingwa ne. Kapaji muntu uswisha ne.

¹²³ Kabiji kami kabung-...mulongo wamukabungwe, alo lolukatazho lomuji nalo. Mubena kulanguluka mba mujitu bulongo, bino, mwayuka mumuchima wenu, inge mwabatizha kwingijisha jizhina ja “Taata, Mwaana, Mupashi Wazhila,” ubena kubepa bubela. Mwayuka inge watongw-...amba byo byo bintu byo ubena kuuba, kabiji ne kutola tuyukilo tutanshi, ne bintu byonse byo kabya, mwaya mungi. Kyafwainwa kwikala byepi kiyukilo kitashi mba kwamba mujimi, kabiji ne kwamba bya pusanako kumulaye wa Lesa wa kino kimye? Kyakonsha kwikala byepi? Obewa kechi ubena kukeba mafingo ne, mubena kukebanyi? Bino *Paapo* kyanembwa mba, kabiji byobyo kikekala. Akyo kyo kiyukilo kya lukinyama, kijitu peepipepi kyakuuba mba kya kyonsha kujimbaika Basalululwa inge kya konsheka kubiwa.

¹²⁴ Kyonse kiyukilo, kyonse kyakukumya, muntu washingwa manyi, bungauzhi, byonse bintu bibena kubiwa; misango yonse ya biyukilo, misango yonse ya byakukumya, mukabulang’ana byepi lupusano? Tajishai Kyambo kya kino kimye. Abyo byo mu . . .

Tajishai Mosesa, inge byo amubujile Balamu. Tajishai Mikaya paapo, twayuka byepi amba wajingatu bulongo? Akyo Kyambo, kunyuma kwanji, kya mwawijilwe Ahaba.

¹²⁵ Kabiji ne Kyambo, kunyuma yetu, kya awijilwe atwe tubungwe twa ano moba, kabiji ne kuno kufingwa pe abo. Kabiji bintu bya kyonsha kubiwa kupichila mu Kipwilo Kyanji kyashingwa, bikekala na Kyambo, ke Musongwa wabu Kyambo. Pano poopu tuji. Pano poopu kiji, leelo, byoka byo kyajinga kunyuma.

¹²⁶ Aye Baibolo waamba mba, “Mutunwa twa bakamonyi babiji nangwatu basatu lekai kyambo kyonse kikajikwe.” Najikwaamba pe Balamu, Najikwaamba pe Balamu ne pe Mosesa. Kabiji Naamba pano pe Mikaya ne Zendekiya. Pano Mbena kupana lushimono lumo. Kyakubamba, baji maaduleendi, pano bino kwashala umo, kufikizha bukamonyi busatu. Njina byavula bingi paapo bya nembwa; pano namambo a kimye.

¹²⁷ Yelemiya wajinga washinikishiwa, ye bakaine, bino saaji ngauzhi wa Lesa washinikishiwa. Abo bamunshikilwe awa

muntu. Abo bamutailekyo . . . kipangwa kyapisha pe aye, kabiji ne bintu byonse. Kabiji wibabikile mafingo pe abo. Kabiji ne byobya bintu byo aubile, kabiji ne kulala poopa mumbavu yanji, ne bintu, kabiji ne kupana biyukilo mba Isalela waya mungi.

¹²⁸ Yense ngauzhi, ngauzhi wakine ao waishile paino ntanda, wafingile aa madinominesheni atubungwe twa bipwilo. Pano kyakonsha kwaluka byepi, kupichila mu Lesa ubula kwaluka?

¹²⁹ Aye Mupashi Wazhila ye Ngauzhi wa kino kimye; Aye ubena kushinikisha Kyambo Kyanji, kwikishinikisha Kye. Aye Mupashi Wazhila wajinga Ngauzhi wa kimye kya Mosesa. Aye Mupashi Wazhila ye wajinga Ngauzhi wa kimye kyakwa Mikaya. Aye Mupashi Wazhila, ao wanembele Kyambo, wiya na kwikajika Kyambo.

Pano kika kyamwekele mukimye kya kwa Mikaya? Ahaba waipailwe, kabiji ne bakabwa ba myangile mashi anji, mwaila Kyambo kya Lesa.

¹³⁰ Anweba bonse bafunjishi babubela, byo byaamba Lesa, juba jimo mukanowa byo mubena kukusa, anweba batangi bapofu mutangijila ba pofu! Amiwa kechi nazhingila ne. Mbena kwimubulatu Bukine. Kabiji Amiwa kuuba naamba kiky ne, mu kyokya kibamba, inge Mupashi Wazhila kechi wajikwikyamba ne, “Kwikyambila mujojo jishinda ne.” Bushe ne Mubulapo kala kintu kya bubela nyi kanatu kyoka Lesa kyo ashinikisha mba kyakine? Bukai mutulo, balongo bami, kimye saka kikyange kupwa!

¹³¹ Lekai ng’ambe kikye. Nga mwiba wakonsha byepi kubuuka ne kwikala ke kisonsonya, saka atongwejilwe jimo kwikala byobyo? Nga Basalwa bakonsha byepi kwikala kwakubula kwikimona? Mambo, obewa wasalwa kwikimona. “Bonse bobapa kwiba Taata bakeya kwi Amiwa,” byobyo aambile Yesu, “bino kafwako nangwa umo wakonsha kwiyane kana awa Aye ye Bapele kitendekesho kya inontanda saka kikyangye kwikalako, kimye mazhina abo po abikilwe mu Buuku wa Bumi wa Mwaanamukoko,” kechi pa buuku wabutangi bwa kipwilo ne, pakuuba kana mu Buuku, Buuku wa Bumi wa Mwaanamukoko.

Monai, Yelemiya waimene, ao washinikinshiwe kumeso abantu, nangwa byokabyo bamunshikilwe.

¹³² Kabiji nanchi baile na kulenga kikokoji, aye byo aubile, kabiji wikibikile pashingo yanji, ne kuya ku bantu. Abo baambile mba, “Oo, twi bantu baneema bakwa Lesa. Kika, atweba twi Isalela. Twi bantu ba kishiika mu shinangonga! Atweba tutanwako jonse Pamulungu, atweba, tupaana bitapisho, kabiji tulipila mali etu. Pano nga Nebukandineza wa kwachile byepi kubintu bya kwa Lesa?” Aa! Bubi bwenu bo bwikyuuaba.

¹³³ Lesa waambile mba, “Inge mukalama mikambizho Yami, Amiwa kechi kooba kikyene. Bino, inge mwabula kuuba, kibena kwiya kwi anweba.” Abyo kine ibyo. Kijitu pamo. Lamai mikambizho Yanji, Kyambo Kyanji kya kimye, akyo Aye kyo alaile.

¹³⁴ Pano monai. Bino, Yelemiya, mu kyaswa muchima wa Lesa, ngauzhi washinikinshiwa, nangwatu ba munshikilwe... Bonsetu mwiabo mu moba abo be banshikilwe. Abo baubile bintu byaabula kuyukanyikwa ku dinominesheni wa kyookya kimye, yensetu wa munshikilwe, ne bamamfumu ne byonsetu. Nanchi wabikile ki—ki konkoji pa shingo yanji, kabiji waambile mba, “ABYO BYOBYAAMBA AYE NKAMBO. Abo bakekala momwa pa myaka sebeete,” mambo aye wayukile kupichila mu Kyambo kya Lesa. “Myaka sebeete!”

¹³⁵ Nanchi Hananiya, Hananiya, Naketekela mwikishipulula mba, H-a-n-a-n-i-y-a. Hananiya, ngauzhi mukachi kabantu, waishile, wafumishe kikonkoji pashingo ya kwa Yelemiya, kabiji wikichimawine. Kabiji waambile mba, wikale mukatampe mukachi ka bantu, mwamona, bino saka aambilenga bintu byapusanako na Kyambo kya Lesa. Kabiji waambile mba, “Pa myakatu ibiji nishi babwela. ABYO BYOBYAAMBA AYE NKAMBO.”

Bangauzhi babiji bashingwa. Pano nga lupusano lwajinga peepi? Umo waambilenga Kyambo, kabiji mukwabo kechi wajinga nakyo ne. Yelemiya waambile mba, “Amena.”

¹³⁶ Kumeso abakulumpe bonse ne kipwilo, Isalela yense, mwamona, aye wakebelenga kwimweshwa amba naye mukatampe ujitu pamo ne Yelemiya. “Mwayukatu abo kechi bakutemwa ne, nangwatu byokabyo. Nanchi Amiwa ne ngauzhi, ne amiwa. Amiwa nakukila bungauzhi, mambo obewa wa aula bya bubela. Obewa ubena nkuumbula amba bantu ba Lesa bakekala *mukinanga-ne-mukinanga* kya yeo musangonyi?”

¹³⁷ Abyo byo bamba leelo, bino kimotu mukekhalako, nobe kipwilo. Obewa wafingwa na jifingo. Bipwilo byobe byonse, madinominesheni ba kwachijilatu bisho bya muntu mukifulo kya Kyambo kya kwa Lesa, obewa Lesa wakufinga.

¹³⁸ Pano monai, awe ke eeye. Hananiya wasukanya akye kikonkoji kufuma musingo yanji, ke simbo wa Lesa, wikichimwine, ne kwaamba mba, “ABYO BYOBYAAMBA AYE NKAMBO. Pamyakatu ibiji nishi babwela.” Ke kya kwimweshatu, “Amiwa *Nekananga-kabiji-nekananga*.” Mambo aye wamwimejile, wajinga ngauzhi wa kikabungwe.

Yelemiya wajinga muntu wa mujiisaka ao wi ikelangatu aye mwine. Aye kimye kyonse wibawilangatu byatama, mambo abo bajinga babi.

¹³⁹ Kabiji awe muntu wi babujilenga mba, “Oo, obewa ujitu bulongo kikulutu unji kulubaji. Kikulutu obewa wi

mwina Isalela, akyo kyokyokatu kyanema. Mwamona, anweba, atweba. . . Lesa kechi ukoba kyokyo ne. Nayuka namba pajipo kakintu kamo kamwekele, bino kechi musukanishiwe ne, kechi mumvwe moyo ne.”

¹⁴⁰ Oo, mulongo, ne jaleelo bakiji na bumi. “Kechi muteko muchima ne, byonse bijitu bulongo. Tuji naluusa pa bintu byonse. Atweba twi Kipwilo.” Kechi mulanguluke byobyo ne. Ee.

¹⁴¹ Nnachi waambile mba, “Bintu byonse bijitu bulongo. Ba kabwelatu pa myaka ibiji. Akya ke kintu kicheche kyamweka. Kechi kyeemyi akyo kintu ne. Tunji na kyokyo. Bino Nebukandineza waishile, bino Lesa wetu ukekalapo na luusa pa byonse bye.”

¹⁴² Bino Kyambo kyaambile mba bakekalako myaka sebeete; poso akya kisemi byo kya onaikile kyonse, kabiji ne kisemi kikwabo. Myaka foote ke kisemi. “Aaye ke peepi nobe bisemi bibiji yo mukekala kuyoya mpuzzha.” Kabiji Yelemiya wikyambile moka mwaila Kyambo kya Lesa.

Hananiya wa mokawile kyokya! Yelemiya waambile mba, “Kijitu bulongo. Amena. Bino, Hananiya, twaya tuvuluke kikye, atweba bonse babiji twiiba ngauzhi. Twiba mingilo.”

¹⁴³ Kabiji Naamba kikye kwi obewa, mulongo wami. Twayai tuvuluke mba kunyuma yentu kwajinga bangauzhi, kabiji ba awijile kwimena bumfumu, kabiji ba awile kutazha kubintu bimo. Bino, vulukai, inge ngauzhi waambapo kintu kimo, aye wafwainwa kwaaula mwaila Kyambo. Nobe Mikaya, kabiji Mosesa, ne bonsetu baashala. Kyafwainwa kwikala mwaila Kyambo. Inge kechi ibyo ne, nanchi vulukai kyamwekele.

¹⁴⁴ Nanchi, Hananiya, bukaji bwanji bwaimene. “Amiwa ne Hananiya” (kwa kubula kuzhinauka ne), “ngauzhi wa Nkambo, kabiji Naamba mba, ‘Myaka ibiji.’” Mung’ambile ikwabo, “Amiwa kechi nasakamana byaamba Kyambo ne.” Kwanji kushingwa manyi, “Naamba namba, ‘Myaka ibiji, bakabwela.’”

¹⁴⁵ Yelemiya wafumineko koaji, walupukile, ne kwaamba mba, “Nkambo, Amiwa kechi nasakamana byo aamba ne, Nakiketekelatu ne kuyuka mba Kyambo byo kyaamba. Nsawkwala wakinshika kwi Anweba. Amiwa kechi nsakujimbaikwa kwi aye ne.”

¹⁴⁶ Lesa waambile mba, “Yanga ukamubule Hananiya, ‘Nkekilenga ke kya kyeela kya kapotwe, kikonkoji kikwabo.’” Mambo aye waubile kyokyo, bamufumishepo panopantanda, Hananiya byo kyamubijilwe, awa yeka mwaka umo.

Abyo ke bya kumwenako byetu, bonse babiji bangauzhi. Nanchi byavulatu bya konsha kwambiwa ne kulondololwa pa kino kimye.

147 Bino talai. Yesu waambile, amba, mukino kimye kya kumpelo, ne jikwabo, aye mipashi ibiji ikekalatu peepi pepi ne jikwabo. Abyo ibyo nyi? [Kipwilo kyaamba mba, “Amena.”—Waku.] Pano monai. Kikekala peepi bingi kukila byooby byo kyajinga. Akino ke kimye kya kumpelo. Oo, baana! Lesa tubilai lusa! Kyakuuba mba, “Kyakonsha kumweka bututulu bingi kya kuuba mba kya konshe ne kujimbaika ne Basalululwa inge kya konsheka kubiwa.” Pano mwakonsha kuya byepi. . . twikitongwelenga mbaka muooba moba? Ngaleelo musakwikitongola mbaka? Mujishindatu jimo, ikalaitu na Kyambo, “Yesu Kilishitu ye umotu kesha, leelo, ne myaka yonse.”

148 Pano taiko muchima kuiye yonse Mbila. Kabiji umvwe mwateleka ku tepu, kapepo nangwa nishi Naya juba jimo inge Nkambo wapwisha ne amiwa panopantanda, mukabwele jibiji ku kikye. Mukateleke kujiwi jami, byo Mbena kwi mubuula. Inge Aye wasenda Kwiya Kwanji saka ku kyangye kufika, mu kavuluketu mba, Naamba kwi anweba mu Jizhina ja Nkambo, kupichila mu Kyambo kyakwa Nkambo. Ee.

149 Monai, “Bakekalatu peepi pepi kya kuuba mba bakajimbaika Basalululwa inge kya konsheka kubiwa,” bakooba biyukilo bimotu, bya kukumya bimotu, ku Mupashi umotu. Abyo ibyo nyi? [Kipwilo kyaamba mba, “Amena.”—Waku.] Byoka byajinga bangauzhi bo twaambapo, bangauzhi. Bino, neakyo kya nembwa. . .

Twayai tuzhikulepo, pakikye kimo, inge mubena kukeba, Wabubiji Timoti 3. Kechi tushepo kikye ne. Kabiji Amiwa kechi keba ku. . .

150 Natala pa koloko poopa peulu, kabiji Na—Na keba kushapo byavula, kabiji kechi Naketekela mba twakonsha kwikyuba kino kimye ne. Mwamona? Monai. Byoka. . . Inge Naimana pano, ne kumvwa kusulwila byoka byo Mbena kuba, monai, bino Amiwa ne walusekelo. Kabiji Nayuka mba akye kya kine. Wabubiji Timoti 3:8.

151 Paulo, muntu waambile mba, “Inge Malaika waiya kufuma Mwiulu kabiji wimwambila kyambo kikwabo kya pusanako na byooby byo Naamba, ekale wafingwa mafingo,” bino, Malaika waiya. Ao ye Tesalonia Wabubiji. . . Oo, Mundekeleko mambo.

152 Monai mu Timoti wa Bubiji 3:8. Talai Paulo ubena kwaamba. Twayai tutatwile nobe pa. . . Twayai tutatwile pa veleshi mutanshi, kabiji telekeshai bulongo. Anweba muji na Baibolo wenu, tangai pamo neamiwa. Anweba mwabula Baibolo wenu, telekeshai bulongo. Aye. . .

Kabiji uyuke kino amba, mu moba akapelaako. . .

Kwatakanyai kyokyo, “moba akapelaako.” Akye kyo kimye po kikamweka.

. . . kukeya bimye bya katazha. (Tuji moka.)

Mambo bantu bakekala bakwitemwa abo beene, bakutemwa mali, ba kwitota, bakwilemena, bamwenga, bakulengulula bebasema, bakubula kusanta, bakubula kuzhila,

153 Talai pa jije jibumba jotuji najo leelo, babola. Ne muntutu uji pa mukwakwa, songwalume, kundosela suki yabo ku bilungi byaabo, nobe mikule ya mwanamukazhi. Bayatu mungi! Mupashi wa kisondoma!

154 Bushe mwatangapo mu uno mwaka, uno ng'ondo mu *Reader's Digest*? Waambile mba, "Abo bantu Benameleka pa myaka iji pakachi," Naketekela yajinga, "pakachi ka tweeti ne tweeti-faivi myaka yakusemwa, baji kala mungikelo yakufikila pakachi-kamyaka." Abo bapwijijila! Abo babola! Sayaasi byo byo yaamba, amba muntu wafika pakachi kamyaka yanji, ne mwanamukazhi, bino saka bakijitu kutapilo ya matweeti. Mibiji yabo yabola kabiji ya paanwa ku bubipisho.

Oo, America, bimye binga Lesa byo akemufukachila, bino kimye kyenu kyafika! Anweba mutangijila ntanda mu bya bubu.

. . . bamwenga, bakulengulula bebasema, bakubula kusanta, bakubula kuzhila,

Bakubula muchima wa bumuntu, . . .

Kechi kujipo ne butemwe bwa umu ne mukwabo ne, mwanamulume ku mwanamukazhi, mwanamukazhi ku mwanamulume ne. "Kechi bajipotu nangwa na muchima wa bumuntu ne." Bubipishotu, ba mipashi ya bukende!

. . . ba kubula kupwanang'ana, ba kubepela bakwabo, ba kubula kwilama, bashinta, kabiji ba kubula kutemwa booba bya wama,

155 Mung'ambilo ikwabo, kwaamba mba, "Anweba jibumba ja boba booba kyongo kyazhila." Muntu umu waimpwizhe juba jimo na mambo akwiya kuno ku kipwilo. Waambile mba, "Kechi mwakonsha kuya kookwa ne. Byokijitu ke jibumbatu jikatampe ja booba kyongo ne bikwabo bya kuubauba."

Monai, "ba kubula kutemwa boba."

Bakufutuka, ba lupata lwa kuuba bibi, ba kwilundumika, ba kutemwa bya lusangajiko ne kutemwa Lesa ne;

Mwaamba mba, "Mulongo Branham, mwaamba amba ke kikomunisiti." Nga veleeshi walondelapo waamba mbaka?

Kasa baji na kipashang'anotu kya munema wa bulesa, bino (kika?) bulume bwa ao munema bebukana: (akye Kyambo, Yesu Kilishitu ye umotu keesha, leelo, ne myaka yonse, kumweshwa, mulaye wa joojo juba) . . .

Kijitu pamo nobe Hananiya, kijitu pamo nobe Zendekeya, kijitu pamo nobe Balamu, kubwela kunyuma, kubangauzhi bakwabo babubela.

Kasa baji na kipashang' anotu kya munema wa bulesa,
(washingwa manyi . . . Mwamona?)

Kasa baji na kipashang' anotu, (bashingwa manyi,
bamingilo baikajikwa . . .)

Kasa baji na kipashang' anotu kya munema wa bulesa,
bino sabakana (kuuba mba Aye ye umotu keesha, leelo,
ne . . . Kukaana Kyambo Kyaji!)

¹⁵⁶ Nga Yesu ba mukaine byepi mujooja juba? Ing'anyi ye bakaine byo bakaine Yesu? Akyo Kyambo. Bajinga bapopweshi. Abo bafunjishenga kufuma mu Baiblo wabo, bino ke bakane Kyambo kya kimye-kyabo.

¹⁵⁷ Bobang'anyi leelo? Kintutu kimo, bashingwa manyi, ne kusapwila Mamboawama a pentekositi, bino saka bakana mulaye wa kimye-kyabo wa Kyambo kwikala kyashinikinshiwa, "Yesu Kilishitu ye umotu keesha, leelo, ne myaka ne myaka." Bushe mwikimona nyi? [Kipwilo kyaamba mba, "Amena."—Waku.]

Mambo mwi abo muji bamo bongolokela mumazubo,
ne kwibabombola . . . banabakazhi bakosama
banemenwa na bya bubu, batwalwa twaalwa ku bya
kusakasaka kwabo kwa misango ne misango,

¹⁵⁸ "Bijiilo byetu bya kukwatakana ne byetu bya *bikananga-ne-bikananga*." Muntu umo waishile kweseka kulondolwela Kyambo mujishinda jingi, ne kwaamba bibye, "Kijitu bulongo, nyenga, obewa kwikala na suki yaipipa. Kutako muchima ku bya kukosama ne. Mwamona? Nangwa, inge obewa—obewa wamvwala *kikye*; kechi kyokyo *ne*, 'kekitu kifuma mumuchima wa muntu ikyo kimuzhilulula.'" Mwamona? Kabiji obewa wayuka mba washingwa manyi na mupashi watama, wa lukumbwa, wabiko nyi? Kechi nataka muchima nangwa wimba mukwaya, na suki yaipipa, bino obewa uji na mupashi watama. Akyo ke kitu kyapusanako na Kyambo. Abyo ibyo. Abyo Baibolo byobyo aamba. Kabiji waamba mba, "Kyawama, Mvwala tuputula. Kechi kindetelapo luzhachisho ne."

"Uji yense, inge mwanamukazhi wamvwala kya kumvwala kyapasha kya mwanamulume, ke kyabunya ku meso akwa Lesa." Aye Lesa ubula kwaluka ye waambile kyokyo.

¹⁵⁹ Oo, nanchi bintu byavula bingi, twakonsha kupitamo byepi? Kimye kyetu kya konsha kupwa. Bino mwayuka bulongo kuyuka mba akye kyatama kabiji akye kyawama. Kabiji Nakonsha byepi kwibalengela abo amba bekyube? Nga Nakonsha kwikyuba byepi? Kwaamba mba, "Kyawama, ikika kyo ubena kwaambapo?" Amiwa ne kamonyi wa ku kwimena.

Juba jimo, pa Juba ja Kinje, obewa kechi ukekala na kooni kwa kufyama ne.

¹⁶⁰ Nga Mikaya wakonsha kwi kikanya byepi kye? Nga Mosesa wakonsha byepi, kubijika, kweseka kwi kikanya? Kabiji Yoshiwa ne abo kunyema mukachi ka bantu? Kabiji ne Levi wasomwene poko yanji, ne kwi bepaya, ne abo? Abo baile nangwa byo kabyo.

¹⁶¹ Kyatongwelwa jimo amba ba kekyuba. Kabiji ba kekyuba, mambo ABYO BYOBYAAMBA AYE NKAMBO abo ba kekyuba. Anweba mubena kulanguluka mba ao manominesheni bakabenamo, madinominesheni abo bakabwela ku Kyambo? Kiji ABYO BYOBYAAMBA AYE NKAMBO, kechi bakekyuba ne! Bushe bakaya mu antkilishitu nyi? Kya kine. Kiji mba ABYO BYOBYAAMBA AYE NKAMBO, abo bakooba! “Nanchi mubena kwaamba mbaka pakikye?” Amiwa kekala ke kamonyi, kabiji ne obewa, bonsetu baitabila. Tajishaitu.

*...banabakazhi bakosama bayula na...lukumbwa
lwa pusanapusana,*

“Kyawama, bonse bashala banabakazhi byo byo booba.” Bangauzhi babubela! Pano umvwai. Bangauzhii babubela, bo Mbena kwambapo. Pano bakooba ka mumoba a kumpelo?

*...ne kwibabombola banabakazhi bakosama...
batwalwatwalwa mu bya kusakasaka byabo bya
misango ne misango,*

“Kyawama, Nayuka bonse banabakazhi bashala...” Kijitu bulongo, yangu kulutwe.

¹⁶² Pano Nsawkwambaka saka kikyanyye kumweka kintu kikatampe mu California? “Anweba bantu muno mu Los Angeles, kimye kyonse Ami kyo mwela kookwa banabakazhi bavula baichika-masuki abo kabiji ne banabalume baji na mupashi wabwanabukazhi kukila byonajingako patanshi, basapwishi bavula batwela mu kabungwe. Anweba kechi yenu mwashalapo ne! Inge mingilo ikatampe ya ubiwa mwi anweba yaubiwe mu Sodoma ne Gomola, inge wakimana ne leelo. Oo, Kapenama, anweba mwitela anweba bene na mazhina aba malaika, Los Angeles!” Monai kibena kumweka? Ubona kutwela pashi ya kalunga. Kimye ka? Amiwa kechi nayuka kimye po kikaya ne, bino kibena kuya. Anweba ba kyanyike, inge Amiwa nabula kwikimona mumoba ami, tajishaitu. Aye waya!

*Saka baswa kufunda, ...ne kukonsha kuyuka maana
abukine ne.*

Bino pano popaji kya kukumya, kino kyo kya kukumya. Telekai ku kino.

*Kabiji monka ba Yanesa ne ba Yambelesa mo
bamukosakenenjile Mosesa, mo monka ne bano
mo bakosakena bya bukine: bo bantu bamichima*

*yaulung'ana, balwitabilo lungi lucha alwa lwapainwe
kala ku bazhijikwa, ee mwane.*

“Mwaila Lwitabilo.” “Kabiji ukalulwila Lwitabilo lwa bashabo, nangwa mba baana, kubwela ku bashabo.”

¹⁶³ “Lungi mwaila Lwitabilo.” Uu! Mwayuka mwatala *lungi* byo kya lumbulula nyi? Inge muji na Baibolo wa Scofield, paji *h* apa. Pookapatu, kyaamba mba, “kuya mungi.” Ke kuya mungi, abyoy byo kiji.

¹⁶⁴ Pano, pa kimyetu kacheche. Mbena kukebapo kintu kimo papo. Naketekela Nanembele kikye. Kechi naketekela bulongo ne, bino Mbena kukeba kwi kyamba, kabiji ne kimone Saka—Saka kyangye kwi kyamba. Bino, ka minetitu kamo. [Kafwapo bijipo pa tepu ne—Waku.] “Lungi mwaila Bukine, mwaila Lwitabilo.” “Alo Lwitabilo,” kujitu Lwitabilo lumo. Abyo ibyo. “Mwaila Lwitabilo, lungi!”

Pano Mbena kukeba kutanga Luka 18. Pa kamineti kamotu. Anweba kechi. . .Mwakonsha kunemba; kechi mwakonsha kutanga ne.

*Kabiji aye wibataile kishimpi mu kwi babula, amba
mwafuwainwa kimye kyonse kulomba, kabiji kechi. . .
kukoka ne;*

*Kwaamba mba—kwaamba mba, Kumuzhi umo
mwajinga mutonyi, wabujilwe kwakamwa Lesa,
nangwa kunemeka muntu ne:*

*Kabiji mwajinga mwanamukazhi wafwilwa mu yewa
muzhi; kabiji waishilenga kwi aye, na kumwambila
mba, Banchibile mambo na yewa ye twikenda nanji.*

*Pakuba aye—ne aye wakikainenga moba amo: bino
palutwe wiambijile mwine mba, Nangwa Mbulwa
kwakamwa Lesa, nangwa kunemeka muntu ne;*

*Byokabyo mambo onka auno mwanamukazhi
wafwilwa wakatazha ami, Nkamuchibila mambo anji,
kuchina mba. . . wakakokeshana na kwiyaia kwanji.*

*Kabiji aye Nkambo waambile mba, Umvwai akya
kyaambile mutonyi wabula koloka.*

*Nanchi ne aye Lesa kechi akebachibile mambo
banji. . . basalululwa, abo bamujijila mute ne bufuku,
nangwa wabanda kwibakwasha nyi?*

*Nemubula namba ukebachila mambo bukijitu.
Byokabyo Mwaana muntu byo akeya, ukatana lwitabilo
panopantandanyi?*

¹⁶⁵ Pano aje keji-puzho. Apano po Najikukebanga kufika: Mu Lumwekesho 10 (Tusakufikapo mu kakimye kachechetu, tuye ku Kinembelo kikwabo, yai.), Aye waambile mba, “Mu moba a Mbila ya malaika wa butanu nabubiji, kya fyamika kya

kwa Lesa *kyafwainwa* kupwa.” Apano paji jipuzho, ke, inge mwalondela muyoyo ndoonda mukino kimye, *bushe* kikapwany? “Bushe Katana Lwitabilo?” Bushe Malakai 4 ukafikizhiwany mu kino kimye, “Kubwezha Lwitabilo lwa baana, ku Lwitabilo lwa bashabo, loka lwine lutanshi, ke Kyambo”? Mwamona?

¹⁶⁶ “Baya mungi, Yambelesa ne Yanesa, byoka byo baimejile Mosesa.” Bino, neabo, telekai, Timoti wa Bubiji 3:8. “Byoka Yane-...byo aimejile Mosesa, ne mu moba akumpelo abo balwitabilo lungi bakeya,” pano monai apo Po kyaamba mba, “baji na munema wakuneka lesa,” bashingwa manyi. Pano twayai tu...Bwelai kunyuma ne—ne kwikitanga inge mwafika kunzubo, pakuba mba Nkonshe kupwisha bibye, lukeelo luno, inge Nakonsha. “Baya mungi mwaila...” Kechi baya mungi mu—mu ngikelo ne; bajitu bulongo, ke bantu bafunda.

¹⁶⁷ Pano monai, kimye Mosesa kyo aile Ijipita, na mbila ya kwaamba mba ABYO BYOBYAAMBA AYE NKAMBO, kabiji wajinga washinikishiwa; waichile Isalela, abo bajinga bantu, kechi kyaji kipwilo ne. Isalela wajinga bantu; kechi bajinga kipwilo ne. Mambo, kyambo kya *kipwilo* kyalumbulula mba “bantu-baitwa.” Abo bajinga bantu bakwa Lesa. Nanchi byo baishile bashingwa manyi na Kyambo, kabiji baichilwe, baikela ke kipwilo kya Lesa. Kabiji nanchi baishile babwela panyuma, mambao kechi baketekejile Kyambo kya Lesa ne, kabiji baumvwijile ngauzhi wabubela. Naketekela akyo kisakutwela mu michima.

¹⁶⁸ Isalela, byo bajinga bantu bakwa Lesa, balupukile na kuboko kwakwa Lesa, bashingwa manyi na Kyambo...na Bulume bwa Lesa, bamwene biyukilo ne bya kukumya bya kwa Lesa. Kabiji Lesa byo aendelenga nabo, ngauzhi wabubela waishile, washingwa manyi, kabiji wafunjishe kintu kingi kyapusanako na kiine Kyambo kya Lesa akyo kyo baumvwine; kabiji bonsetu baonaikile mukiselebwa, kufumyako bantu basatu. Pano kikwatai.

¹⁶⁹ “Byoka byo kyajinga mumoba aba Nowa, amo mwapulukile kumeema bantu batanu na basatu, nanchi byo kikekala ne mukimye kyakwiya Mwaana muntu.” “Byoka byo kyajinga mumoba aba Lota, amo bantu basatu mobalupukile mu Sondoma, nanchi byo kikekala ne mukimye kya kusololwa Mwaana muntu.” Amiwa mbena kwambulatu Kinembelo, Kyambo kya Nkambo, akyo, “Bya mwiulu ne ntanda bikapita...” Kikekalatu mu bacheche!

¹⁷⁰ Monai paapo. Mosesa waya kwi Alona. Mosesa waikela ke Lesa. Lesa wamubuujile kwikala ke Lesa, waambile mba, “Obewa ikale ke Lesa, kabiji Alona mulongo obe ekale ke ngauzhi obe. Ukabike byambo mu kanwa kanji inge kechi wakonsha kwaamba bulongo ne.” Waambile mba, “Bino ing’anyi

walengele muntu kwikala kamama? Kabiji walengele muntu kwamba ng'anyi?" Aye Nkambo ye wikyubile.

¹⁷¹ Kabiji waile kokwa. Aye waubileka? Aye waubile kya kukumya kya kine ne kyaoloka akyo Lesa kyo amubuujiile mba obe. Lesa wamubujile mba, "Yanga ukataye mukombo obe pashi." Wa mutolele, kabiji waalukile ke muloolo. Wamutolele, kabiji waalulukile jibiji ke mukombo. Waambile mba, "Yanga ukobe kiky kwi Felo, ne kumwambila mba, 'ABYO BYOBYAAMBA AYE NKAMBO.'"

¹⁷² Kabiji kimye Felo byo amwene bibye, twaamba mba, "Kika, ao ke maminimini abu majishani akyabe kyabe." Waambile mba, "Kapaji kijipo ne. Ke milanguluko yakutanga boongo nangwa kintu kimo, mwayukatu. Tuji na bantu mu kabungwe ketu bakonsha kuuba bintu bimo. 'Iya kuno, Bishopu *Kananga-ne-kananga*. Kabiji, mwayuka, iyai kuno.' Tuji nabo bakonsha kuuba kintu kimo." Awa wajinga Satana waambilenga kupichila mwi Felo.

Awa wajinga Lesa waambilenga kupichila mwi Mosesa.

¹⁷³ Pano monai awe muntu waiya. Yanesa ne Yambelesa baishile kwi Mosesa, kabiji ne kumeso abantu bonse, kabiji baubile bya kukumya byonse bya ubile Mosesa. "Bakajimbaika boka Basalululwa inge kyakonsheka kubiwa." Abo ibyonyi? Baubile bintu bimo byo aubilepo Mosesa. Mwikyumvwa kyonyi? Pano vulukai, kiji ABYO BYOBYAAMBA ABYO BINEMBELO, amba kikebwezhapo jibiji mumoba akumpelo.

Nga lupusano lwajingapi pakachi kakwa Mosesa ne Yambelesa?

Mosesa waambile mba, "Lekai mashi eye mu meema."

Kabiji abo bangauzhi babubela baambile mba, "Kiine, tubika mashi mumeema, ne atweba." Kabiji kya mweka.

Nanchi Mosesa waambile mba, "Lekai kwiye mbalebale." Wibifumishenga kwepi? Kufumatu kwi Lesa. Mwamona?

Kabiji waubile byepi? Aye waambile mba, "Kyawama, kine, twakonsha kuleta mbalebale, ne atweba." Kabiji be kyuubile. Kyonse kya kukumya kyaubile Mosesa, bekyuubile, ne abo!

¹⁷⁴ Vulukai, lamai kyokyo mumilanguluko, tubena kwiya kukyokyo, pakakimye kacheche. Bakonsha kuuba kiji kyonse kyo bakonsha kuuba bonse, bino kuuba baikala na Kyambo ne. Abo kuuba baikala na Kyambo ne.

¹⁷⁵ Pano monai, abo be kyubile. Bino Mosesa, ngauzhi-watumwa wa kine waafuma kwi Lesa, wapewa mwingilo kwi Lesa, aye kechi wipachikile nabo ne, waambiletu mba, "Kuno, kuuba mwikyuba akya ne! Anweba kuuba mwikyuba ne!" Aye wibalekeletu buke bwabo, wibalekeletu batwajijila. Abo ke bangauzhi ba tubungwe, bino yaingatu.

176 Mosesa watwajijiletu kuya kulutwe, watelekele kwi Lesa. Kyonse kyo aambile Lesa, “Pano ube *kikye*,” Mosesa waile na kwikyuuba. Aye waubile kintu kipya. Byo baubile, umo wamwiabo wajinga na byakumvwa kumubiji nangwa kintu kimo, neabo baiya. Abo bekyubile, ne abo, byokaatu byaubile Mosesa.

177 Pano monai. Abo balunda bamwekele. . . Oo, anweba bantu, kechi mushalepo pa kikye ne! Abo bafwanyikizha, basombolola, bamwekele panyuma ya wakine wauba patanshi. Mwamona? Baishile na kusombolola. Monai, byobyoby baubile. Aye diabola kuba walenga nangwa kimotu ne; aye uzhalululatu kyalengwa kala.

Kabiji bubi kyo kika? Ke bololoke bobazhalulula. Bukende kyo kika? Ke kyubilo kyaitabilwa kyo batwala mungi. Nga bubela kyo kika? Ke bukine bwa twalwa mungi. Ke kintu kyo bazhalulula!

178 Talai kwi Hananiya, ke zhalulwilo ya kiine Kyambo. Talai kwi Balamu, ke zhalulwilo ya kiine Kyambo. Talai kwi Zendekeya, ke zhalulwilo ya kiine Kyambo.

Kabiji ne Baibolo waamba mba abo bantu bakeya, panyuma ya kuzhalu. . . nangwa ku zhalulula kwa kiine Kyambo kyashinikinshiwa kabiji kya shiniinwa kwikala Bukine.

179 “Uba mwingilo wa busapwishi,” amwa mu yewa koono, “shininkisha mwingilo obe. Mambo kimye kikeya kyo bakabula kuswa Mafunjisho alumbuluka, bino byo baji namatwi ababaana, ba kevujishisha abo bene bafunjishi ba monka mwaila bya kusakasaka byabo; babwela batwajijila ne kuuba byonse byo basaka kuba, kabiji, ‘Kijitu bulongo, tujitu na biyukilo ne byakukumya bimotu.’ Kabiji bakafutulwila matwi abo kungi kufuma ku bya Bukine, ne kusendukila ku bishimitu, mafunjisho abantutu.”

180 Oo, kuyuka mba Mupashi Wazhila po aji, abwa buyuke bu kwaata mweo wa muntu inge watapa kulanguluka byo kiji kitutulu ne kuletwa patoka kumeso entu! Poyai jibwe jakintendekesho jaimikilwe papo ne kutanga bya nembwapo pa kipepala, pa myaka saate-fiili yapitapo. Monai Aye byo aambile ku—ku Mukwaakwa wa bu Seebeni, alwa lukeelo kimye aja jibwe ku kintendekesho po jaimikilwe. Pano kimonai. Monai papo pa mukola, kimye awa Malaika wa Nkambo po aishile panopashi mumusango wa Mumbulungwa wa Mujilo, maaduleendi a bipwilo, nangwa mba bantu ba mubipwilo, saabaimana ku kitulu kya mukola; Aye byo aambile, monai kana bya konsha kufikizhiwa. Monai bya mwekele.

181 Ke kintu kyokosa. Nayuka mba kibena kumweka kukosa, balongo, anweba muji momo. Bino ke. . . Aye Baibolo waamba mba, Yesu Ayemwine waambile mba, “Kikajimbaika bonka Basalululwa inge kyakonsheka kubiwa.” Kechi kujipo mwa

kwikyubila ne. Abo kechi ba Kekimona ne. Inge kya konsheka kubiwa, bonka Basalululwa ba kajimbaikwa.

¹⁸² Monai, abo balunda bamwekele panyuma ya kuuba mba mushingwa wa Lesa wa kine watumwa; kupichila mu ngauzhi Wanji wakine, Mosesa. Kabiji inge Mosesa waubapo kintu kimo, abo ke kwikipashang'anyatu.

¹⁸³ Bino, mulongo, nyenga, Na . . . Kino ke kipwilo kyami. Njina luusa lwa kusapwila kyo Mbena kukeba, kikulutu kyafuma mu Kyambo kya Lesa. Kabiji Amiwa kechi mbena kwi muzhachisha anweba bantu ne, pano twayaitu tupalanguzhe kyokyo na kimye kabiji ne awala ye tubena kwikelamo.

¹⁸⁴ Napaana lwimu ku Mulongo Ruddell, kwi Junior Jackson, ne abo banji mumwe, bipwilo bilongo byetu. Nebalubamo, ka kimye kapitapo panyuma. Naketekela banungakana lukeelo luno, ne abo, mambo akubula—akubula mpuzha mu kipwilo.

¹⁸⁵ Pano ngiilangulukaiapotu, pa kamineti kamo. Abo baubiletu bya kukumya bimoto byonka bya ubilepo Mosesa. Mosesa waletele mbalebale; ne abo bekipashang'enyeye ne kuleta mbalebale. Mwamona?

Lesu waambile mba, “Aja juba jo mukajako, ajo jojuba jomukafwa.”

¹⁸⁶ Satana waishijile kulubaji lukwabo ne kwaamba mba, “Kine, kechi mukafwa ne. Anweba mukekalatu bamaana. Anweba mukekala na kabungwe kawama, ako kawama . . .” Anweba mwayukatu. “Anweba mwayukatu, bintu byonse bikekalatu bimuwamina, po mukekala na Kyeya kyabaisha.” Mwamona, ke kintu kyo batazhatu mungi. Mwafwainwa . . .

¹⁸⁷ Kabiji vulukai mba, ABYO BYOBYAAMBA AYE NKAMBO, monka mwaila Timoti Wakibiji 3:18, kya kuuba mba, “Mumoba akumpelako, amba awe Yambelesa ne Yanesa po bakekala panopantanda.” Bino, Nasaka namba mumone mba banji mumisango ibiji, mwamona, ba kupashang'anya.

¹⁸⁸ Pano tusakubwela ku Sondoma, pa kakimye kacheche, abo, mitundu isatu, bamonai aba Bamalaika basatu baishile, kabiji monai kupashang'anya, ne bintutu bikwabo, monai, monai waya mungi ne waoloka. Mwamona? Mwamona?

¹⁸⁹ Talai, baubiletu bya kukumya bimo. Bino, monai, abo baishiletu na kupashang'anya panyuma ya Kyambo kya kine kyashingwa manyi, kupichila mu umo wakine ao Lesa ye atumine; balondejile, panyuma ja bubiji.

¹⁹⁰ Nakumya inge twakonsha kulangulukapo pa kamineti. Kutola bantu na kuboko, kechi papita kimye kyabaya ne, pepi nobe myakatu makumi abiji, ne kiyukilo kya mwekelenga. Mulunda, kwajinga bya kukumya byavula konse konse, kabiji muntu yense . . . Umo ujinakyo mu kuboko kwa kilujo; mukwabo ujinakyo mu koboko kwa kipiko; mukwabo ununshatu na

myona. Monai, misangotu yonse...Kabiji Nakumya...Lesa kechi ukaswisha kwimubuula kyabukine pa kino kimye ne, bino juba jimo mukekitaana. Akya kyajingatu kya kuuba mba byubilo byabo bisoloke. Abyo kechi byajinga bulongo ne, kufumatu ne pantendekelo. Amiwa kemubuula, juba jimo, inge Nkambo waaswisha.

¹⁹¹ Monai, baubile bya kukumya bimotu, bino kechi baubile. . . Monai, kechi be kyubile ne kanatu panyuma ya Kyambo kiine kyatangilapo, patanshitu. Ajo jojishinda Satana jo aubijilemo mu bujimi bwa Edena. Abyo ibyo byo oba kimye kyonse. Ing'anyi waawiile patanshi? Mosesa. Ing'anyi wamwekele patanshi, Mosesa nangwa Balamu? Mosesa. Ing'anyi wamwekele patanshi, Yelemiya nangwa Hananiya? Mwamona mo Mbena kwikikatazha nyi?

¹⁹² Monai, basombolwele. Kupashang'anyatu kwa buntushi, kya bukine, balangulukilenga mba "babena kwingila mwingilo wa Lesa," nobe byonka byaubile Davida, mulungu wapwa, bino kupashang'anyatu kwa buntushi. Amiwa mbena kupembelelatu kamineti kamo. Nasaka namba anweba mulangulukile pakachi ka bibye bintu. Inge Nabula kwi kyaamba, kinetu Mupashi Wazhila ukekisolola, kukijishamo ku Basalululwa. Mwamona?

¹⁹³ Felo dinominesheni yanji yaamba mba, "Tuji na muntu wakonsha kuuba bintu bimo," kabiji ne abo bebyubile. Mwamona? Kika Felo kyo aubijile kikye? Kika Lesa kyo ekiswishishe? Kika Lesa kyo akosha kutumina waakine, ngauzhi washingwa manyi kuya kookwa na kuuba kiyukilo kumeso akwa Felo, kabiji wabwela waswisha dinominesheni kusombolola ne kwikimwesa ku bantu? Kika Aye kyo akonsha kuswisha kipashang'anya waimana kwikyuba, kabiji ne kuuba kintu kimo akyo Mupashi wa Lesa wakiine kyoaubapo? Monai, Kinembelo kyafwainwa kufikizhiwa.

¹⁹⁴ Monai, Aye waubile kikye pakuuba mba Aye akoseshe muchima wakwa Felo ne Benaijipita, kushinikisha Mosesa amba kechi yeyeka wajinga na Kyambo ne. Baubiletu bintu bimo byonka Mosesa byo aubilepo.

¹⁹⁵ Kabiji kika Lesa kyo aswishishe abye bintu kumweka mu moba akumpelo? Nanchi, kyo kintu kimo nobe mupashi wabubela byo aabile kwi Zendekiya, "Tusa kumukwata byepi Ahaba kookwa, pakuuba mba abye bintu bifikizhiwe?" Pano Usakusenda byepi abo bantu, saabaketekela mu bipwilo byabo, pakuuba mba baye ne kuswisha bibye bintu bifikizhiwe, abya Aye byo aambijile jimo? Abo, muino Nkulo ya Kipwilo kya Laodikeya, "Mambo obewa waamba mba amiwa ne 'munoshi, kabiji kechi nakabila kintu nangwa kimo ne. Naikala nobe mfumu.' Kechi nakajilwapo kintu nangwa kimo ne! Kabiji byo wabula kuyuka mba ne wa malwa, ne ulenga lusa, mpofu?"

Kabiji Nakubula namba upote kwi Amiwa,” Aye waambile mba, “manyi ne golonde.” Kika Aye kyo e kyubijile?

¹⁹⁶ Kika Aye kyo aswishishe bukishopang’anya kusoloka mumoba a kumpelo, umvwe abye bintu kebiye na kufikizhiwa kupichila mu Kyambo kya kiine kyakwa Lesa; kabiji ne kuswisha bipashang’anya baiya neabo bauba bintu bimotu, kabiji baabwela bakana Kyambo kya Lesa kyakine? Aye wamubijilekyo Mosesa. Kabiji Felo wikyubile kwimena Mosesa; kabiji abo, Yanesa ne Yambalesa, nabo bikyubile kwimena Mosesa. Kabiji Baibolo waamba mba kikabwezhapo jibiji mu moba a kampelako. Pano potuji. Bino, inge akye kechi Kinembelo kyafikizhiwa ne, nishi kijipi?

¹⁹⁷ Bushe Mosesa wapachikilenga nabo ne kwaamba mba, “Kuno! Kuno! Kuuba wauba kyokyo ne. Amiwa yami yeka watoongolwa kuuba kyokyo. Kuno! Anweba lekai kuuba byobyoy, poka pano?” Aye wibalekeletu baaya.

¹⁹⁸ Balekai batwajijile. Vulukai, Baibolo waamba mba, “Byooka byubilo byabo byo byasolokele, nanchi ne baabo mujuba jakupelako byo bakasololwa,” umvwe Musongwa washikulwa ne kutwaalwa mwiulu. Monai.

Mosesa, aye wajinga Kyambo kyakiine kyasololwa, kechi waambilepo kintu nangwa kimo ne, wikilekeletu kya ubiwa. Bino Aye wikyubile pakuuba mba akoseshe muchima wakwa Felo, ne kumujimbaika Felo.

¹⁹⁹ Aye waubile kintu kimo pakuuba mba Aye ajimbaike Ahaba. Kabiji awa shetu umo wakepa kamubiji waimenetu buke bwaji, Mikaya wakepa kamubiji, wibabuujile, “ABYO BYOBYAAMBA AYE NKAMBO.” Apo paimene mukwaabo, washingwa manyi, “ABYO BYOBYAAMBA AYE NKAMBO.” Kabiji bapusejilemo, umo ne mukwaabo.

²⁰⁰ Twimana leelo na ABYO BYOBYAAMBA AYE NKAMBO, amba lubatizhilo lwa mu meema mu moba akupelako lukekala mu Jizhina ja Yesu Kilishitu. Kabiji muntu mukwabo naye waimana ne kuuba bya kukumya, kabiji, Waketekela mu balesa basatu.

²⁰¹ Mbulai kyambo kya *tiliniti* mu Baibolo. Mbulai ako kutaanwa ba Lesa basatu. Mbulai ako kutaanwa bintu bya yeo musango. Kechi bijipo mu Kyambo kya Lesa ne. Kechi kujipo kintu kyakuuba mba muntu umo ao wabatizhilwe mu jizhina ja “Taata, Mwaana, Mupashi Wazhila,” kwingijisha bifulo. Abye bintu byonse, “Oo, kijitu bulongo, banyenga. Akyo kijitu bulongo, jitu na yalepa. . .suki yobe yaipipa. Akyo kijitu bulongo, kechi mwafwainwa kuuba *kikye, akya*, nangwatu *kikwabo*. Oo, aamo kechi muji maana ne, ayo ke milanguluko yakala.”

²⁰² Bino Baibolo waamba mba! Kabiji Aye walaile, “Mu moba akumpelo, Aye ukatuma Mupashi wakwa Elaija, kabiji ne kutela

bantu mba, baana ba kwa Lesa, kubweela ku Lwitabilo lwiine nobe byonka byo kyajinga kutendekelo, lwa mu Kyambo.” Akya Kyambo kya shinikishiwe, Mwaana muntu mumoba akupelako, byokatu byo kyajinga mu Sodoma; keesha, leelo, ne myaka yonse. Aye walaile kwi kyuba. Ke mulaye wakwa Lesa. Ke ABYO BYOBYAAMBA AYE NKAMBO.

Monai, abo baubiletu kintu kimo, nobe byonka byaubile Mosesa, posotu Lesa byo amwene mba yakilamotu.

²⁰³ Pano vulukai, ke ABYO BYOBYAAMBA AYE NKAMBO, kikeya nakufikizhiwa mu jino juba. Pano, kebakebai pantanda pose; tolai bupopweshi bonse bwa bubela, tolai mukoka uji yense, tolai mukoka uji yense, tolai kipwilo kiji kyonse! Ne mukambizha, mu Jizhina ja Kilishitu, kuba bibye, anweba basapwishi. Nemukambizha anweba namba mutange mu mapepala amajashi abyambo nangwa kulanguluka konse komwakonsha kuya, kabiji monai bibye inge kechi biji panopantanda pakino kimye ne. Mwamona?

²⁰⁴ Naanchi, Mateyo 24:24 ujitu bulongo. “Babubela, bashingwa manyi bakeya mu moba akumpelo, kabiji kukekala bangauzhi babubela, kabiji bakajimbaika bavula.” Kimonai mu bipasha, byonka byo kibena kwiya, mwamona, “Bakajimbaika bavula.” “Bangauzhi,” bavula; “Bakilishitu,” bashingwa manyi, bavula; bavula bapusanapusana, ba Methodist, mwayukatu, ba Baptist, kabiji ne ba Pentekosito, ne bakwaabo. Mwamona?

Bino kuji Mupashi wa Kilishitu wa kiine, kabiji akyo ke Kyambo kya alulwa ke muntu byonka Aye byo alaile kwikyuba.

Pano tusakuyako kulutwe pacheche, ku Binembelo bikwabo.

Posotu, Lesa wamona mba byakilamotu, nanchi popo byapwile. Byubilo byaabo bya solokele.

²⁰⁵ Monai. Vulukai, jinkuzhi jimwekatu pamo nobe jipeke ja wichi. Mwamona? Bino, kuuba mwaamba mba, akwa kunyuma mu nkulo ya Benaluther, “kinenge amba yo wichi,” bino kinji na Bumi mukachi kakyoo. Kinenge kijitu bulongo, Bumi mu kinenge bwajingatu bulongo, bino, vulukai mba, Bumi bwailengatu kulutwe; bwafumine kwi Elisha kuya kwi Elaija. Abo Bumi butwajijilatu kuya kulutwe. Bino, vulukai, bujitu mutampulo ikwabo. Kuuba bwaikajijila muyoya tampulo ne. Kuuba twanja kimbala kya munkulo ikwabo ne. Kuuba twanja kimbala kya Pentekosito, Methodist, nangwa Baptist ne. Monai, kyaikala ke kimbala. Tuji na Kanjo kapyo, ke Kyambo kya kino kimye, ne bikwabotu.

²⁰⁶ Vulukai, jinkuzhi jijitu pamo nobe jipeke ja wichi. Anweba kuuba. . . Kechi kya mwekelenga nobe ikyo mu buulubula ne, kechi kya mwekelenga nobe ikyo mukansalala ne, pakuba mujinkuzhi ja mwekelenga nobe iijo. Kechi kyamwekelenga nobe mu. . . Yesu Kilishitu ujitu pamo keesha, mwi Luther; kechi kya mwekele pamo mwi Wesley ne; bino kiine kyubiwa

mu Pentekositi, amba “kujimbaika bonka Basalululwa inge kyakonsheka kubiwa.” Mwamona? Ao omankulo enu.

²⁰⁷ Bino vulukai, amba kipwilo kya Pentekosito, mu moba akupelo, kyajinga Laodikeya; ne Kilishitu ba mulupwilemo, kene Kamuchima, Wichi, Ayemwine. Kimye Aye kyo aesekele. . . Vulukai, Aye byo aesekele kwisolola Ayemwine mu kipwilo, Aye bamulupwilemo. Kyakijingatu kipwilo, kitooteelenga akyo kine; kyashingwa manyi.

²⁰⁸ Bino *kino* ke Kyambo, Kilishitu Ayemwine, akyo ke Kyambo kyashingwa manyi kikeeya kunaanga Mubiji Wanji, ye Musongwa. Abo bamushingwa, ba kumeema amotu onka atekezhe wichi, nobe byonka byo twaambilengapo, oamo atezzha ne nseku, bashingwa manyi. Bonkatu Basalululwa, nangwa mba batongwelwa jimo, ibo bonka bakayuka lupusano luji pakachi kaabo. Pano, Efisesa 5:1 wiimubuula byobyoyo, kabiji ne byo kyajinga.

²⁰⁹ Abo ke bashingwa manyi. Muntu yense waamba mba, “Lukumo lwikale kwi Lesa! Twaakasuluka kuno. Aleluya! Atweba. . . Oo Aleluya! Twaamba munjimi, ne kukiilauka. Tuji na kukasuluka kwa banabakazhi; anweba mweseka kwibabiika mubintu byonse bye.” Mwamona? Yaingatu kulutwe. Kapaji kyo mwakonsha kuuba ne. Kwaamba mba, “Kyawama, twaamba munjimi. Tubijika. Tuzha mu Mupashi. Tusapwila Kyambo.” Kyakine. Kechi paji kya kwaamba pa kyokyo ne. Nanchi ne baabo banabalume kukwe kunyuma mu Baibolo.

Yesu waambile mba, “Bakajimbaika bonka Basalululwa inge kyakonsheka kuubiwa, bonka Basalululwa.”

²¹⁰ Pano monai, jinkuzhi. . . Kufuma kujiine Jipeke, aja Jipeke jaile mumushiji, Kechi kyajinga kabungwe ne. Jajinga Jipeke jimo, mwi Ajojiine. Pakuba byo jalupukile, kechi jajinga Jipeke ne; kyajinga ke Kabungwe, monai, mabuula, a jitaba.

Nanchi byo Jaile mu tampulo ikwabo, ayo yajinga ke kinenge. Neapotu kechi kyaesekenejile pamo na byo kyajinga pantendekelo ne. Kyakijiingatu bukabungwe.

²¹¹ Kya komene kyafika mu bulunkuzhi, mabuula avula, ke Pentekositi, peepitu kufika pakukoma. Ingi kimonai. Kibena kuya na kukoma kimye kyonse, kijitu peepi nobe ikyo, kimwekatu bulongo nobe Jipeke ja wichi inge mwamona aka kakipu kakacheche moomwa.

²¹² Bino pakupezhako Kiya kyamweka, kabiji kechi mwikala kabungwe ne. Kechi kuji mwingilo wakusenda ne. Kabungwe ke kakusendatu. Kechi kwa kikala bakusenda ne; kasalala kafwainwa kufwa, ne byonse byaashala bafwainwa nabyo kufwa, pakuuba wichi utwajijila kwikala na bumi. Awa ye mubiji wa lusanguko, waiya waikala ne kwibaseenda. “Neabo bapelako bakekala ke batanshi, kabiji neboba batanshi bakekala ke bapelako.” Monai, kwibaseenda kwi batwala mulusanguko.

Anweba mubena kulondela kikye nyi? [Kipwilo kyaamba mba, “Amena.”—Waku.] Kijitu bulongo. Monai, ajo jipeke ke . . .

213 Ajo jinkuzhi jimwekatu nobe jipeke. Kabiji muntu unji na bujimi bwa wichi, nangwa kituntu kikwabo, wakonsha kutala ne kwaamba mba, “Lesu Atotwe, Njina kijimwa kya wichi,” bino saabulapotu nangwa jipeke jimo ja wichi ne. Hmm? Akyo kimwekatu nobe wichi, bino sankiji jinkuzhi.

214 Pano, batemwe, bwelai pamo neamiwa. Kweepi kwafumine kusangululwa kutanshi, panyuma (ya lufu) yaoa moba jipeke ja wichi po japonejile mumushiji, aye Mubiji, aye Musongwa wa Kilishitu? Kilishitu wabikile Musongwa Wanji mu bukabungwe, abyo ibyo nyi, Kipwilo Kyanji? Aye kechi Wikibikile mu bukabungwe ne; Aye wabikilemotu batumwa, na bangauzhi, ne bakwobotu, mu kipwilo, pakuuba mba Kilamwe saakyatooka. Bino ku Nikeya, Loma, pakupitapo myaka fiili aduleendi ne sikisi, bekibungikile kabiji balengelemo ne kabungwe. Abyo ibyo nyi? Kabiji kyafwile. Kyonsetu kyabujilwe kuswang’ana na kyokya kipwilo kya ipailwe. Kabiji kya ikeletu, pa myaka aduleendi, mundochitu.

215 Bino, pa kupitapo kakimye, waishile mwi Luther. Musele mutanshi wa jitaba walupukile. Wa bubiji, waasapukile kufuma popa. Batwajijiletu kuya kulutwe, kwajinga Zwingli ne bakwobotu. Pano, pakupitapo ka kimye, kwaiya ba Anglican.

216 Kabiji pano kika kyamwekele? Pano kwaiya kusangululwa kupya kwaakwa Wesley, ako kasalala, aako kamwekele peepi nobe Wichi. Pano kika kya mwekele ku kyokyo? Kibungizhe, ne kuuma kyaumine kabiji ne kufwa kyafwa.

217 Abya bumi bwaile mu jinkuzhi, kabiji ne jinkuzhi ja mwekele peepitu nobe Wichi. Bino, kwiya kupezhako, musango wakyo waishile kumwekanyika mu myaka eiti nangwa teeni yapitapo, kukijishamo mu myaka isatu yapelako. Pano kyauba byeepi? Kyafumako ku Wichi.

218 Pano ngaakika kyo kwabujila kutatulwa kabungwe mu iye myaka tweeti yapelako yakukwe kusangululwa kukatampe; ke bangauzhi bashingwa manyi, bafunjishi bashingwa manyi, ne bakwobotu, bino kika kyo kwabujila? Kechi pajipo kikalako palutwe ya Jipeke ne. Monai, Kyabwela jibiji, kwaakubula kwikala bu kabungwe. Oo, ami, mpofu wakonsha kwikimona akyo. Kechi kyakonsha kwibika mubukabungwe ne; Kyakaana bingi kuuba kyokyo. Ke jipeke ja Wichi, Ajojiine. Aye Mwaana muntu ukasololwa. Ajo jipeke ja Wichi jikabwela jibiji mumusango Wajo, aye Mwaana muntu mu moba akupelako.

219 “Kabiji ku keya bakufwanyikizha babubela ba Kikye, mu moba akupelo, kya kuuba mba kya konsha kujimbaika bonka Basalululwa inge kya konsheka kubiwa.” Talai pano pa mankuzhi abo atubungwe abena kufumaamo.

220 Kiswishatu aye Wichi kuyukanyikwa, kuba Basalululwa, mambo lolubaji lo Bajiko. Monai pano akye byo kyawama kyaletwamo mumwe. Akyo ke... Monai, bashingwa manyi umvwe bakonsha kuuba; Basalululwa bakiine, batongwelwa jimo, Efisesa 5:1, nangwa, 1:5 byonkabyo, ba kekajikwa, basalululwa. Ibo bonkatu bakabulwa kujimbaikwa.

221 Monai, bashingwa bangauzhi bakekala babubela, kabiji moka mukachi kabu mu kekala ne bashingwa bakiine. Pano mukekibulang'ana byepi? Kupichila mu Kyambo. Nobe, tuji nakyu mu bukivule. Bushe mwikimonanyi? Aambai mba, "Amena." [Kipwilo kyaamba mba, "Amena."—Waku.] Mwamona?

222 Monai, bashingwa manyi, kyookatu Kyambo kyo kikeebabanya, kechi biyukilo ne. Oo, ine. Bakooba biyukilo bimotu, bino Kyambo kyo kikeebabanyatu. Kiine. Bonsetu baawilenga. Bonse baubilenga *bibye, abya*, kabiji ne *bikwabotu*, kine, bintu bimotu. Yesu waambile mba bakoobatu bintu bimotu. Bino Kyambo kyo kibabanye, monai, kechi biyukilo ne.

223 Bushe mwamonanyi? Yesu wibambijile papo, mu Mateyo 24. Aye kechi wambile mba, "Kukeya ba Yesu babubela mumoba akupelo ne." Oo, ine, kechi bakonsha kufikilamo mukyokyo. Ine. Mwatola waki Pentekosito awo Pentekosito mwiine, waamba mba, ayemwine, aye ye "Yesu"? Mwamona? Mwatola waki Methodist wabubela, nangwa waki Baptist, nangwatu muntu umo wamuye musango, nangwa umo wa butubungwe, amba, "Atweba twi Yesu"? Abo bayukisha bingi bulongo kyokyo. Abo kechi bakonsha kuuba kyokyo ne. Pakuuba Baibolo waamba mba kukekala "Bakilishitu babubela," kechi ba Yesu ne, kana, "Bakilishitu babubela." Abo kechi bakonsha kuswa kwaamba, mba, "Amiwa ne Yesu." Oo, ine.

224 Bino ke "Bakilishitu babubela," pakuuba abo kechi bekiyuka ne, mambo bapusenamo na Kyambo. Kabiji Lesa naye ushinikisha kintu kimo. Pano, Mbena kuletatu kikye pa kipimo kya kwikyombesha, mambo anweba mwamonapo bintu bimo kubiwa ku baabo bantu abyo byubiwapo mu bukiine. Kabiji ne Yesu wi kyaambilepo.

225 Bino, Naamba namba, kwi anweba bantu banji, kotwanungakana na mafoni koko, Amiwa—Amiwa kechi mbena kwi muzhachisha ne, pakuuba kino ke kipwilo kyaami ne—ne jibuumba jami ajo Mupashi Wazhila jo apelapo bukulumpe, kabiji Nafwainwa kwi babuula Bukine. Kimye kibena kumweka kupwa.

226 Bino, abo kuuba bafikilamo mukyokyo ne, kana, "babubela Bakilishitu," babubela, bashingwa manyi, peepitu na kiyukilo kyonse kabiji ne kisopelo kiji kyonse mu Kyambo. "Abo baketekela lubatizhilo lwa Mupashi Wazhila?" Kyaakine. "Kuketekela mu byonse *bye*?" Ee. "Mwaketekela mu kwaamba

munjimi?” Ee. “Mwaketekela mba biyukilo ne bya kukumya bikalondela, biyukilo bikebalondela?” Ee. Abyo kechi bya bu Methodists ne, abyo kechi bya bu Baptists ne. Ine, ine. Abyo keeba bu Pentekosito. Monai, aje kejuba ja pelako.

227 Bino, nkulo itanshi ya kipwilo kechi bekimwene akyo ne. Methodist nkulo ya kipwilo kechi be kimwene ne; Baptist nkulo ya kipwilo, neabo kechi bekimwene ne; Presbyterian nkulo ya kipwilo, kechi be kimwene ne. Bino, abo ba Pentekosito, bajitu peepi bingi nobe kine Kintutu! Apo popaji, aye Wichi. . .ajo jinkuzhi jijitu peepi nobe Wichi. Abo kechi be kimwene ne. Mwamona? Kechi ba konsheshe ne. Pakuuba mu moba apelako, ajino juba. Ee, mwane.

228 Monai, byonka byo kyajinga ku ntendekelo, abyo byobyoyo kikekala ne kumpelo. Byonka Eva byo alondolwejiilwe mungi Kyambo kimo, Satana byo aubile kwi Eva, kabiji wikiketekiile. Mwanamukazhi, kechi mwanamulume ne; aye kipwilo, kechi Aye ne. Mwamona? Akyo kipwilo ikyo kyatambwile kyambo kyabubela. Mwamona? Kechi Adama ne; Eva. Kechi aye Kilishitu ne; akyo kipwilo, aye musongwa, aye washingwa manyi, ye wafwainwa kwikala, saetela ayemwine mba Musongwa, monai, watambwile kyambo kyabubela.

229 Kuuba mwikimona akyo nenyi? Kika, bya kwatankanatu pamo nobe tambo ya pa kwaabilo, nobe koope ya kumeso enu. Kika, kyonse kyo muzhinkulapo, aye Baibolo, Wikikashilatu pamo. Eva, kechi Adama ne; Eva ye wikiketekejiile, kechi Adama. Aye musongwa leelo, byo-atelwa, wikiketekela; kechi aye Kilishitu ne. Aye musongwa uji namisango yonse, aye-witela mba musongwa; biyukilo bimotu, byakukumya bimotu, byonse pamotu; bino Aye kechi kyookine Kintu kitutulu ne. “Kujimbaika yeka Wasalululwa inge kyakonsheka kubiwa.”

230 Bino bukiji bukijitu, inge twakonsha kupwisha kikye mu mamineti fifitiini, tusakwikala pa kimye kyaitalwa. Mweshaitu bulongo pano, pakuuba mba—pakuuba mba kyumvwanike bulongo, kwi anweba.

231 Bino, ine, kuuba bafikilamo kutelwa mba “Yesu wabubela ne.” Kuuba bafikilamo ne, kutelwa mba, “Yesu.” Kine akyo ne. Akyo kyaikesha patooka. Yense muntu wakonsha kwikiyuka akyo. Muntu yense wakonsha kuyuka mba kechi ba Yesu ne. Kechi oene mambo ne nangwatu umvwe baikala na manyi panyuma yabo, ne mashi ku maboko abo kabiji ne meso abo kuya peulu-ne-pashi, bayukishatu bulongo mba ke. . .Muntu yense uji na milanguluko yawama, wakonsha kuyuka mba kechi Yesu ne. Mwamona? Kechi bakonsha kufikilamo mu kyokyo ne. Bino betela abobene mba “bashingwa manyi.” Kabiji booba biyukilo ne bya kukumya, “peepitu mu kujimbaika Basalululwa.” “Bino Bakilishitu babubela, bashingwa manyi,

ba keya, kabiji bakajimbaika Basaluluwa inge kya konsheka kubiwa.”

Pano mweshaitu bulongo. Kushalapo paino ng’ambilo ne, mambo kyafwainwa kwikiteleka.

Aye ubena kubikatu tepu kuyuwe maikolofoni papo, kukanya kuya kwalepa. Mbena kusulwila; nakuponessa patepu, mwayukatu.

Kabiji nanchi kikekalatu byokabyo moka Mokyambilwa, aye Baibolo, waamba mba byobyo kikekala. Mwamona?

²³² Monai, kechi Bayesu babubela ne. “Bakilishitu Babubela!” Abo bayuka mba bashingwa manyi, bino bayuka mba abo kechi ba Yesu ne. Monai, kyaikesha patooka. Inge muntu waiya ne kwaamba mba, leelo, “Monai mubito bya mumaboko yami. Monai kilungi kyami. Amiwa yami Yesu.” Kyawama, bino, twayuka mba akyo kyaya mungi. Kabiji, vulukai, Yesu kechi waambilepo amba abo bantu bakamweka ne. Aye waambile mba bakamweka ba “Bakilishitu babubela.” “Bakilishitu,” bavula, madinominesheni, ne bikwabotu, *bashingwa manyi*; bashingwa na mupashi wa ki dinominesheni, kabiji kechi Kyambo ne. Mubena kwikilondela nyi? Kechi Yesu wabubela ne. “Bakilishitu Babubela,” babubela, bashingwa manyi. Mwamona? Oo, byo kiji patookatu! Atweba byepi. . . Kine kechi kisakwimupita ne!

²³³ Pano, vulukai, Amiwa ne mubula kimye kyonse amba kuji misango ya bantu isatu. Kuji mintundu ya bantu isatu: Hama, Shemu, ne Yafeti, mintundu isatu. Misango isatu, kabiji Naamba mba, ao ke waitabila, kitabila-mbijinga, kabiji ne wabula kwitabila. Kimye kyonse byo kiji, kimye kyonse byo kikekala. Mwamona? Kwajinga Mosesa, waitabila; kwajinga Yanesa ne Yambalesa; babula kwitabila. Mwamona? Kwajinga ne Balamu; Mosesa. . . Kimye kyonse misango ya bantu basatu, misango isatu; waitabila, bakitabila-mbijinga, ne wabula lwitabilo.

²³⁴ Pano vulukai, wabula kwitabila, ke kipwilo kya dinominesheni, kechi baketekelapo mu biyukilo nangwa pachechetu ne; munyango, bakinsho, bakosakana, kipwilo kya muntanda, ke dinominesheni. Bino aye kitabila-mbijinga ke jinkuzhi. Awe ye muntu witabila-mbijinga. Kabiji kuji waitabila kinekiene ao uji wakishiika. Bino, bamonai byo booba, pa kakimyetu kacheche.

²³⁵ Kabiji monai abo babula lwitabilo byo banshipa, nangwa baabo bakitabila-mbijinga ne babubala kwitabila. Ami! Baikala bachinchika, talai, pamo nobe Satana byo aimene mu Kyenya kya Kyambo kyakiene, kabiji waambile mba, “Kyanembwa mba!” Abo ibyo nyi?

²³⁶ Kika Satana kyo aubijile kyokyo? Ke mambo akuuba mba kechi wayukile Kyambo kya kyokya. . . Aye wayukile mba akya Kyambo kwajinga kya kyokya kimye, bino aye wamuzhinakile awa Muntu wikepesha wa kamubiji kacheche kwiikala kyokya

Kyambo. “Inge Obewa yobe Mwaana Lesa. Nayuka mba Mwaana Lesa ubena kwiya, mambo Kyaamba mba Aye ukooba kyokyo. Kabiji kyanembwa mba, ‘Aye ukatuma ba Malaika Banji kukulama Obewa.’ Mwamona? Kinshinikishai kwi ami! Ubai kya kukumya! Lekai ami mone Anweba mwikyube.” Mwamona? Mwamona?

²³⁷ Mwamona, aye wabula lwitabilo, kitabila-mbijinga, kiipashang’anya. Talai Yundasa awo wajinga mukachi kabo, pa kimyetu kimo, kitabila-mbijinga! Mwamona? Monai, kabiji pajinga ne Kyambo kyakiine.

²³⁸ Ngaa byobaji bachinchika! “Bino, kechi muteeko muchima ku byobyoy bya bulamo maana ne. Kechi paji kijimo Mukyokyo ne. Kechi muyeko kokwa ne. Ke jibumbatu ja kyoongo. Kafwako bijiko ku Byobya ne. Abya ke byakufwanyikizhatu. Abyo byo biji mumilanguluko yenu.” Monai, monai mo Nekitazha nyi? Imanaitu mu Kyeenyi kya Kyambo ne kwi kyaamba.

²³⁹ Satana wa endelemo. Byonka byaamba Baibolo mumwe mu Yunda, “Neaye Malaika mukatampe, byo apachikilenga ne Satana, waaambile mba, ‘Aye Nkambo akulengulule.’” Kwiimena Kyambo Akyokine!

Kabiji awe ye antikilishitu, ba mushingwa, ne kwimana poopa nakupachika Kyambo kyakiine kya kimye, Yesu Kilishitu, kabiji waambile mba, “Kyaaneembwa mba.”

²⁴⁰ Ngimonai muboba akupelako. “Kikekalatu peepipepi kyakuuba mba kyakonsha kujimbaika Basalululwa inge kyakonsheka kubiwa.” Oo, ami! Eene mambo Basalululwa kyobakabula kujimbaikwa, mwayuka eene mambo nyi? Kenamambo akuuba mba abo ke ba Kyambo. Mwamona? Kijitu pamo nobe Bumi buji ku mizhazhi, Naambile namba kimye kyapita, Kuuba kikaana Akyokine ne. Monai, Ke Kyambo ne mukimye kya Kyambo. Abyo ibyo.

²⁴¹ Pamotu nobe Yelemiya, aye wayukile. Nangwatu Hananiya ambe kyamusango byepi, aye wayukile pooaimejile. Abyo byobyoy kyajinga ne kwi Mosesa, ne—ne kubonse bashala. Kokuuba mba, aye wayukile, nangwatu ngauzhi wabubela ambe byepi, kwajinga Kyambo kya Lesa. Kyajinga kyaaneembwa.

Ao oene mambo Mikaya kyo aambijile mba, “Kijitu bulongo, pembelelaikotu mumone.”

²⁴² Ahaba waambile mba, “Naketekela bangauzhi bami. Kabungwe kami kajitu bulongo. Umvwe Nabwela mumutende. . .Mukamubiike awa muntu mukaleya. Keya kumwingijilapo! Mupai shinkwa wa bulanda. Mufumyaimo, kwikala nanji na lumvwang’ano lwabupopweshi ne. Umvwe Nabwela mumutende, tukengijilapo pa yuwe muntu.”

²⁴³ Mikaya waambile mba, “Inge kine mwabwela, abya Nkambo kechi waamba ne amiwa ne.” Aye wayukile mba wajinga na

ABYO BYOBYAAMBWA AYE NKAMBO, kabiji kimwesho kyanji kyajingatu pamo na ABYO BYOBYAAMBWA AYE NKAMBO; kechi kya mukimye kikwabo ne, kanatu mukyookakya kimye. Amena! Aleluya! Mu kimye!

Talai, waimana ne kupachika na Malaika mukatampe! Kyaambiwa, mba, “Bakosama benda na kwabilo apa pachiina Bamalaika kwendapo.” Abyo ibyo.

²⁴⁴ Eene mambo Basalululwa, Yesu waambile mba, kechi bakajimbaikwa ne, mambo abo kyokyokya Kyambo. Kuuba baikala kintu kingi ne. Kuuba baumvwa kintu kingi ne. Kechi bayukapo kintu kikwaabo ne. Abyo ibyo.

²⁴⁵ Vulukai, Mosesa kechi wasendelwe nakusombolola kwaabo ne. Bushe byo anjinga nyi? Mosesa waambile mba, “Pano, pembelelaikotu kamineti kamo, Felo. Mwayuka eene mambo nyi? Aye Nkambo wambujiile mba ngube kikye, bino, lukumo lwikale kwi Lesa, Namona mba basongwalume boobe bakonsha kuuba kintu kimo. Nanchi, Nemubula kyo Nsakuuba, Nsakukwatakana nenu”? Aa! Akyo kechi kibena kyumvwanika nobe ngauzhi wakwa Lesa ne. Ine, kinekinene! Aye waimenetu saka akonsa. Aye wayukile, kiine, amba Lesa usa kwikilamawizha muji monse, mambo Aye walaile kwikyuba. “Amiwa kekala ne obewa. Kechi kakuleka buke ne.”

²⁴⁶ Aye wayukile, okao mambo kechi wakwatakeene nabo ne. Oo, ine. Aye waiketetu bulongo naabo. Aye kechi wakebelenge madinominesheni abo ne. Aye waiketetu bulongo na Lesa. Aye kechi wasendelwe nabintu byonse byo baubilenga ne. Umvwe baubapo kintu kimo. . . Aye waletapo kuso; neabo baleta kuso. Aye waleta mashi; neabo baleta mashi. Aye waletetele bintu byonse; bamusombolwele mujishinda jiji jonse, nakulondelatu. Aye waimenetu nzoo. Aye wayukile bulongo, kika, Lesa wajinga pakito.

²⁴⁷ Pano mwaumvwisha nyi? [Kipwilo kyaamba mba, “Amena.”—Waku.] Mwatola tubiji na tubiji, kabiji mwalenga foolo? [“Amena.”] Anweba kechi mukeba kupya kyabaya ne. Nanchi, nanchi anweba—anweba mwaumvwa nyi, monai.

Kika? Abo kechi bakabepaikwa kukikye ne, waitabila kyakine, abo ke Lukunwa watongwelwa jimo awo wafwainwa kwimana mu juba.

²⁴⁸ Nobe, neaye, Yesu waambile bibye, “Bavula bakeya mujooja juba, mu Jizhina Jami, kabiji ne kwaamba mba, ‘Nkambo, bushe kechi Napangilengamo bademona mu Jizhina Jenu?’” Yesu waambile mba, “Mumoba akupelo, kimye byo kikapwa ne lusanguko lukatampe byo lukafika, amba bavula bakeya ne kwikala mu Bufumu.” Abo Bufumu bwa Lesa buji mwi anweba.

²⁴⁹ Bavula, seku ikeya ne kwikalapamo na Wichi, ne kwaamba mba, “Pano, pembelaiko kamineti kamo, Nkambo! Naambile

na njimi. Nabijikile. Nazhiile mu Mupashi. Paanga bademona. Naambile na njimi. Naubile abye bintu byonse.”

Pano Aye ukaamba mbaka? Monai. “Anweba anweba ba kuuba bibi, kechi Nemuyukilepo ne.”

²⁵⁰ Nga *bunguba bibi* bobuka? Impuzhai muntu umo. Ke “kintu kyo mwayuka kwi kyuuba, pano bino kwi kyuuba ne.” Abo bayuka akya Kyambo. Abo be Kyumvwa. Mubena kuteleka kuyuwe tepu. Mubena kuteleka kuino Mbila. Mwamona Nkambo Lesa wikyaamba; mwamumona Aye wikinshinikisha, kwikilengela kwikala kyakine. Kabiji mwayuka mba Akye kijitu patooka nobe juba jasamina pangye, bino anweba mukakwachijilatu dinominesheni yenu, kukwachijila bintu bya bubela; anweba bakuuba bibi!

“Oo, ee, Najinga na mpwijilo ikatampe. Naubile *kikye*. Naubile *kyokya*.”

Waambile mba, “Anweba Mfumai, anweba bakuuba bibi, kechi Nemuyukilepo ne.”

²⁵¹ “Kyawama, Mupashi Wazhila wapoonejile.” Amiwa kechi nazhinauka kyokyo nangwa pachechetu ne. “Naambile munjimi. Naiimbile mu Mupashi. Naubile. . .” Amiwa kechi nazhinauka kyokyo nangwa pachechetu ne. Kechi pajipo jimpuzho pa kyokyo ne. Oo, mulongo, nyenga, kiji mung’anyi musango!

Kino ke kimye kyakuzakama. Tuji peepi? Akye Kyambo kibena kwiya ku Bumi pano. Monai.

²⁵² Ee, Aye waambile mba bakooba kyokyo. Monai, “Anweba bakuba bibi.” Njina Kinembelo kya neembwa paapo. Ami kechi nayukatu pokiji ne. Nasenda kimye kyabaya bingi. Nsawkikikeba, mu kakimyetu kacheche, ne kumona byajingapo. Njina—Njina Mateyo 7:21. Ami—Ami kechi nayuka pokiji ne. Amiwa, bimye bimo bintu bimo kechi Nebinemba ne, kyawama, Ami—Ami inge nasapwila muyuwe musango, Ndu—Ndubako ne Kinembelo kyo Mbena kutazhako. Mateyo 7:21.

Kechi bonse bang’ambila mba, Nkambo, Nkambo, bakatwela mu bufumu bwa mwiulu ne; poso awa uba kyaswa muchima wa Taata wa mwiulu.

Bavula ba kang’ambila ami mu aja juba, Nkambo, Nkambo, bushe kechi twaawilenga. . .

²⁵³ Bangauzhi, bashingwa manyi! Abyo ibyonyi? “Kechi twajinga bangauzhi nenyi? Kechi twajinga bamushingwa nenyi, bashingwa manyi? Bushe kechi Naawijilenga mu Jizhina Jenu nenyi? Kaabiji mu Jizhina Jenu kechi Napangijilemo ba demona nenyi?” Wakonsha kuba byobyo byepi, ne kukaana ku batizhiwa mu Jizhina ja Yesu? Mwamona? Oo, ami! Monai byo kyaikala kya kujimbaika? Kufikatu ne pakyokya kifulo, bino ke kubwela kunyuma. Baya bakafika ne pa Kyambo, bino ke kubwela panyuma. Pano monai kikye. Tufumyeko kikye, pa kaminetitu.

Bavula bakang'ambila mba ami... Nkambo, Nkambo, bushhe kechi twaawilenga nenyi, twajinga bangauzhi?...

Ee, Naji kwaamba pakyokyo mu Mateyo 24:24.

...kabiji mu jizhina jenu... napangijilengamo ba demona? kabiji mu jizhina jenu naubijilemo byavula bakyu-... yavula mingilo nenyi?

Ponkapo nanchi Ami nkebambila namba, Awa kechi nemuyukilepo ne: mfumai anweba ba kuba bibi.

²⁵⁴ “Byo Kyaletelwe kwianweba ne anweba mwi Kimwene, kabiji mwi Kimwene saka kyeenda, mwi Kimwene mba Kyambo; kabiji namambo adinominesheni yenu, anweba mwi kikwachijiletu. Amiwa kechi nemuyukilepo ne. Amiwa kechi nasakamana ne nangwa mwapaanga badiabola bavula byepi, nangwa mwaubile byavula *bibye* ne *byobya*; Amiwa kechi nemuyukilepo ne.”

Balamu waambile mba, “Naawiletu bulongo, mu Jizhina Jenu. Nekufikizhiwa kya fikizhiwa.”

“Abyo kine ibyo, bino, pakuuba inge kyaiya ku Kyambo, mwi Kikaine.”

²⁵⁵ Oo, mulongo, monai kibese kyalujimbaiko? Kechi “ngauzhi,” ne kine; kanatu na Kyambo, Kyambo kya kine, Kyambo kyashininkishiwa kyaasololwa. “Anweba bakuba bibi!”

Esekai, Satana waeseka mu mankulo onse kufwanyikizha Kyambo kya kine. Twayuka kyokyo, kechi twayuka nenyi?

²⁵⁶ Monai, waiya wafika ne kumupaka kabiji wabwela wikileka. Talai kuno, aye waambile mba, mu Bahebelu kyapitala kya bu 6 (Pano, twajikutanga kakimye kapita kacheche, Najikwimubula anweba, “bwelai kunyuma ku kikyeye,” kabiji tusakwikyuba pa mamineti abena kwiya kulutwe.), aye waambile mba:

...pakuuba miba ne bisonsonya... uji pepi ne kulengululwa; ne mpelo yanji ko kusokwa. (Bakumupaka!)

...pakuuba batompele... ku kya bupe kya mwiulu,...

²⁵⁷ “Batompele,” mu byambo bikwabo, anweba mwi Kimwene! Kuba [Mulongo Branham watobanya mivumbo yanji pamo—Waku.] wikitompatu na kyatunwa kyobe ne. Pakuuba wi Kimwene, kabiji wi Kiyukile mba kya Bukiine. Anweba mwi Kikyukile mba kya Bukiine. “Batompele kya bupe kya Mwiulu.”

...kabiji baubilwe ke bakutambulako Mupashi Wazhila, byonka byo Aponejile pe obewa,

...batompele ku mambo awama a Lesa,...

“Batompele,” wi Kimwene mba kyawama. “Kabiji ne Mupashi Wazhila wakuponejile,” luseku mu bujimi.

. . . kabiji babwela *bapondoka*, . . .

“Ke kukaana yeka Kilishitu awo wakuzhijikile, ne kuukwita, kabiji wabika ne kokwa kushingwa pe obewa.”

. . . *kechi kwakishala kitapisho kya* bubi ne, na mambo akyo kyo.

Ke akubula kulekelwa! “Kechi kyakonsheka kwi babusha jibiji kumaana a Bukine ne.”

Mambo mambo aboba baubiwe ke . . . bakutambulako Mupashi Wazhila,

258 Waponejile pa seku, monai, “Batatwile ne Yesu, kabiji, ‘Nkambo, Amiwa mbena kupitatu,’” pakuuba umvwe mwafika pa Kyambo, mwabwela kunyuma. “Baalwilwe ke bakwabanako Mupashi Wazhila, kabiji ne kutompako, nangwatu bamona Kyambo Akyokine kisolola.” Kabiji babwela ba Fumako, “Ke kintu kyashupa bingi abo pakuba mba be Kimone nangwa mba beye kwi Akyo.”

259 Abye BYO BYAAMBA AKYO KINEMBELO. Pano, anweba . . . “Meulu ne ntanda bikapita, pakuuba Akyo kechi kikapite ne.” Mwikimona nyi? “Kyaikala kyashupa bingi.” Aye Baibolo byobyoyo aamba, kabiji ne Mupashi ushimuna bukamonyi bwakyokyo.

260 Monai, lekai ne mupe kyakumwenako kicheche. Monai pa boba bantu balupukile na bungauzhi bwakwa Mosesa, balupukile mu kabungwe, kabiji ne kufuma mubintu byonse, mubobwa bungauzhi, bamwene mingilo ikatampe ne bya kukumya, ne bintu bya byonkabyo, kabiji baishile kufika ne kumupaka wakutwela.

261 Pano, Lee, jamweka “jizhina jobe mu Buuku.” Mwamona? Mwijilubako kwi jinemba. Kabiji anweba mwabula pano, ne anweba muji mu—mukunungakana kwa-mafoni, ke Dokotala Lee Vayle waikala paapo. Aye ubena kumunemba na mulaka waitabilwa awe buuku wa ma Nkulo Abipwilo Bitanu nabibiji. Kabiji lukatazho lwaishile, nangwamba jipuzho, namambo ajenu “jizhina kufumishiwamo mu Buuku wa Bumi wa Mwaanamukoko.” Monai, kyakumishe bingi bavula bamingilo. Bino pembelelaitu mukatambule buuku, mukeyyumvwisha inge mujipo Kyeya kijikyonse mwi obewa. Mwamona?

262 Monai, pano, mukafumyako mutwe wenu ne kukeba kubula kutalapo pe Aye ne inge kechi mubena kukeba ku Mumona ne. Nobe byaambanga bamaama, “Anweba kuba mwafumya mashi ku mungu ne, mambo kechi mujipo mashi ne.”

263 Monai, Kyeya kyafwainwa kwiya; kechi kiji mufishi ne. Akyo Kyeya kiya mufishi, kabiji ne fishi kechi iyuka Mokyaila ne. Monai pano bashingwa manyi mujino juba.

264 Nobe byonka Mosesa byo alupwile baana ba Isalela; kabiji abo batelekele ne abo bafikile pa kulubakanya milanguluko

na kyokya kyaalo kikatampe kookwa. Bino, Isalela wajinga wabulamudinominesheni. Kechi bajinga na ntanda ne, kechi bajinga na muzhi ne. Bailenga kumuzhi.

265 Atweba kechi tuji na kipwilo ne. Atweba kechi . . . Atweba— tubena kuya ku Kipwilo, Kipwilo kya Mubeji, Kipwilo kiji mu Lukumo; kechi kipwilo kiji panopantanda ne, akyo kya muntu. Akyo Kipwilo kiji mu Lukumo, bonka-baitwa, batongwelwa jimo Bumi bwa Penape, monai, babena kuya ku Muzhi kwabo.

266 Kabiji byo bafikile pampuzha ya kuuba mba babuke, abo bazhinaukile Kyambo, kabiji babwelamo. Panyuma yakwa Yoshiwa ne Kaleba ne bakwabo byo baile moomwa kabiji ne kuleta kizaza kya magelepu, pakuba mba kibashinine amba ntanda koiyi, Kyambo kya mulaye wakwa Lesa, “Ke ntanda yawama, mukaka ne buki.” Kabiji baletete, kululwe lubanji, pa kuuba mba kibashiinine. Kabiji beitompelepo, ne kwaamba mba, “Oo, oo, atweba kuba twikyuba ne, nangwa byo kabyo.”

267 Kika kyamwekele? Abo baonawinwe mungyetu. Abo baiketetu mokamwa ne kwilenga kabungwe abo beene, ne kufwa bafwile, bonsetu bamwiabo, pakuuba abo baile mubushiya ne kwibabwezha, Yoshiwa ne Kaleba; Mosesa wa tutulwilwe. Ke kipasha kya kupembelela Kipwilo; kabiji ne lusanguko lwa Lulayang’ano Lwakala, Lulayang’ano Lupya; kabiji ne Mubiji washikulwa. Monai ndoonda yabisatu? Mwafwainwa kulama ao ma fiili mu ndoonda, monai, nanchi, mwi witabila ne wabula kwitabila. Mwamona?

268 Monai byo kyajingatu “kya pwijijika.” Vulukai, Lesa kechi wibalekejile abwa bubi ne. Ngapano bakeyamo byepi? Inge miba, kya kutatwilapotu, ke miba ne kumpelo. Bonkatu batongwejlwe jimo boba Kekimona.

269 Monai bulongo. Pamo nobe mumoba akwa Martin Wazhila, sakakikyangye kufika kya Nkulo ya Fishi; muntu wawama wakamubiji kacheche. Baanga batangapo nembelo ya kwa Martin Wazhila? Bavula bamwianweba batanga. Twaile nakusenda byanembele Martin Wazhila; ng’anga waambile mba, “Bino kechi waitabilwe amba wajinga wazhila ne.” Kine, kechi waitabilwe ne; kechi kwi abo ne, bino wajinga kwi Lesa. Aye Mupashi Wazhila witubujile mba tumubikepo amwa munkulo ya kipwilo kya busatu. Mwamona?

270 Monai yuwe mwanamulume wa kamubiji kacheche wa bulesa byo ajinga; waichilwe, watongwejlwe jimo. Basemi yanji, batushi. Bashaji, bashilikale. Aye walondejile ndoonda yanji, kwikala mushilikale. Kabiji, byo aikele, kabiji kimye waketekejile mba kuji Lesa kutukumo; muntu watemene mungyetu, kabiji wakonsheshe kumona Lesa. Juba jimo wapichile mu muzhi umo, kabiji kwajinga muntu kileya walajile kokakwa, wafwilenga, waipwizhenga muntu umo. . .

Aye waumwine mashika abwa bufuku. “Oo,” waambile mba, “peepo kintu kya kwivweta; Nsakufwa bufuku buno.”

²⁷¹ Kapaji nangwa umo wikyubile ne. Kabiji Martin waikela kulubaji lumo saabena kumutala pa kakimye kacheche. Kafwapo nangwa umo wikyubile ne. Aye wajingatu na mukukumba umo. Aye wafwilenga mashika, ayemwine, aye wajinga pamwingilo, inge aye—aye wamupa awa mukukumba. Nanchi walangulukilenga, “Atweba bonse babiji twakonsha kwikala na bumi inge Nakonsha kumuchibilako.” Nachi watolela mukukumba wanji, ne kumwabanyapo pabiji na mupanga wanji, kabiji wamuvwetele awa kileya mukote. Aye wipombebe mukukumba wanji.

Muntu yense waambile mba, “Talai awe malonda unji na mwekelo-yabisela. Talai awe mushilkale ubena unji namwekelo-yabisela, wipombakanyatu mukukumba yebatabulapo!”

²⁷² Bufuku bwalondejilepo, byo akombokele ne kulala pamwanya wanji, bamubunshishe. Watajile, waimana monka mukibamba, kabiji Yesu Kilishitu ye waimenemo wapombwa mu kyookya kibese kya mukukumba yeka ye amupombelemo. Aye wayukile pookapatu, “Kyo mukobila twatucheche Twami, nishi mwaubila Amiwa, ku mushingwa Wami,” walala popa.

²⁷³ Aye wajinga kalume wakwa Lesa mutampe. Akyo kipwilo kya musekelenga, kumumanyika, ne kumupanga, ne biji byonse, bino wajinga ngauzhi wakwa Lesa. Aye byo aambile byafikizhiwe. Kuji bavula bamuketekejile mu yoya nkulo, ne abo.

²⁷⁴ Nasaka kwi mumweshwa diabola byo ajimbaika. Juba jimo waikela mwakutangila. Kwaishile malaika mukatampe, ne muchinya ku mutwe wanji, wawwala ne makwabilo agolonde, ne mukwandala wa golonde ye epombebe, ne kwaamba mba, “Martin, wanyuka ami nyi?” Aye waambile mba, “Amiwa ne Nkambo yobe ne Mupulushi. Amiwa Yami na kupulwishe. Pompwele amiwa, Martin.” Bino awa ngauzhi, byo ayukile mba pajipo kintu kimo kyapusanako, watwajijiletu na kumutala. Aye waambile mba, “Martin, Amiwa yami Mupulushi, Yesu Kilishitu. Pompwele! Bushe kechi wanyuka nenyi, Martin?”

²⁷⁵ Martin watwajijiletu na kumutala, Kinembelo saka kibena kupitang’ana mumilanguluko. Aye waambile mba, “Satana, mfuma kwi amiwa.” Aye waambile mba, “Unji na muchinya ku mutwe obe. Pakuba Kyambo kya kwa Lesa kyaamba mba Banji ‘bzhijikwa boba kamuvwika Aye’ kumpelo ya nkulo.”

Bushe akyo kechi kya konsha kwikala ke kiteyo kya ki Pentekosito nenyi? Talai ku Kyambo, mulongo. Apo popaji fweto.

²⁷⁶ Juba jimo, jikwabo, mu koponyi wabzhijikwa, bajinga na wazhila mukote monkaamwa, jibuumba ja bzhijikwa bakyanyike. Mwajinga umo awo wamyendeleko. Talai kikyey,

apo paji kyawama—kishipi kyawama leelo. Aye wakebelenga kwikala kintu kiji peulu ya bonse. Aye wakebelenga kwi mwesha ayemwine, luusa, kintu kimo kikatampe, kintu kimo kyawamisha, kukila bonse, mwayukatu, kabiji kintu kimo kikatampe. Aye wafwaijilwe kwikala wa peulu. Kimye kyonse kechi wakebelenga balongo... Mwayukatu, aye wafwaijilwe kwikala wapusanako. Mwamona? Aye, nangwa kyajinga kya byepi, aye wajinga wa bwitote. Aye jojoka jibwe jawama ja pakitulu. Kechi pajingapo nangwa umo wakumukwata ne. Pano monai kyamwekele. Aye wakebelenge kwikala na kintu kikatampe. Aye wakebelenga kwesakanya na—na tubungwe tukatampe. Anweba mubena kundondela nyi? Mwamona? Nanchi, aye waambile mba, aye waawile. Aye waambile mba, “Aye Nkambo wangelula lwikala ngauzhi, na amiwa. Amiwa ne ngauzhi.”

Pano, bino mwajinga umo wayukanyikwa ngauzhi muntanda, kabiji awo wajinga Martin Wazhila; aye wasemekelwe bungauzhi.

²⁷⁷ Pakuuba awe mwanyike waambile mba, mulunda mwanyike waambile mba, mwanyike wazhijikwa unji peepi nobe myaka tweeti-faivi, waambile mba, “Aye Nkambo wandenga amiwa kwikala ngauzhi, kabiji Nsakwikishinikisha kwi anweba.” Waambile mba, “Bufuku buno Nkambo usa kuupa mukatampe, mukukumba wawama, ne kumubika pe amiwa, mukukumba utoka, ne kwikala mukachi kenu. Pano anweba bonse po mukeya kwi amiwa, monai, kabiji po mukatambula mikambizho kufuma kwi amiwa.”

Pano esakanyai kyokyo leelo, monai, “Amiwa nsakwikala mukulumpe wa kabungwe. Nsakwikala na luusa pe anweba, anweba bonse bazhijikwa.”

²⁷⁸ Kabiji kyakinetu, “Abwa bufuku, malaiti aishile mu kishimikwa,” nanchi bya neemba Martin Wazhila byaamba mba. Katangaipo. Kabiji byakine. Ke jishimikila japita kala. Kabiji malaiti aishile, kabiji ne bonse be amwene, kabiji kwaiya... Aye wajinga namukukumba utoka, waimene mukachi kabo. Aye waambile mba, “Mwamona byo Naji kwimubula?” Bino akya kyajinga kypusanakotu na Kyambo.

²⁷⁹ Kabiji byo aile nakuleta mukulumpe wa sukuulu, aye waendaukile-kuya-nekubwela pacheche, waambile mba, “Mwaanami, akyo kechi kibena kumvanyika bulongo ne.” Aye waambile mba, “Pajitu jishinda jimotu.” Kiji bino! “Pajitu jishinda jimo jakuyukilamo. Kyamwekelenga kyakijishamo.” Mulunda, Pentekositi aye nge wikitolele, muzhazhi, kwikibizha, mundoonda, kwikikoba, ne byonsetu byashala! Aye waambile mba, “Kyakukumya kya konsha kumwekatu bulongo, bino kechi kya konsha kumweka bulongo mwaila Kyambo ne. Pano, tuji

namuntu wamusango yewo, ngauzhi mushingwa, wajizhina ja Martin. waishile, waya kwi aye.”

Aye songwalume waambile mba, “Ine, ine! Martin kechi ujipo na kyakuuba pa kikye ne.”

Kabiji waambile mba, “Ubena kuya, nangwa byokabyo.” Kabiji ba mukwachile pa kuboko, ne kumutwala kwi Martin, kabiji ne mukukumba byo aiile kufuma kwi aye.

Monai, “Kujimbaika bonka Basalululwa inge kya konsheka kubiwa.” Monai, abo bebayuka. Yesu waambile mba, “Yami mikoko yaayuka Kyambo Kyami.”

“Oo,” mwaamba mba, “kumvwa *Jiwi Jami*.”

²⁸⁰ Akyo kyo Kyambo Kyanji. “Muntu kechi ukekela kushinkwa bunke ne, kana ku Kyambo kyonse.” Mwamona? Abo batongwejilwe jimo bekiyuka kikye. “Kyabula kuyukanyikwa kyambo, nangwa jiwi jenyi, kechi bakalondela ne.”

²⁸¹ Abyo byokyajinga ne kubaabo balunda kunyuma; kechi bakonsheshe kulondela ne. Abo bayukile mba Martin koaji, ngauzhi wayoya wankulo, wayukanyikwa na Lesa kupichila mu Kyambo, wayukile Kyambo. Kabiji awa muntu kechi wakonsheshe kuswisha Kikye ne.

²⁸² Aye kabiji waambile mba, “Paji Mubiji wanyama wafwa,” nangwa mba Kyambo, “apa ponka, mu kyokya kimye, po pa kapwilakena ba mpungu.” Pano awo ke Mate- . . . Inge mukeba kunemba kyokyo, ke Mateyo 24:28. Pachechetu kunyuma yanji, Mateyo 24:24; maveleshi foolo, monai, inge mubena kwikikeba. “Paji Mubiji wanyama wafwa,” paji Manna, paji Kyambo, “apo ponka po pakapwilakena ba mpungu.”

²⁸³ Pano Nafwainwa kupelawizha. Nakutalapo ne kumona kana kimyeka. . . Ke—ke mamineti seebeni nangwa eiti kufuma pa twelufu. Nsakupelawizhako bukiji bukiji, nangwa twakonsha kupwisha bufuku bunu, inge ne monse motusakwikyubila mokamo. Lukeelo luno nangwa bufuku? Uu? Baanga basakuya kunzubo pa kupwisha kwipwila, tumone maboko enu, monai. Oo, ami, kyawama kutwajijilatu!

²⁸⁴ Mundekeleko mambo pa kubazha bantu baji pa mafoni muyekawe musango, bino Nsakupelawizha. Kyakila kunema pa mali enu. Naketekela byo kiji, kwi amiwa, monai. Mali enu akonaika. Akye ine; Ke Kyambo. Mwamona?

²⁸⁵ “Paji Mubiji wa nyama wafwa, apa ponka po pakapwilakena bampungu.” Paji Mubiji wanyama wafwa, paji apa—apa—apa paji kwipaya, apa ponka pakapwilakena bampungu. Paji Nyama ibishi, ke Kyambo kya kimye, apa ponka pakapwilakena bampungu.

²⁸⁶ Pakuuba umvwe yabola, apo makubi po akanyemenapo. Ee. Mwamona Moonekitazha nyi? Inge baipayatu, bampungu nishi keebeye; pano umvwe yaikala popa, ne kubola, nishi pano

bamakubi ke beye. Ba mpungu kechi bajipo nakyo na mwingilo ne. Mwamona?

²⁸⁷ Yesu waambile mba, “Paji Mubiji wanyama wafwa,” apa ponka paponena Manna, abwa bonka bufuku Manna apya po akipona, “apa ponka bampungu ba Kekipwilakena.” Aa o Manna ajoja juba. Mwamona? Monai.

²⁸⁸ Pano inge yabola, mapila atwelapo, apa bino makubi aiya. Kechi bakonsha kumvwa bwemane kanatu yabola. Oene mambo Yesu kyo a imejile popa ne kwaamba mba, “Yelusalema, anweba mwaashile mabwe bangauzhi bonse!” Monai ng’ambilo yakutazha kubumuntu, monai, “Yelusalema, Yelusalema, jiinga Amiwa jo. . .” Aye wajinga Ng’anyi? “Jiinga Amiwa jo ne mubungizha byonka byuba kyaje pamake anji, anweba mwaashile mabwe ngauzhi yense ye Nemutumijile,” akya kipwilo kikatampe, Yelusalema.

²⁸⁹ Aye Yelusalema wabula wa pano patanda, “pakuuba atweba twi ba Yelusalema wa Peulu,” ako kwafumine Kyambo, kufuma kukutongwelwa jimo, monai. Kechi yewa Yelusalema onaika ne; aye Yelusalema Mupya ubula konaika. Kechi Yelusalema wakala ne, washimikilwe na bantu; kana Yelusalema Mupya washimikwa na Lesa, monai, akya Kyambo mwiulu pano kibena kusololwa. “Mu nzubo Ya Bataata muji mwakwikala mwavula. Mbenakuya mu kwimumwena kuntu,” aye Mulenga ubena kulenga mikwakwa ya golonde, ne bintutu bikwabo. Awa ye Yewa ubula konaika.

²⁹⁰ “Yelusalema, Yelusalema, jiinga Amiwa,” kufumatu kutendekelo ya kimye; kechi Muntu wabusatu ne, muntu mukwabo ne, kana mba, “Amiwa jiinga jo kemufukamina nobe kyaje wafukamina pa make anji, bino anweba kunswa ne. Pakuuba pano kimye kyenu kyaiya.” Mwamona?

“Paji Mubiji wanyama wafwa, bampungu bakapwilakena pamo.” Pano awa mubiji wanyama wabola, pano aba baja bifwiila bapwilakena pamo. Mwamona?

²⁹¹ Monai. Mosesa, aye kechi wapainepo kubaana ba Lesa. . . Mosesa wajinga mpungu, kabiji kechi wapainepo baana ba Lesa bimbala bya kushako Nowa ne. Mwamona? Aye wajinga na Kyambo kibishi kya kwa Lesa. “Aye Yehoba Lesa wakumenye mu kiselebwa, kabiji washinikishe Kyambo Kyanji, kabiji wambikile pano amba ne mulupulemo.” Nanchi po kwaishile ba kusombolola, na kumusombolola. Mwamona? Bino wajinga na Kyambo kya kimye.

²⁹² Mambo, Lesa waambile kwi Abulahama, yeka wajinga namulaye, “Lunkunwa obe bakaya mukyaalo kya bwenyi, myaka foo aduleendi, pakuuba Amiwa kebapepula ne kwibalupulamo na kuboko kwa bulume.”

Mosesa waambile mba, “Pano, aye Yehoba Lesa ukamba ne amiwa ne kumbuula, kabiji wambuula bya kuuba, kabiji Amiwa ke mubuula.” Waambile mba, “AMIWAJIPO” ye wantuma.”

²⁹³ “AMIWAJIPO!” Kechi mba “Amiwa najingapo ne, nangwa mba kekalako.” “AMIWAJIPO,” mubukijiipo, Kyambo pano. Kechi Kyambo kyajingako ne, Kyambo kikekalako ne; Kyambo kijiipo. Mwamona? Mwikyumvwa nyi? “AMIWAJIPO!” “AMIWAJIPO” kyo Kyambo. “Muntendekelo mwajinga Kyambo, ne Kyambo kyajinga na Lesa.” Abye ibyo nyi? “AMIWAJIPO.” “Lesa wantumine ami kwikala ngauzhi Wanji, mukushinikisha amba akye kyakine. Amiwa ne mukumbu ku kikyeye Kyambo, wambujile mba ngiye kuno ngube kikyeye.”

Kabiji byo ekyubile, Felo waambile mba, “Kyawama, tuji nabasongwalume bavula mu jiije jibuumba bakonsha kuuba kyo kyo, ne abo,” bakusombolola.

²⁹⁴ Yesu waambile mba, “Pano, amba akyo kikabwelapo jibiji mukimye kya kumpelo,” monai, kuuba kintu kimo. Moani mutanshi waishile. Moai waikela na Kyambo. Akyo ikyo. Amo mokyayukanyikilwa.

²⁹⁵ Nanchi, mwamona, twamona mba, Mosesa kechi wibapelepo bya kimye kya kwa Nowa ne, “Tusa kulenga bwto pano, mambo akye kyo Kyambo, mwayukatu. Nowa washimikile bwato juba jimo.” Kapaji, makubi ajilenga pa kyokyo ne. Ine. Ine.

Akye ke Kyambo kyalailwe. Monai, mbilayanji yo ajinga nayo yafumine kwi Lesa, aye wajinga na Kyambo kya kwa Lesa kyakiine kya mukyokya kimye.

²⁹⁶ Nangwatu Yesu kechi wibapelenga bimbala byashileko Mosesa ne. Mosesa wajinga na Kyambo kya mukyokya kimye, bino Mosesa wajinga ngauzhi. Awe ke Lesa Mwine, monai, Aye kechi wibapele Mosesa—Mosesa byo anshilepo ne.

Pano talai ku makubi mukoka kabungwe, bajinga nakilaka kyabyobya bintu. “Twayuka! Tunjii na Mosesa! Atweba kechi twafwainwa kwikala ne Obewa ne.”

Aye waambile mba, “Inge mwamuyukile Mosesa, ne Amiwa inge mwanuyuka, mambo Mosesa watongwelenga Amiwa.” Mwamona?

²⁹⁷ “Paji Mubiji wanyama wafwa, bampungu po bakapwilakena.” Bampungu! Yo nyama yaipaiwa ya katataaka ya bu Kyambo, akyo Kyambo kyo bakomesha ne kwikinunisha, kabiji kyasololwa ne kupewa ke Kanjo kabaana.

Pano, awa mubiji wanyama wafwa wakala waikala myaka maaduleendi, kikekalatu byokabya.

²⁹⁸ Kimotu pano! Luther wajinga na mbila ya lulapilo; bino, anweba jibuumba ja Benaluther batunama! Baptist wajinga na mbila; bino, anweba ba Baptist batunama! Mwamona? Ba

Pentekositi bajinga na mbila; kwiya kunzubo pano, kebatunama ba Pentekosito!

“Pakuba kuji Mubiji wanyama wafwa, apa ponka po pakapwilakena makubi.”

Vulukai, kuuba mwajiisha Mwinaluther ne, kunyuma mu oa moba (mwakonsha pakino kimye), kimbala kyaba Katolika. Ine, mwane. Aye wajinga na nyama ibishi. Akya kyajinga muyoya nkulo ya kipwilo.

²⁹⁹ Anweba kuuba mwajiisha waki Methodist, mbila Yakiluther ne. Oo, ine, aye kechi wakebelenga abya bimbala ne. Ke byabola. Monai, Bumi bwafuminemo ne kuya mukintu kingi. Awa ke kasalala kakala ako kafwa, kunyuma akwa. Abo Bumi bubena kuyatu kulutwe.

Nangwatu anweba kuuba mwajiisha Musongwa wa Yesu Kilishitu na Mafunjisho akipentekosito ne. Ine, kiinetu! Tubungwe mwayula-mapila; kafwako kibena kubiwa ne! Ine, ine!

³⁰⁰ Mambo mulaye ke wakuuba mba, “Kabiji aja juba jikatampe jilengsha moyo saka jikyangye kwiya, Nkemutumina Elaija ngauzhi. Aye ukalulwila michima ya baana ku Lwitabilo lwa bashabo jibiji.” “Aye yonse milaye yalailwa mu Baibolo, Amiwa ke yuba, kabiji apa ponka po bakapwilakena ba mpungu.” “Bonse Bobapa kwiba Taata bakeya kwi Amiwa.” Mwamona?

³⁰¹ Yesu kechi waesekelepo kyokyo ne. Bino Yesu byo aishile, Aye wibitaine bisamba bya makubi, “Tuji na Mosesa ne mizhilo.” Mwamona? Kyawama, aya yajinga njilo yawama kunyuma kimye kyo beipaile ne kwi ipana kwi abo. Monai, yajingatu bulongo mukyokya kimye.

³⁰² Pakuuba abye byo byaambilwe jimo kwi Mosesa, ayemwine, awa waipaile kitapisho, waambile mba, “Aye Yehoba Lesa wenu ukemanya mukachi kenu, wa mubalongo benu, Ngauzhi. Kabiji kikafikizhiwa kuuba mba, yense ukabula kulamata kuyewa Ngauzhi ne byo akaamba Aye, ukachibiwako kufuma mukachi kabantu banji.” Kabiji byo kyajinga.

³⁰³ Talai peepi nobe sikisi aduleendi bungauzhi bwapusanapusana bwafikizhiwe pa kyokya kimye, bya mu Lulayang’ano Lwakala, kwi Yesu Kilishitu. “Abo baanshile maboko Ami ne mauu Ami.” Peepi nobe, Nalubamo kana biinga bya fikizhiwe mu awala eiti nangwa sebeni akupelako a bumi Bwanji, mu byonse byaambile bangauzhi, bulongotu.

³⁰⁴ Inge Naaula leelo amba kintu kimo kikamweka mumwaka umo kufuma pakino kimye, kape Njina—Njina ma paseti tweti akuuba mba kyakonsheka kumweka, kana kiji bulongo nangwa ine. Kabiji inge Naambila jimo amba kikananga kikamweka, kabiji nabula kutongola kimye, Njina na kapaseti kacheche. Inge Naambila jimo amba kikamweka kimye kananga, kiipa kalubaji

kacheche. Inge Naambila jimo mpuzha ko kikamwekela, kipana kalubaji kakila mukukepa. Inge Naambila jimo amba...ne muntu pokikafikizhiwapo, nanchi Njina bibese peepi nobe aduleendi umo wa pabibese byabicheche bya masauzande pakuuba mba kifikizhiwe, inge kechi kyakine ne.

³⁰⁵ Kabiji Kyambo kyonse, aleluya, abyo bya neembelwe na mambo a Mesiyasa, bya fikizhiwe byonsetu. Posotu kufika ne juba jimo, watangilenga Binembelo, Aye waimene pakachitu kamukunku wa byambo, kabiji waambile mba, “Aye Mupashi wa Lesa uji pe Amiwa amba sampwile Mamboawama, ne kupokolola bo...” Kabiji waimene pakachi ka mukunku wa byambo, mambo byashala ke bya kimye kya Kwiya Kwanji kwa bubiji. Amena! “Meulu ne ntanda bikapita; Byambo Byami kechi bikapite ne.” Mwamona?

³⁰⁶ Aye wajinga Kyambo nanchi, akya kibajishishenga. Mosesa wibabujile Bukine; bino, mwamona, kimye kyonse balengamo dinominesheni, pakuuba mba makubi...

³⁰⁷ Paji Bimo byashajilepo panyuma ya kuja bampungu ne kuya baya kunzubo. Kabiji abo babena kupembelela kumona kintu kikwabo. “Akyo Kyambo,” baamba mba, “abye byo Kyafwainwa kwiiya. Twajinga na mfumbo keesha; tukekala na mukoko keesha.” Mwamona Moombena kutazha nyi? “Paji mubiji wanyama ya mfumbo yakala, batunama, pakuuba tuji na mukoko ubena kwiiya leelo. Uji kweepi?” Mwamona Moombena kutazha nyi? Kajo ka Bamalaika! Bantu bajiile manna ajuba jimo, inge basaka kwiaalama pa juba ja londejilepo, aalukile ke atama. Bushe kechi mwamona bipasha byonse nyeni, byobiji bya lumbuluka? Pamotu mukino kimye!

³⁰⁸ Monai, bamakubi bamujuba ja Yesu ne abo bapangilengamo bademona; bashingwa manyi pa mubiji wanyama wafwa wakala. Abo ibyo nyi? Abo bapangilengamo ba demona. Yesu byo aambile.

³⁰⁹ Kabiji vulukai, bajinga na bangauzhi muoa moba. Kefasa, aye ng’anga mukatampe, waawile. Baanga bayuka kyo kyo? Kefasa waawile. Monai pakifulo kya seku mu bujimi; kitekezhiwa na kushiingwa kumotu. Kika Baibolo kyo yaambila mba aye waawile? “Mambo wajinga ng’anga mukatampe muyewa mwaka.” Uja bifwiila, luseku ne kiswaswa, waikala pamo na Wichi; bino Mupshi wajinga peaye, Mupshi Wazhila wakine wakwa Lesa. Aye Mupshi Wazhila wa Lesa wajinga peaye, pakuuba mba asampwile, aule, kabiji ne kwambila jimo amba kifikizhiwe; kabiji bakaine ne kumupoopa pa musalabo kyoka Kyambo kya kimye kya shinikishiwa.

³¹⁰ Oo, lusa, mulongo! Abye bintu tukebyamba bimye binga, mwamona, javujishatu kupichila mu Kinembelo? Nsa kupelawizhako. Njina peepi nobe teeni mabuula, a Binembelo,

na kushinikisha bintu byonse. “Juba pa baoloka ne pabula koloka, pamotu.”

³¹¹ Yesu waambile mba, pa kushinikisha kikye. “Inge Napangamo bademona na munwe wa Lesa, pano nga baana benu bebapangilamo mwing’anyi?” Pano, abo bapangilengamo ba demona. Abo baawilenga. Abyo ibyo nyi? Bino abo kechi ba Muyukile mba ye Kyambo kya kimye ne, (kika?) mambo Aye kechi waikele kulubaji lwabo ne.

³¹² Pano tolai Mateyo 24:24, “Bakilishitu Babubela,” bashingwa manyi, “bakeeya, kabiji kukekala ne bangauzhi babubela bakekyaulanga,” mwamona, “Kabiji bakajimbaika bonka Basalululwa inge kya konsheka kubiwa.” Pano mwikumvwa nyi?

³¹³ Monai baana. “Nga baana babo . . . Inge Amiwa pangamo bademona na Kyambo kya Lesa,” akyo, Aye wajinga Kyambo kya Lesa, “nga baana benu bamadinominesheni bebapangilamo mwing’anyi?” Bino, Lesa bunke bwaji ye wakonsha kupangamo demona, twayuka kyokyo, Lesa yekatu. Mambo, awa kilobo wafwainwa kwikala wakilapo mukukosa kukila mwine mwina nzubo. Abo bajinga na bulume bwakuuba byooyo.

³¹⁴ Mwayukatu, Mulumwekesho momwa, waamba mba . . . awa antikilishitu ukeya mumoba akupelako, “Baubile bya kukumya ne biyukilo, kya kuuba mba bakonsha ne kujimbaika bantu baji panopantanda, ne kujimbaika bonsetu, Benakilishitu ne bonsetu, abo mazhina abulwa kunembwa mu Buuku Wabumi wa Mwaanamukoko,” mukumbu ku Mateyo 24:24, “abo mazhina abulwa kunembwa mu Buuku Wabumi wa Mwaanamukoko kufuma kukitendekesho kya ntanda.”

³¹⁵ Abwa Bumi bwajinga ku mizhazhi yakyokya—ya kyokya kinchi kyakine kya olingi, akyo kyaiya kupichila momwa mubichi bipanga bipangwa ne bintu byonse, kabiji ne kusenda kipangwa ne kwikitwala peulu ya kinchi, kukila peulu ya misapi ne bya kusomekamo bya madinominesheni. Mwikumvwa nyi? Nsakupelawizha. Awa muntu kilobo . . .

Vulukai Davida pano, aye wajinga wakinshika, wabulamo bujimbijimbi, kukeba kumwingijila mwingiilo Lesa, kabiji kechi yewatongwelwe kumuuba ne.

³¹⁶ “Abo,” bashingwa manyi; pakuuba Yesu waambile mba, “Byo bafunjisha Mafunjisho a mikambizho (mu Binembelo) ya bantu,” monai, kechi Kyambo kya kwa Lesa ne, kechi Kyambo Kyanji kyashiniikishiwa ne; kufunjisha Kilishitu wajishimikila, monai, kintu kyajingako.

Kabiji Baibolo waamba mba, “Aye byoaji.” “AMIWAJIPO,” kechi mba “Najinga nangwa mba byokekala.” “AMIWAJIPO, ponka pano.” Aye ye kyokya Kyambo kiikala na bumi mumwe.

Aye wajinga, muntendekelo, Aye wajinga mu—Aye wajinga mu—musele; Aye wajinga mu kasalala; Aye wajinga mu jinkuzhi; pakuuba pano uji mu Jipeke.

³¹⁷ Pano, obewa bwabwela ne kukeba kwikala jibiji? Ibyepi umvwe abwa Bumi bwabwela jibiji kuushi, mwalanguluka mba (bwashala) Bumi bwakonsha kwamba, nangwa kubwela jibiji saka jauuma aja jinkuzhi, bwabwela jibiji ne kwikala mwiakyo nyi? Kuuba kyaubiwa ne. “Mambo kechi kyakonsheka ne kuboba batompeleko,” kabiji kechi baendele na Kyambo byo Kyaishile na kufikizhiwa ne, “abo bafwa, baaya; kabiji ne miiba ne bisonsonya biji pepi nakulengululwa, mpelo yabyo ke kusokwa.” Abo ibyo nyi?

Pano mukupelawizha bukiji bukiji byo Nakonsha kuuba.

³¹⁸ Monai pano Kinembelo. Kufunjisha Lesa wajishimikila, monai, kijitu pamo nobe babena kukeba kwikala bwikalo bwa kunyuma bwapita, nobe, “Kyawama, Wesley waambile *bikananga-ne-bikananga*.” Nangwa mba, “*Kananga-ne-kananga* waambile mba *kikananga ne kikananga*.” Anweba mubena kukaana Kyambo kyalailwe kya mujoja juba, aa Manna ayukanyikwa amujoja juba. Beseka kubika Bwinaluther bwakala, Baptist, ne waini wa Pentekosito mu mabotolo etu akatataka. Kechi kyakonsha kwingila ne. Kabiji Waini wetu wakatataka, mu mabotolo abo akala, kuuba kyaingila ne. Inge baeseka kubika awe Waini wakatataka mu dinominesheni, byubilo byabo byasololwa. Abo kuuba be kyuba ne. Kimusansaikila.

“Bino, mulongo, Namona Kyambo kya kwa Lesa, bulongotu kupichila mu Kyambo!”

³¹⁹ “Pano, talai papo, dokotala, inge . . . Atweba—atweba kuuba twaikala na Kyokyo ne.” Ned, Naketekela namba mwaikalapo kala nabimo byamubyobyoby katataka. “Atweba, kuuba twaikala Nabyobyoby pano ne. Ami—Ami nakonsha kutemwa amba mwatwajijilatu kuya kulutwe.” Mwayukatu. Monai, kechi kikengila ne. Kisansauka.

³²⁰ “Anweba kuuba mwabika kisapi kyakatataka pa kisapi kya kala ne, mambo mwakonsha kwikilengela kyatabuka.” Mwamona? Bushe Yesu kechi waambile byobyoby nenyi? Kuuba mwabika Waini wakatataka mu mabotolo akala ne. Usansaika. Awa Waini wakatataka uji na Bumi mwiaye. Kijitu bulongo.

³²¹ Monai kintu kimo papo, bukiji bukiji, mukimye kyo tubena kuya nakupwisha . . . kwamba kwetu. Monai Lumwekesho 16:13 kufika pa 14, inge mubena kukeba kunemba kyokyo. Amiwa kechi nakonsha kwikala nakimye kyakuyamo ne. Nakeba anweba mba mwashinikisha kabiji ne kwikimona. Pano monai, aaye yombila iji Pakachi ka Mwalo wa Busikisi ne wa Buseebeni.

Pano tuji na...tusakushika mukakimye kacheche, inge mwakonsha kushipikishako mamineti akwabo. Kekunshika pano.

³²² Monai Lumwekesho 16:13 kufika pa 14, pakachi ka Mwalo wa Busikisi ne wa Buseebeni, “Mipashi isatu yabipa nobe ba bombwe” (mwi kimona kyokyo nyi?) “bya lupukile mukanwa kakintu kimo.” Monai pano, bukiji bukujitu. Mwinengezha nyi? Ambai mba, “Amena.” [Kipwilo kyaamba mba, “Amena.”—Waku.] Ke mipashi iji pasatu!

³²³ Pano obewa mulongo wa ku dinominesheni, ngii kalaitu pakakimye kacheche. Kechi mwimane ne kulupukamo muluumu, anweba muji kooko pa waileshi, kukwatankana kwapa-foni. Kechi muzhimye tepu lekonda wenu ne. Ikalaitu pa kamineti, ne kuteleka. Anweba mwasemwa kwi Lesa, musakukonsha.

³²⁴ Ba bombwe baji pasatu! Bombwe ke nyama awo kimye kyonse utalatu panyuma. Aye kechi utala koabena kuya ne; aye utalatu koabena kufuma. Mwamona? Bushe kechi mwikimona nenyi? Nga musango wa balesa basatu mu umu mwayuka po asemekejiwe nyi? Vulukai, “mipashi isatu yabipa,” mipashi yiimena pabunke bunke. Mubena kwikyumvwa nyi? [Kipwilo kyaamba mba, “Amena.”—Waku.]

³²⁵ Monai, abo batalatu kunyuma ku Kinje kya Nikeya ako kwasemekelwe lufunjisho lwa balesa basatu mu umu, kechi mu Baibolo ne. Kechi kujipo kintu kyamusango yewo ne. Abo batalatu ku Kinje kya Nikeya, Loma, ako kwasemekelwe balesa basatu mu umu.

³²⁶ Monai kobafumine. Monai. Kabiji babombwe basatu bafumine mu basatu mu umu lwakala, lwasemene mu basatu mu umu lwakatataka, ye inaabo. Kyafwainwa kufuma muka? Balesa basatu mu umu, “ke sung’unyi,” mwamona, “ke lukinyama,” kabiji ne “ngauzhi wabubela.” Balesa basatu mu umu, wakatataka. Ng’anyi kimye ba bombwe pobalupukile? Kimye ka po byaubile? Monai, bajingamo kimye kyonse kye, bino kechi bya solokele ne posotu pakachi ka Mwalo wa Busikisi ne wa Buseebeni, peepitu na kushinkulwa kwa Tutetesho (Hmm?) pakuuba mba tusololwe.

³²⁷ “Mambo mu Mbila ya malaika wa butanu na bubiji, byafyamika bya Lesa bikayukanyikwa,” byonse bye bya balesa basatu mu umu, ne mabatizhilo abubela, kabiji ne bintu byonse byafwainwa kusololwa. Lesa etukwashe tumone Bukine bobuka! Kabiji kechi kulanguluka mba ke muntutu umu ubena kweseka kwaamba kintu kimo. . .

³²⁸ Mbena kumvwa awa mupashi ubena kukana Kyokyo, mwamona. Amiwa kechi mbena kutazha kwi amimwine ne, mulongo. Amiwa mbena kwaamba pa Malaika wa Nkambo awo uji mukachi ketu. Abyo kine ibyo.

329 Monai, balesa basatu mu umo! “Aye sung’unyi,” baanga bayuka awe sung’unyi yemuka? Ke Loma. “Kabiji awa sung’unyi waimene ku mwanamukazhi mukuuba mba mine mwaananyi aku usemwatu.” Abyo ibyo? Pano nga “lukinyama” mu Baibolo kyalumbulula ka? Bulume. Kijitu bulongo. “Ngauzhi wabubela, ngauzhi wabubela,” wabubela, washingwa manyi. Mwamona?

330 Kyatatwijile kwepi? Awe ke “ngauzhi wabubela,” umotu. “Ngauzhi wabubela,” aye papa mutanshi; kabiji kufuma moomwa mwalupukile “aye—aye pite, kabiji aye inanja bapite,” kintu kyonsetu.

331 Balesa basatu mu umo kyakomenenga; kechi mumoba atanshi ne, kechi wakonshekele kusoloka mumoba atanshi ne, kyapichile kuya kulutwe nakyo. Pakuuba kimye kya Tutetesho Tutanu natubiji byo kyafikile, ne kushinkula abya byafyamika kabiji ne kwibisolola, akya kyo kimye “babombwe basatu, mipashi isatu yabipa nobe babombwe, baishile ne kwisolola abobene,” lufunjisho lwa balesa basatu mu umo kwimena Bukine. Mwamona? Uu!

Mwamona kokyafumijile nyi? Mwamona kokibena kubwela nyi? Kinje Kyakukwatakana. Bonse bo balongo, nangwatu byokabyo; mipashi imotu, byonse bimotu.

332 Kabiji talai. Ke kyakujimbaika bingi, kuuba ne bya kukumya! Kabiji abo ke badiabola baya ku balesa bonse ba panopantanda, na kwingila byakukumya, mu kwibajimbaika mujuba jakupelako, kabiji bakekifikizha mu kwikyuba. Nga Lesa waambile mbaka payewa mupashi watama?

Waambile mba, “Amiwa nkekila ne kutwela mutunwa twa booba bangauzhi ne kwibalengela kwaula byabubela, ne kulengela Ahaba kuya pakuuba mba onaunwe.”

333 Lesa waambile mba, “Yanga. Ukashinda. Ukebalengele kukwitabila. Abo kechi banji mu Kyambo ne, kya kutatwilapotu.” Mwamona? “Yanga, mambo ukamongola. Obewa ukekala wakwikyuuba, byo ukatwela mu bangauzhi babubela, mambo aye wakonsela mwi abo. Kabiji ne aye kechi wayukapo nangwa kimotu kya mu Kyambo ne, kabiji kechi ukeseka kwi Kifunda ne. Aye konsha wikyuba ne, mambo aye ke kisonsonya, kyakutatwilapotu.” Mwamona? Mwamona? “Mukashinda.”

Talai kubaabo babombwe babubela, kutala kunyuma, “Kika, mwayuka byo baambile kunyuma akwa ku Nikeya nyi?”

334 Amiwa kechi nasakamana na byo baambile ne, akwa ku Nikeya. Amiwa mbena kwaamba byo baambile kokwa ku Jitanda ja Lesa; kika kikekalako, kechi kyajingako ne; kika kikekalako, mambo Aye ye “AMIWAJIPO.” Mwamona?

“Wabubela.” Talai pa kyokyo. Huh! Monai kobyafuma.

³³⁵ Pano (Telekai bulongo.) twamweshatu bulongo, panyuma ya kushinkula Tutetesho Tutanu natubiji. Kokuuba mba kusololwa kwa kyafyamika: Nga balesa basatu mu umo kyo kika? Mwamona? Kwepi kokyatelelwe mba balesa basatu mu umo? Mwamona? Pepi mu Baibolo Apo po kyaamba kyambo kya balesa basatu mu umo? Kwepi kwakonsha kwikala Balesa basatu, kwaamba mba tupopwela Balesa basatu kabiji twabula kwikala bantushi ne?

³³⁶ Bakonsha byepi kwikala ba abenamo, Aye saambile mba, “Amiwa ne Ba Taata twi Umo”? “Inge mwabula kwitaba mba Yami Iye, mukafwila mububi bwenu, monai, mukubula lwitabilo.” Bubi ke kubula kwitabila. “Mukafwila mukubula lwitabilo.”

Oo, anweba mwamba mba Amiwa yami
ng’anyi, anweba mwaamba mba Amiwa
nafumine kwepi,
Oo, mwibayuka Ba Taata, nangwa mwakonsha
kwibatela Jizhina Jabo nyi?
AMIWA ne Loozi wa Kushaloni, ye Watoksha
kabiji Ntaanda Wakumakya.

Mwakonsha kumbula Aye kana Yeng’anyi?

AMIWA yami naambile kwi Mosesa mu kipupu
kyatemenenga Mujilo,
AMIWA ne Lesa wakwa Abulahama, ne
Watoksha kabiji Ntaanda wa Kumakya.
AMIWA ne Loozi wa Kushaloni, oo, mwaamba
mba Nafumine kwepi;
Oo, mwibayuka Ba Taata, nangwa
kumutongola Jizhina Janji? (Amena!)
AMIWA Alefa, Omega, aye Ntendekelo ne
Mpelo;
AMIWA ne nkulengwa konse, kabiji Yesu jo
Jizhina Janji.

Abyo ibyo. Kechi balesa basatu mu umo ne! Ine, mwane. Akyo ke kintu kyabubela.

³³⁷ Ato Tutetesho Tutanu natubiji, ke kushinkula abya byafyamika kuuba mba “byafwainwa kupwa,” byamweka byonse. Katetesho kashinkulwa; kaaleta, kaamweshwa, kaaleta patoka bya Bukine byafyamika abyo byamfilwe na Tutetesho pa yonse ye myaka, kupita mu byonsebye bipwilo ne madinominesheni.

“Awa pite mukatampe,” wa mu Lumwekesho sebeeni- . . . Aye wajinga ng’anyi? Pakuuba ye “AYE INANJA BA PITE,” yeka aye. Mwamona?

“Pano, mwibatela mba ‘makubi,’” mwaamba mba, “Mulongo Branham.” Abyo ibyo.

338 Bino, Vulukai, jikubi ke ng'onyi. Aye washingwa mu kutumbuka, ne aye. "Aye mipashi ibiji, ikekala bingi peepi pepi pakuuba mba bajimbaike Basalululwa..." Jikubi jabayatu pamo nobe—nobe mpungu. Aye wakonsha kutumbuka pamotu nobe mpungu; kabiji washingwa kutumbuka, nangwa kusapwila, nangwa kwaula, monai, pamotu nobe mpungu. Bino kechi wakonsha kulondela mpungu kuya mwiulu ne. Ine, ine. Inge waeseka kulondela mpungu, byubilo byanji bikasoloka. Ee, mwane. Aye kuuba walondela mpungu ne.

339 Oo, wakonsha kwaamba mba, "Naketekela Yesu Kilishitu kwikala Mwaana wakwa Lesa. Naketekela Lesa Taata, Wabulume bonse, Mulenga wa meulu ne ntanda; Yesu Kilishitu Ye Mwaanaji," ne bikwabotu. Oo, kine, bakonsha kuuba kyokyo. Pakuuba nga Aye kwikala ye umotu keesha, leelo, ne myaka yonse? Mwamona?

340 Mpungu ke ng'onyi walengwa—mwapusanako. Kechi pajipo kiji nobe aye, pantanda ne. Mwamona? Aye—aye... Inge watunama waeseka kumulondela, nangwa ng'onyi uji yense, wakonsha kutabauka. Byubilo byanji byakonsha kusoloka, kine bulongotu. Aye wakonsha kulajika inge waeseka kubika Waini wakatataka mubotolo. Monai, wakonsha kulajika. Wafwainwa kutabauka. Aye kechi walengwa, aye kechi... Mubiji waji kechi walengwa mumusango wakonsha kumukwanchijijila peulu apa ne. Inge watwela mu byamwiulu peene palepa, inge kechi walengelwe, ne kubikwa, kutongwelwa jimo, kusemwa bu mpungu ne, wakonsha kulajika ne kusansaika. Mwamona? Mayona akonsha kuyokokako ku byapi byanji, kabiji wakonsha kuponena pashi. Kine. Aye kuuba walondela mpungu ne, mu kuya peulu. Inge aye waesekatu kwikyuba, byubilo byanji bikasoloka. Abyo ibyo. Kuuba wikyuba ne.

341 Kika? Aye kuuba wamona nobe mpungu ne. Buwame ka bwakonsha kwikalamo inge waeseka kutoloka peulu, kabiji wabula kumona pouji mukimye kyo uji peulu? Kabiji inge aye wikyesekatu, nangwa waesekatu kusombolola awe mpungu, mu kuya peulu, aye wikala mpofo bingi kya kuuba mba kechi uyuka ne koaji ne. Abyo ibyo. Aye ubijika ne kujila, ne kuuba byakuuba uba; pano ambaitu Kyambo kwi aye, mulongo, pokapotu byubilo byanji nishi byasoloka.

342 Ambai naji pa lubatizhilo mu Jizhina ja Yesu Kilishitu, nangwa, Aye byo anji umu yeka Keesha, leelo, ne myaka yonse, bonse—bonse mumusangotu umu, kabiji mubulai. "Kika, oo, pano pembelaiko pa kaminetitu kamo!" Mwamona? Oo, ee, mayona anji abena kupona. Monai, aye utolokela mwiulu, ne kwaula, ne kupanga bademona, ne kwamba munjimi, ne kubijika, kabiji ne bya kutwajijila na kuuba, kunyema peulu—nepashi pa mushiji. Bino kweseka kulondela peulu Apa ne; kika, aye kine ukayukanyikwa.

343 Nangwa byokabyo, aye waikajikwa. Aye washingwa. Wakonsha kutumbuka. Aye mwine wakonsha ne kunshikama, kufika popa, bino kechi. . . nanchi pafwainwatu. Monai, aye wakonsha kuja bimbala, bino kuuba wanja Nyama ibishi yafuma Kujintanda ne.

344 Aye ke mpofu. Aye wakonsha kwingila, bino kechi wakonsha kuyuka ne byo aingila ne. Monai, awa yeka Mupashi umo waponejile pe aye, nobe mvula, kumulenga mba ekale wichi; aye kechi wichi ne kya kutatwilapotu. Aye ulajika. “Oo, Amiwa kuuba naendela. . . Oo, ine, mwane! Nayuka mba Dokotala Jones waambile mba. . .” Kijitu bulongo, yanga kulutwe. Mwamona? Yanga kulutwe, inge ubena kukeba kwikyuba.

345 Ine, monai, aye kechi wasemekwa ne, nangwa kushimikwa, nangwatu kutongwelwa jimo, kwikala mumusango wayewa ng’onyi ne. Aye wakonsha. . . Aye ke. . . kape ke jilemoni jamena ku kinchi kya jango, bino kechi jafuma kumizhazhi ne. Aye ke kintutu kyo banungako. Kabiji umvwe baya palepa bingi mu bya budinominesheni bwabo kyakuuba mba kechi bakonsha ne kumona Kyambo kya Lesa akyo kya shiniikishiwa ne, apo byubilo byabo bikasoloka. “Oo, abya bintu, Kizhingu kitoka kumutwe, kabiji bonse, oo, Kebintu byabulamo maana.” Mwamona? Walengwa kuyukanyikwa.

346 Aye kechi walengwa kumona palepa byobyana ne. Aye wakonsha kumonatu ponka magalashi anji adinominesheni po akonsha kumufikizha kumona. Bino, pakupwa byobyana, aye wikalatu ke mpofu nobe kafifya. Apo pooponka byubilo byanji po bisoloka. Mwamona? Apo mpungu wakine popo ekala na kuja. Ee, mwane. Apo ipo bakine, basalululwa bampungu pobamona byo anji. Umvwe aye wabula kusenda kyokya Kyambo, abo ponkapotu bayuka mba jikubi ja dinominesheni.

347 Kika, kika kyo akonsha kubula kutumbukila? Mambo, talai byo abajengapo. Aye ubajenga byabola bimbala bya kidinominesheni. Akyo kechi—akyo kechi kikalengela mubiji wanji waikala wabumupashi ne, kechi kikamubika mukukosa kwa bumupashi ne, mu ng’ambilo ikwabo, kumusenda kukilaila pa byalupusano bya ki dinominesheni ne. Mwamona? Monai, aye ujatu pa bintu byabola; mubiji wanji walengelwatu byokabyo. Aye kuuba waya poopa apo Nyama ibishi byo isenda mpungu ne. Aye kuuba wikyuba ne. Mwamona?

348 Akyo kyafikizha Mateyo 24:24. Aye utumbuka, kutolokela mumwela, ne kupumapuma byapi byanji, bino kuuba watumbuka waishatu palepa ne. Mwamona? Abyo ibyo. Monai, aye kuuba waya ne, aye kuuba wafika palepa bulongo kyakuuba mba atambule Manna apya ne. Aye wakonsha kuja manna akala papo pashi, kalulu kakala kafwa ako kobaipale mulungu wapwa, ne ng’ondo wapwa, nangwatu myaka foote yapita, bijimo na ndochi. Aye wakonsha kuja kyokyo, ne kutunaminapo, kabiji

kupalaya ne kubijika, ne kutwajijilatu, kutolauka ne kutumbuka nobe mpungu. Aye washingwa, nobe ng'onyi mukwabo.

³⁴⁹ Kabiji aye kekipasha kya mpungu, uja bifwila. Twayuka kyokyo. Aye kine byobyo anji, bino kuuba walondela awa mpungu wakine ne. Mwamona? Aye kuuba wikyuba ne. Ine, mwane. Mubiji wanji kechi walengwa; aye ubajenga bimbala bya pusana pusana, monai, kabiji kechi ikekala ne. . . kechi ikekala ne—kechi ikekala Nyama ibishi ne, Manna apya. Kyakonsha kwikala kintu kyaambile Luther, kyaambile Wesley, nangwatu Dokotala *Kananga-ne-kananga* waambile mba. Kechi kikekala pa kyaambile Yesu namambo akino kimye ne.

³⁵⁰ Twayai tuyenga pano, kushika. Bashingwa manyi, “Bakilishitu,” mu moba akumpelo, bino ke “bafunjishi babubela ne bangauzhi babubela.” Monai byo kinji! Pano, Nasaka anweba mba mwesakanye bibye; kechi tuji nakimye kya kwikitanga ne, Mateyo 24:24 ne Timoti wa Bubiji 3:8.

³⁵¹ Mateyo 24:24 waamba mba, mumoba akapelako, monai, “Kukeya Bakilishitu babubela,” babubela, bashingwa manyi, “bangauzhi babubela, kabiji bakamweshwa biyukilo ne byakukumya,” kinetu nobe yeka Mututulu, aye wakine, “kabiji ba—kabiji ba kajimbaika bnka Basalululwa.” Pano monai, awa wajinga Yesu waambilenga.

³⁵² Apo Paulo waiya, kookatu kunyuma Yanji, ne kwaamba mba, “Bino, mu moba akumpelo, kukeya bantu bapopweshi, monai, banji na musango wabwina lesa. Kabiji bakasendula banabakazhi bakosama, kwibasendula mungi namisango ya lukumbwa lwa panopantanda.”

Nanchi babwela ke bakumye, ne kwaamba mba, “Kika kyo utongwelatu banabakazhi?” Oo, na mambotu abuwame. . . Abo kechi be Kimona ne.

“Kubombola banabakazhi bakosama, bayulamo na lwiso lwapusanapusana,” fumaiko kubintu biji nobe. . . bya mu. . . Monai, “Kabiji byonka Yenesa ne Yambalesa. . .”

Mateyo 24:24, “Bakilishitu babubela,” babubela, bashingwa, kuuba biyukilo ne bya kukumya pakuuba mba bajimbaike Basalululwa.

“Pano byonka Yanesa ne Yambalesa byo bamwimejile Mosesa, nanchi nebabo bantu baya mungi; milanguluko yayamungi namambo Lwitabilo.” Kechi “ka” Iwitabilo ne. “Alo Lwitabilo!”

³⁵³ “Lwitabilo Lumo, Nkambo umo, lubatizhilo lum-. . .” Kuuba mwaikala na “Lwitabilo lumo” kwakubula kwitabila mwi “Nkambo umo ne.” Kuuba mwaikala na mabatizhilo abiji ne; kechi lumo lwakwa Taata, ne Mwaana, ne Mupashi Wazhila ine. “Lumo lubatizhilo,” Yesu Kilishitu. Abyo ibyo. Monai, lubatizhilo lwabubela!

³⁵⁴ Monai, mukebyesakanye pamo umvwe mwafika ku manzubo. Monai Mateyo 24:24, Yesu waambilenga; Paulo, mu Timoti Wabubiji 3:8; ne bikwaboto byavula. Kabiji pano mwaesakanya pamo.

Kabiji mwabikapo ne Kinembelo kikwabo, Luka 17:30, Malakai 4.

“Byonka Yanesa ne Yambalesa byo baimejile Mosesa,” Kyambo kyashingwa kya kimye, “nanchi ne babo bantu byo bakekala,” kechi muntu ne, “bantu,” bashingwa manyi, “bakaana Bukine.”

³⁵⁵ “Mujokaja juba ajo Mwaana muntu jo akasololwa.” Lumwekesho 10:1 kufika pa 7, mukatange umvwe mwafika kunzubo, “Mbila ya malaika wa butanu nabubiji, kushinkulwa kwa Tutetesho.” Kyo kika? Kechi malaika ye Mwaana wa muntu ne; pakuuba aye muluwe ye kusololwa kwa Mwaana muntu. Bushe mwakonsha kwi byabanya nyi? Apo po kimweka nobe kimukosela bingi anweba, mwikimona. Kechi Mwaana muntu ne, Ayemwine; pakuba ye malaika wabutanu nabubiji, ye muluwe wabutanu nabubiji, ubena kusolola ku bantu Mwaana muntu, mambo Kyansha jinkuzhi. Aye kechi wakonsha kwi Kyalula ke kabungwe ne. Ke Jipeke, Ajojine, ne jikwabo.

³⁵⁶ “Kabiji mujoja juba, yanesa ne Yambalesa ba kamwimena,” bashingwa manyi (bakitabila-mbijinga ne babula kwitabila, kipwilo kyakinsho ne ba Pentekosito) bakemena Jipeke jakiine, “bino balekaitu bunke; byubilo byabyo bikasoloka, byonka byajinga byabo.” Mwamona? Pano mwaumvwa nyi? [Kipwilo kyaamba mba, “Amena.”—Waku.]

³⁵⁷ Lumwekesho 10, waamba mba, “Mumoba akwimba malaika wa butanu na bubiji.” Pano vulukai, wabutanu nabubiji, Nkulo ya Kipwilo kya Laodikeya. “Kwimba kwa yewa malaika,” kimye kya aya nkulo ya kipwilo po ikekala ke dinominesheni kabiji ne kwikala nkulo ya kipwilo, byo kikapanga kabungwe ka Pentekosito; kimye muluwe wa mu . . .

³⁵⁸ Muluwe umo wajingaa ka? Martin Luther wajinga ka? Wakulengulula ba Katolika. Wesley wajinga ka? Wakulengulula Benaluther. Pentekositi wajinga ka? Wakulengulula abo bakwabo. Pano nga Bumi bwaya kwepe? Bwafumamo mu kabungwe. Kechi kuji jinkuzhi ne; ke Jipeke. Kyo kika? Ke kyakulengulula Pentekositi, monai, pakuuba mba Kinembelo kya kino kimye kifikizhiwe. Mwamona?

³⁵⁹ Monai, mu jonka aja juba awe muluwe. . . Kechi kimye kya kuntendeka ne, kana pakimye kya kusolola Mbila yanji. Mwamona? Akyo Kikoka Kitanshi, lubuko; Kikoka kya Bubiji, kwaula; Kikoka kya Busatu, kushinkula Kyambo, byafyamika byasololwa. Kechi kujipo, kechi kujipo jishinda jikwabo jikatampe ja kuletelamo Kyambo, ja kukila pa bangauzhi ne. Bino jishinda jimo joka ja kushiniikishiwamo ngauzhi ke

kupichila mu Kyambo. Kabiji, vulukai, Kikoka kya Busatu ke kya kushinkula Tutetesho Tubiji na tusatu, pa kusolola Bukine bwafyamika abo bwafiiwe mu Kyambo. Bushe mwikimona nyi? [Kipwilo kyaamba mba, “Amena.”—Waku.]

³⁶⁰ Ke pakyokyo kimye, mujoja juba nishi abye bibenakubiwa, ba Yanesa ne ba Yambalesa, bakusombolola, pobakamweka jibiji. Nobe byoka byo baubile Mosesa byo amwekele na Kyambo kine kitutulu, pakuuba mba Ekyambe, abo bamweka na Kwikisombolola. Abyo kine ibyo. Pano mwamona Mateyo 24:24 byo anji nyi? Monai, bashingwa manyi!

³⁶¹ Bino paji bintu bisatu byo tusakwaamba saka tukyangye kunshika. Abye byo byo kiji. Nasaka namba mutelekesetu bulongo byo ketuye nakunshika. Bintu bisatu, vulukayi, bintu bisatu bya fikizhiwa. Bintu bisatu biji kumeso enu ponka pano.

³⁶² Kitanshi. Ayo ntanda iji mumusango wa Sodoma. Yesu waambile mba kikamweka. Talai pa kwalululwa kwa bintu; banabakazhi betu batatula kuuba bintu nobe banabalume; banabalume betu batatula kuuba bintu nobe banabakazhi, bamusango wabwanabukazhi; byabola, ndochitu, pashi-peene, banji-nabademona, kabiji abo bene ne kwikiyukatu ne. Aye Baibolo waambile mba bikamweka, kabiji apo popo biji.

Kyabubiji. Ke mukyokakya kimye, mwaila Kinembelo papo, amba ba Yanesa ne ba Yambalesa po bakamweka. Kyabubiji.

Kyabusatu. Ke mukyokakya kimye akyo awa Mwaana muntu popo afwainwa kusololwa.

³⁶³ Apo popaji waitabila wenu, ne kitabila-mbijinga wenu, kabiji ne wabula lwitabilo. Kuji Kyambo kyakine kyaimana, kyashiniikishiwa; kuji awa kitabila-mbijinga ubena Kwikisombolola; kabiji kuji ne wabula lwitabilo ubena kukanatu byonse.

Pakuuba kukekala Kyeya mukimye kya mabaanga,
Jishinda jaya ku Lukumo kine mukejitaana;
(Akyo ikyo?)

Byaalo bibena kwabenamo, Isalela walubuka,
Biyukilo abya Baibolo wetu byo aambijile jimo;
Kabiji moba aba Gentila abalwa (Sodoma),
moba abalwa kala;
“Bwelai, Anweba basulwa, kuba kweenu.”

Juba ja bukuzhi ja fwenya peepitu,
Michima ya bantu ibena kukukalwa kupema,
namambo amoyo;
Yuzhiwaimo na Mupashi wa Lesa, ikalai na
malampi anengezhiwa jimo kabiji atoka,
(Pakuuba mba mumone Kyambo kya kimye.)
Talai peulu! Bukuzhi bwenu bujitu peepi.

Bangauzhi babubela babena kubepa,
 (Baambile mba bakeya; bashingwa manyi.),
 Bukine bwa Lesa babena kwibukaana,
 Amba Yesu aye Kilishitu ye Lesa wetu;

Ko kuuba mba, abo kechi Kiktabila ne. Aye Baibolo waamba mba abyo bintu bikekalako. Abye bya mweka!

Pakuuba tukenda monka mwaendele
 batumwa.

Kyeya Kimotu! “Ne kubwezha Lwitabilo lwa bashabo ku baana.”

Juba ja bukuzhi ja fwenya peepi, (Ke peepitu.)
 Michima ya bantu ibena kukakalwa kupema;
 (Ntanda ibena kukulukilamo.)

Oo, yuzhiwaimo na Mupashi wa Lesa, ikalai na malampi enu anengezhiwa ne kutoka.

Talai peulu! Bukuzhi bwenu bwafwenya peepi.

Mwikitabila akyo nyi? [Kipwilo kyaamba mba, “Amena.”—Waku.] Twayai tukunyike mitwe yetu pano.

³⁶⁴ Mu ntanda aamo ino Mbila mo ibena kuya, kufuma ku Kitulu kya Kumusela kufika ne Kumuzhika, kufuma ku California kufika ku New York, kuyatu ne Kukabeta ka Bulenge, kufikatu ne Kabeta ka Buyeke, kuyatu ne mu bamishonyi, ne konse ko Kibena kuya, kabiji ne mu uno tambanako. Twi bayaji. Atweba kechi tuji nabibye bikatampe, byabaya, bintu bya bumaluba maluba, kabiji ne kusapwila kwa pamatelevizhoni ne. Tubena kwesekatu kuuba mo kyawamina. “Bino bonse bo Bampa Bataata bakeya.”

³⁶⁵ Pano, Nasaka namba anweba muyuke kino kwa kubula kuzhinauka ne, kabiji ne anweba mukateleka ku uno tepu. Anweba mwa kulanguluka mba Nabatazhenga kwi amiwa mwine, namambo ukuuba mba yami naleta ino Mbila. Amiwa kechi jipo nakimo kya kuuba Nakyo ne, kanatu kwikala nobe jiwi. Kabiji, jiwi jami, bya pusenamo ne na milanguluko yami; Nakebelenga kwikala wa kwipayaya nyama. Pakuuba ke kyaswa muchima wa ba Taata kyo Mbena kwambila bibye, kabiji na swikwa kwikyuba.

³⁶⁶ Amiwa kechi Yami na mwekele kookwa ku mukola ne; Naimenetu poopa kimye Aye kyo amwekele. Amiwa kechi yami nguba bino bintu kabiji ne kwaambila jimo abye bintu biiya kufikizhiwa byonkatu byo byaambiwe; Amiwa yami ngikalatu peepi mu kimye Aye byo ekyuuba. Amiwa najingau jiwi jo Aingijishe, kwi Kyambilamo. Kechi kyajinga kyo Nayuka ne; ke kyokya kyo Nepainekotu, amba Aye ambilemotu. Kechi kyajinga ami ne, kechi kyajinga malaika wa butanu na bubiji ne, oo, ine; kyajinga kusololwa kwa Mwaana muntu. Aye kechi wajinga Malaika ne, mbila yanji; kyajinga kyafyamika Lesa kyo asolwele. Kechi muntu ne; ke Lesa. Aye malaika kechi wajinga Mwaana

muntu ne; aye wajinga muluwe wafumine ku Mwaana muntu. Aye Mwaana muntu ke Kilishitu; Aye Iye ye mubena kujako. Anweba kechi mubena kuja ku muntu ne; muntu, byambo byaji bikankakalwa. Pakuuba anweba mubena kuja ku Mubiji-Wabukyambo ubula kukakalwa wa Mwaana muntu.

³⁶⁷ Inge anweba kechi mwaja bulongo pa Kyambo kyonse ne, pakuuba mba mwiipe anweba bulume bwa kutumbuka kukila pa madinominesheni ne bintu bya muntanda, mwakonsha kwi kyuba pa kino kimye, byo tubena kulomba nyi?

³⁶⁸ Taata Mutemwe, akye ke kintu kya konsa. Kechi kintu kyapeela kuuba muntu wamubiji wa mashi ne. Anweba yenu mwayuka bintu byonsetu. Kabiji Nemulomba Anweba, Lesa mutemwe, amba kechi bantu bekitwale mungi ne. Bino, mu Kyeya kya Kyambo Kyenu, bantu bende.

³⁶⁹ Kabiji, Taata Lesa, Amiwa kechi nayuka Basalululwa ne; Anweba mwayuka. Amiwa kechi nayuka kimye Kyakwiya Kwenu. Bino Nayukatu namba Anweba mwaambile mba umvwe abye byaubiwa, abo babubela, bashingwa manyi; kechi kimye kyo batendeketele ne.

³⁷⁰ Mosesa wibalekeletu bunke bwabo, kapaji kyo afwanyijilwe kuuba pa kikye ne. Aye waambiletu Anweba byo mwaambilenga. Mwamwaambijile mba alate mbalebale; ne abo bebiletele. Mwamwaambijile mba alule meema ke mashi; ne abo bekyubile. Mosesa aye wibyubiletu, Kyambo pa Kyambo, monka mo Mwaambijile, bino kabiji Anweba Yenu Mwalengejile byubilo byabo amba bisoloke.

³⁷¹ Pano, Taata, Anweba mwi Lesa, nangwa bokabyo. Akyo Kyambo kimo kyaambile mba abye bikamweka mu moba akumpelo. Bavula bantu bakinshika, monka motwaambijile Mulungu wapwa, kubika kuboko kwabo pa Jikwachi, pa kikochikala kyakatataka, kabiji kechi pa bipuzhi byabena Levi ne, waponene wafwa, “wafwijiletu mububi ne mumizhilulwila,” kupachika milanguluko yabo bene.

³⁷² Bavula bamingilo baikala muluno lufunjisho, bataanga akye Kyambo, kabiji balula penje bukiji bukiji; kuchin kuuba mba wakapaata, byo ayuka mba ukalubakanya nyimeno yanji na bantu, na kipwilo kyanji ne nadinominesheni wanji. Lesa tukwashai kubula kuuba kyokyo!

³⁷³ Tokeshai michima yetu, Nkambo, kufuma kubiko byonse bya pantanda. Nkambo, Naimana winengezha kutokeshiwa. Naimana winengezha, na kino kipwilo ne na bonse babena kutelekako, kabiji ne yense ukateleka kuyeuno tepu. Naimana, Nkambo, kabiji ne kwipuzha amba kutokeshiwa. Nkambo, twalai kunzubo ya Mbumbi ne nkundaula, bumbaimo kalume awo ye Mwakeba.

³⁷⁴ Mambo, Nkambo Yesu, “Amiwa ne muntu wa byatunwa byabula kutokeshiwa,” nobe byonka Isaya byo ajijile, “naikala

na bantu baji na byatunwa byabula kutokeshiwa; kabiji malwa ami, mambo Namona lumwekesho lwa Lesa lwasololwa,” nobe bynka Isaya byo amwene Bamalaika mu Nzubo ya Lesa. Namona kimye kya kumpelo, Nkambo, kabiji malwa ami ne kisemi kyami; malwa ami ne bantu bami. Anweba Lesa wa Peenape, tubilaikotu lusa. Ne nsashijila amiwa mwine ne bantu pamo. Kechi mwituleke tonaikile pamo nabobo babula kwitabila ne.

³⁷⁵ Dinominesheni uji yense, Nkambo, mwanamulume yense nangwatu mwanamukazhi...Amiwa kechi nakonsha kwi mwipuzha Anweba kuuba mba mupeshe dinominesheni ne, saka Nayuka namba Anweba kechi mwibikeba ne. Bino Nakonshatu kwaamba mba, Nkambo, inge Anweba muji na mikoko Yenu mukachi kaabo, bakonsha kumvwa uno tepu. Mwane ba Kamumvwe, Nkambo, kabiji ne kuyuka Moaila na ngumvwino yo mukebapa Anweba, kabiji bakeye ne kwi mutambula Anweba. Mwane kechi bakajimbaikwe na bumpofu ne kisho kya kino kimye ne. Kechi bakaje kintu kimo akyo kyajinga mubiji wa nyama wafwa wa mujuba jikwabo ne. Bakajetu Kyambo.

³⁷⁶ Aje jojishinda Bafaliseo jo bemupopejilepo Anweba, Nkambo. Abo bajilenga mubiji wanyama wafwa wa mujuba ja kwa Mosesa, ne kweseka kwikelapo na kifo; panyuma ya kupaana kya kumwenako, mu kiselebwa, aa manna kila bufuku, kibena kulumbulula mba kila kisemi. Apo ipo pobakakejilwe. Kibapele bulembe. Kibepaile, na mambo akuja kajo kaji nandochi.

Kabiji, kumupashi, kibenakuubatu kintu kimo ne buji buleelo; kibena kwibepaya, kumupashi, na dinominesheni.

Tukwashai, Lesa mutemwe. Kijitu mumaboko Enu pakino kimye. Mu Jizhina ja Yesu Kilishitu.

Namitwe yetu yo twakunyika, tusa kwimbanga mukimye kyo mubena kufuukula kyakuba. Mwakonsha kutwajijilatu nakuya kulutwe?

Naumvwa Mupulushi wami... (Kabiji Aye ye
Kyambo.) ubena kungita,
Naumvwa...

“Oo, Naendauka kimye kyabaya bingi, bino, kine, ponka pano Aye Namumvwa, ‘Iyai kwi Ami, anweba bonse mubena kuya na kupalanguzha.’”

...umvwai...

³⁷⁷ “Sendai musalabo wenu, ndondelai Ami kimye kyonse.’ ‘Ee, nangwa Naenda mukivule kyamangawa alufu, Amiwa kechi kachina kibi nangwa kimo ne; kupita mu kifutele kya munyevu wa nsono ya munyevu, kabiji ne ku meema azhindamatu.’”

Kabiji Aye koatangijila Ami...

378 “Nkambo, Namona byubilo bya balesa basatu mu umo. Namona ntanda yonse ya byalwa mo; seku ibena kukoma konse konsetu. Bino konse Anweba komukatangijila, Nkambo, Amiwa kekala nobe booba ba mu Byubilo 19. ‘Byo baumvwine Bibye, babatizhilwe ne jikwabo mu Jizhina ja Nkambo Yesu Kilishitu.’”

. . . ndondelai,

“Naendamo lubaji lumo lwa lwendo, Nkambo, kyakuuba mba Anweba nakonsha kwi mutambula.”

Pano Ami kaya Nanji jishinda jonsetu.

379 Lesa Mutemwe, Naketekela mba akye kyafuma mumuchima wami. Naketekela namba kyafuma mumuchima wamuntu yense awo ubena kwiimba pakino kimye, kape bavula bakomvwa yuwe tepu, abo babulapo pano nangwa babena kubula kumvwa pakino kimye. Twikale benengezha, Nkambo, nangwa kikale kya musango byepi. Kwaamba mba, “Nobe muntu ubena kuya na kukumanya zhita ikwabo, mushilikale, mfumu; patanshitu wikala pashi ne kubala, kana wakonsha kwi kyuba nyi, kana wakonsha kuleka bintu bya panopantanda nyi? Wakonsha kulekanyi, ne kutwela muzhita ya Lesa ya Kyambo kyanembwa, ne kufoola na bashilikale Banji, ne kutumbuka na bampungu Banji?” Kiswishai kye, Nkambo, mu Jizhina ja Yesu.

380 Mwaketekela nyi? Mwamutambula Aye nyi? Kijitu bulongo. Tukemumona jibiji muno, bufuku buno, inge Nkambo waswa. Bushe mwaketekela mba akya kya Bukine nyi? [Kipwilokyaamba mba, “Amena.”—Waku.] Bushe kya umvwanyika bulongo nyi? [“Amena.”]

Pano yanga Najizhina jakwa Yesu,
Mwaana wa bulanda ne wamalwa;
Jikakupa lusekelo ne lutekenesho,
Yanga najo konse . . .

Pano, imunai muntu umo uji kwipi ne anweba.

Jizhina Jawama, Oo jawamisha!
Luketekelo lwa ntanda, (Luketekelo lwa
ntanda!) lusekelo lwa Mwiulu;
Jizhina Jawama, Oo jawamisha!
Luketekelo lwa ntanda ne lusekelo lwa
Mwiulu.

Pajizhina ja Yesu bakapana munema,
Bakapona pashi kumaulu Anji,
Mfumu wa bamfumu Mwiulu tuka
mumvwika . . . (Aye ye Lesa, nanchi.)
Lwendo lwetu inge lwapwa.

Jizhina Jawama, (Jizhina jawama!) Oo byo
jawamisha! (Oo byo jawamisha!)
Luketekelo lwa ntanda ne lusekelo lwa
Mwiulu;

Jizhina Jawama, Oo byo jawamisha!
Luketekelo lwa ntanda ne lusekelo lwa
Mwiulu.

Naketekela mba bonse bamingilo ba kwibalumbulula, bayukanyikwa.

³⁸¹ Inge muntu walomba mulungu yense, ke akumye kika, pa kumona abye Binembelo, abyo saabiji kumeso enu. “Kabiji malwa ami,” byo aambile Paulo, “inge Nabula kusapwila Mamboawama ne.” Kumpelo ya lwendo lwaji, waambile mba, “Amiwa kechi na kakelwe kwi mubuula Mambo akwa Lesa onse byonka byo Beapaine kwi amiwa ne.”

Ndubako kimye kimo kuvuluka bintu, kwibipaana, kupesha baanababacheche.

Billy waambile, juba jimo, amba muntu umu waishile, ne kwaamba mba, “Amiwa ngiya kuno pa myaka ibiji, mukuuba mba mwaanami apeshiwe.”

³⁸² Billy waambile mba, “Kulanguluka byatama pa kyokyo ne. Amiwa Njina kamwaana, kaji na mwaka umu; bino kechi kakipeshiwa ne, nangwa byokabyo. Nanchi Nsakupembelatu poso wakoma kyakuuba mba mwine wakonsha kwi endela, Nalangulukatu.”

Nanchi twatana kuuba mba, mulongo, nyenga, kechi kya—kechi kya, monai, Ami...Kintu kimo, twafwainwa kupesha baana betu.

³⁸³ Twafwainwa kubatizha muntu yense. Panji kizhiba; meema awo. Inge kechi wikyuba ne, kika kya kukanya? Ao meema. Iya ponka pano. Kechi mupembelele mba kana buno bufuku ne; iyai ponka pano. Kuji muntu waimana kuno usakubatizha muntu yense ao walapila ne kwisolola. Inge be mubatizha javula, basakwimubatizha mu Jizhina ja Yesu Kilishitu mululekelo lwa mambo. Mwamona? Byobyu tuji.

³⁸⁴ Bino, monai, Mbila iji pa muchima wami. Nafwainwa kumona mba ne Ilupula. Akyo kyo kine kintu, nangwa bakazhi bami baamba kyabyepi, baana bami baamba, kafunga wami aambe, uji yense kyo akonsha kwaamba. Ke Nkambo. Nafwainwa kumona mba ne Ilupula. Awo ye mwine mwingilo.

³⁸⁵ Kabiji pano, bimye byavula, Ndubamo kuyuka bamingilo. Nalanguluka mba kape...mulongo wetu, Mulongo Neville, muntu wawama. Abo batemwe bakwabo kuno, tuji nalusekelo pa kwikala nenu.

³⁸⁶ Kechi kuuba mba twapusenamo ne anweba ne, mulongo, kwikala wapusanakotu. Bavula anweba basapwishi muno mwi baitabila balesa basatu mu umu. Atweba kechi twakeba kwimuzhingijila ne. Twimutemwa. Inge atweba kechi, inge Ami kechi naketekela kyokyo ne, Amiwa kuuba nafuma mukino

kipwilo ne poso naikala pashi mumanungo ami ne kwaamba mba, “Lesá, ngololai.”

³⁸⁷ Amiwa kechi keba abwa bulubi, mupashi wakwitemwa wamvwangakana nawami. Nakeba mupashi wami kwikala watoka ne wabula bubipisho, butemwe bwa balongo, bwazhila na Mupashi Wazhila. Pano, inge muntu umo wauba kintu kimo kyatama kwi amiwa, akyo kijitu bulongo. Kabiji nangwatu Nakonsha kwikala na nsambu ya kwiba bwezhezhamo, Amiwa kechi keeba kyokyo mubumi bwami ne. Ine, Na—Nakebatu kwikala na butemwe. Amiwa nenengezha kolola na butemwe, na butemwe abwa bupana mukumbu kwiulu.

³⁸⁸ Amiwa kechi naimena kuuba mba ngikale wakupusenamo ne. Methodist, Baptist, Katolika, Presbyterian, nangwatu yobe ng’anyi, Amiwa kechi mbena kwaamba bino bintu kukebatu mba ngikaleko wapusanako, ne kwikala wabwitote ne anweba ne. Inge Nauba kyokyo, Amiwa nishi ne kafutufutu kabiji nafwainwa kwikala papo pa kitapisho, nakulomba kwi Lesa.

³⁸⁹ Bino Mbena kwiikyamba, ke mambotu abutemwe, kabiji Namona koomubena kuya. Pano, kechi Naambatu bibye amiwamwine ne, kabiji pa kwaamba Mbena kufwanyikizhatu. Nemupa **ABYO BYOBYAAMBA AYE NKAMBO**. Abo bo Bukine. Kabiji Ne mutemwa namambo abibye bintu. Lesa emupeshe.

³⁹⁰ Pano byo tubena kwimba veeleshi mukwabo wayuwe lwimbo, twayai, saatukyangye kuya. Twakeba mba anweba mwikale kuno bunobufuku, inge mwakonsha kwikyuba. Inge kechi mwakonsha ne, Lesa ekale ne anweba posotu byotukakumana. Twalombatu mba Lesa usa—usa kwimupesha kabiji ne kwimupa byawamisha bya muntanda Yanji, mwamona.

Yanga na Jizhina ja . . .



BASHINGWA MANYI MU KIMYE KYA KUMPELO KDE65-0725M
(The Anointed Ones At The End Time)

Ino Mbila na Mulongo William Marrion Branham, yalupwilwe patanshi mu Kizungu pa Mulungu lukeelo, Makumbikumbi 25, 1965, ku Branham Tabernacle mu Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org